

HELVETIAE


GRATVLATIO

ad Galliam

DE HENRICO HV-

IVS NOMINIS IV.

*Galliarum & Nauarra Rege
Christianissimo.*



clō. lō. xci.



GENEROSISSIMO AM-
PLISSIMOQVE VIRO
Domino N. Brulartio^s, Sillerij
Domino, &c. Christianis. Re-
gis Gall. & Nauarr. Consiliario
ac Legato ad Heluetios, Domi-
no suo plurimum obseruando.



*Ubi*um profe-
cto non est, vir
amplissime,
quin Deus sum-
mus ac sapien-
tissimus rerum
humanarū re-
ctor atque mo-

derator, te singulari quodam suo consilio
atque benignitate patriæ nostræ, dubiis
præsertim hisce periculosisque nostris tem-

*

poribus, legatum, ad communem nostram salutem, esse voluerit. Ingentes itaque meritò, cum Deo præcipue, tum Regibus tuis Christianissimis Henricis III. & II. gratias & agere & habere debemus, quòd alter quidem honorificum hoc legationis munus ad te detulit, tuæq; commisit fidei, alter verò, ceu legitimus eius successor, eundem honorem approbavit ac confirmavit. Etsi verò magnus & amplius est hic tuus honos, tamen idem, hoc præsertim tempore, ut experientia quotidiana testatur, onus est magnum, graue & quasi intolerabile, plurimis curis, sollicitudinibus, molestijs, laboribus atque periculis implicatum. Verùm quò maius, quò grauius & laboriosius est hoc tuum munus, eò maior profectò, Illustrior & admirabilior est tua in illo sustinendo atque gerendo virtus, & quæ virtutis comes solet esse, laus atque gloria. Nam primum quidem omnium, quum legati eorum à quibus

bus mittuntur, & dignitatem amplitudi-
nēque prae se ferre, & naturam, ingenium
atque mores laudabiles referre, & expri-
mere debeant (iuxta peruulgatum illud,
Quales oratores videris, tales eos à quibus
missi fuerunt expecta) tu Regis tui per-
sonam ita profectò sustines atque geris, ut
in te Legato Regio regias planè & egre-
gias virtutes admiratione, laude ac imi-
tatione dignissimas, quotidie cum maxi-
ma nostra, non voluptate solum, sed etiam
utilitate, cernere nobis ac intueri liceat.
De his equidem libentissimè hoc in loco
multa dicerem, nisi cum illarum ipsarum
magnitudo ac dignitas, quibus orationis
meae tenuitas nequaquam respondere pos-
sit, tum tuus meusque pudor atque mo-
destia id me facere prohiberent: ne au-
ribus hoc tuis dare, & adulatoris potius,
quàm laudatoris veri partes agere vi-
dear. Verum ipsa tua dicta, facta, atque
consilia quotidiana, clara & illustria sunt

illarum indicia, testimonia & argumen-
ta: ita ut aliena prædicatione non indi-
geant.

Secundo autem loco Legatis nihil ma-
gis propositum, nihil prius & antiquius
esse debet, in hoc suo munere, quàm ut &
illorum, à quibus mittuntur, & illorum
ad quos mittuntur paci, amicitia, con-
cordia, dignitati denique atque salutis, o-
mni opera studioque suo consulant. Et hoc
quidem optimum, meo iudicio, ac præ-
stantissimum est legationis genus atque
munus, quod nimirum pacis atque con-
cordia inter populos, vel ineunda & con-
trahenda, vel fouenda atque tuenda, vel
etiam redintegrandæ gratia suscipi & ob-
iri consuevit. Hi Legati pacis amicitia-
que interpretes atque nuntij Caduceato-
res olim fuerunt dicti, quòd pacis insi-
gnia gestarent: ac propterea vel ipsum
nomen semper fuit iucundissimum. Hac
ipsa autem de causa hæc, quam tu nunc
magna

magna cum tua laude , magnóque patriæ nostræ fructu geris , instituta est à Regibus Gall. Legatio Heluetica : nempe , ut auita & antiqua illa Gallorum & Heluetiorum amicitia , atque societas sarta tecta conseruetur . Nec verò , (quod hîc silentio præterire non possum) recens , sed antiquissima , ut antiqui annales atque historiæ testantur , inter Gallos & Heluetios , etiam Christianæ religionis adhuc planè expertes : ut loci , morum atque studiorum , ita amoris & amicitiae , animorum & armorum fuit affinitas atque cognatio . Vtræque enim gens , ut testis est oculatus & locuples C. Iulius Cæsar , cum aperta , ingenua , candida , ab insidijs , dolis , fraudibus , simulationibus atque dissimulationibus aliena , tum magnanima , fortis ac bellicosa , socialia sæpe arma sumpsit , bellæque cum magna laude atque felicitate aduersus Romanos & alias gentes gessit . Vnde

Taciti, historici fide dignissimi, verba illa hîc tacere non possum, Heluetij, inquit, gens Gallica, olim armis virisque, mox memoria nominis clara.

Atque hîc quidem, ut ad te, vir amplissime redeam, tibi in hoc Legationis tua munere finis, quasique scopus est propositus, ad quem perpetuo collimas, ad quem omnes curæ, cogitationes, consilia atque conatus tui referuntur. Is autem est, ut & inter nos ipsos mutua pax atque concordia vigeat, & ut antiqua illa nostra cum patria tua amicitia atque coniunctio sancta inuiolatâque permaneat. Hoc autem tu non Caduceo aliquo atque virga, sed virgula, ut ita loquar, diuina, hoc est diuina ope atque auxilio, & tua prudentia, industria, comitate, patientia & quidem in primis illo fidei & sinceræ veritatis, rebus in omnibus gerendis studio, semper & sanctissimè abs te obseruato, felicissimè effecisti & consequu-

sequutus es. Vt enim in Rege tuo Christianissimo summa integritas, summâque fidei constantia & animi candor elucet: ita in te, ipsius Legato, qui integritatem summam, veritatem & candorem in dictis & factis tuis semper coluisti. In hoc autem ipso, rursus Regis tui Christianissimi refers naturam atque ingenium: imò ut tuo Regi ita tibi eius Legato, nihil est charius, magisque curæ quàm pax, quies, amicitia quæ cum dignitate atque salute sit coniuncta. Quemadmodum autem tu, tuique similes Legati, propter hoc pacis concordieq; studium, omni laude, amore, & observantia sunt dignissimi: ita contra magnam vituperationem merentur, & à finibus nostris repellendi atque ad extremos Indos & Garamantas relegandi sunt, Legati aliunde supervenientes, si qui sunt, vel unquam erunt, qui antiqua & sacrosancta fœdera & amicitias populorum dirimere, quique dissensionum at-

que discordiarum semina spargere conantur. Hi enim augustum & sacrosanctum Legationes munus, quod, cum hominum praesidio munitum: tum etiam diuino iure vallatum est, & ad humani generis salutem institutum, uolant. In quorum legationes optimè quadrare uidetur illud Catonis dictum, quum olim trium quorundam Legatorum Legationem sal-
sè & facètè perstringens, illam neque caput, neque pedes, neque cor habere dixit. Ita nos dicere possumus, eiusmodi legationes quæ membra illa diuellere conantur quæ inter se coniunctissima esse debent, neque caput, neque pedes, neque cor habere. Tua uerò Legatio, quæ hoc in primis studet efficere, ut utriusque populi animi, tanquam membra inter se quàm arctissimo pacis, amicitiae & concordiae uinculo cohereant, unde utriusque nostræ patriæ dignitas, salus & incolunitas dependet, uerissimè, optimoque
iure

iure caput , pedes & cor habere dicenda est.

Porro , quem Legationis diximus esse finem , idem Gratulationis quoque huius nostrae est finis : nimirum ut patrie tuae ciues depositis abiectisque armis , animisque infestis & funestis in gratiam tandem redeant : factaque rursus animorum reconciliatione , pacem atque concordiam , qua nihil suavius & utilius , inter se colant. Deinde ut antiqua illa nostra cum patria vestra societate & amicitia , quae nobis utrisque laudabilis , gloriosa & fructuosa est , non conseruetur solum , sed etiam augeatur & corroboretur : in quo tu quidem omnes animi ingenique tui nervos intendis . Quae quum ita se habeant , magnopere te rogamus , ut Gratulationem hanc nostram , tenui quidem crassoque stylo , quasi filo contextam , sed ex animo communis salutis dignitatisque studiosissimo , profectam , tuo

fauore , gratia , auctoritate & patrocini-
nio complecti, à maleuolorum, si qui erunt,
calumnijs & obtreptionibus vindica-
re: & denique cùm uniuersæ tuæ patriæ
charissimæ, tum Patri eius optimo ac sa-
pientissimo, hoc est Regi Christianissimo,
cæterisque regni proceribus, meliore de
nota commendare non graueris. Erit id,
ut nobis persuademus tuæ humanitati,
tuæ erga Deum, Regem Patriamque
communem charitati, tuæ denique digni-
tati atque muneri conueniens & consen-
taneum, magnusque hinc ad præstina tua
in nos merita, nostramque erga te bene-
uolentiam, & obseruantiam cumulus ac-
cesserit.

Pluribus apud te virum & sapientis-
simum & humanissimum, & communi
salutis amore flagrantissimum, denique
grauissimis, hoc præsertim tempore, occu-
pationibus distentum, opus esse minimè
putamus. Deum ad extremam orabimus,

ut

ut diuturnam adhuc pro immensa & infi-
nita sua misericordia, tibi vita ac valetu-
dinis usuram impertiat, quò diutius com-
muni nostræ patriæ magno usui atque de-
cori esse possis : donec tandem æternis illis
honoribus atque gaudijs, quæ pios omnes,
& de patria benè meritos certò manent,
Diuina gratia atque clementia potiaris.

Amplitudini tuæ addictissimus
I. G. S. Philopatris.

*Jeanne & G. Philopatris, Secrétaires
Théologues, Typographes*



H

D

HELVETIAE

GRATVLATIO

ad Galliam

DE HENRICO HV-

IVS NOMINIS IV.

Galliarum & Nauarra Rege

Christianissimo.





H



He

Ma

au

ric

cel

co

pr

Re

ato

co

lia



HELVETIAE GRATV-
LATIO AD GALLIAM

de Henrico huius nominis IV.

Gallarum & Nauarræ

Rege Christianissimo.



OSTQVAM Gallia, so-
cia fidelissima, & quasi
soror mea germana, at-
que charissima, multo-
rum literis, nuntiis, fama
denique ipsa, quæ totum
statim orbem Christia-
num peruasit, intellexi,
Henrico III. Rege tuo, immani, proh dolor,
Monachi cuiusdam nomine Clementis, reuera
autem demētis, manu sauciato & extincto, Hen-
ricum Regem Nauarræ in Regno ei statim suc-
cessisse, magna equidem animi perturbatione
commota, variæque affecta fui. Nam cum im-
prouisus, immaturus, acerbus, & indignus iste
Regis tui interitus, qui in totius regni damnum
atq; dedecus videtur redundasse: tum, quæ illum
consecuta est, antiquissimæ clarissimæque fami-
liæ Valesiæ, quæ tot sæculis Regno præfuit, sy-

bita miserabilisque extinctio, animum profecto meum incredibili dolore seu mcerore potius misericordiâque perculit ac perturbauit. Nam quo tempore Rex ille tuus approbantibus & adiuantibus totius Regni proceribus, innumeris stipatus cum de melucis, tum peregrinis copiis & auxiliis maximum fidelissimumq; in Regno suo liberando atque pacando, & in coniuratorum & rebellium manu opprimenda, non sine magna spe scælicissimi successus, conatum contentionemque adhibuit, ecce subito & præter omnium opinionem in ipso conclauis suo, vbi tutissimus ac extra omnem teli iactum positus videbatur, à monacho (quo quidem hominum genere familiarissimè antea vsus fuerat) vulnus in ventre venenatum ac mortiferum accipit, ex quo paulò post ei moriendum fuit: quo vulnere, atque morte grauis, ac penè insanabilis mortiferâque plaga toti regno fuit imposita. Sed ex graui, & acerbo hoc meo dolore reficit me plurimum & recreat, atque ad eò magno gaudio, lætitiâque afficit noui huius tui Regis, vt inopinata ita scælix, faustaque successio, qua Deus Opt. Max. vobis omnibus quasi signum aliquod ad bene de totius regni statu sperandum sustulisse, & ad letale istud vulnus, quod prioris Regis morte vobis pro sua Iustitia infllexerat, rursus pro sua misericordia curandum atque sanandum quasi medicam & salutarem manum porrigere videtur. Nunc enim demum in spem maximam ingredior fore vt bello isto ciuili, & pestifero, (cuius quidem vim funestam ipsa quoque experta

experta sum aliquot fortissimorum meorum
cuium millibus amissis) intestino tam diutur-
no, tamque & tot tantisque molestiarum & cala-
mitatū tempestatibus(quæ indiuidue bellorum
præsertim ciuiliū solent esse socię atq; coī-
tes) perfuncta atque liberata, tandem aliquando
pristinæ tranquillitati, concordiæ, libertati, di-
gnitatiq; restituaris, & post tristia ista nubila,
post diram tetrāmque istam noctem atque ca-
liginem, quæ patriæ tuæ fuit offusa, Phœbus tibi
rursus affulgeat, hoc est, pace candida ac serena,
qua nihil dulcius, nihil iucundius, nihil suauius,
nihil salutaris, frui rursus tibi liceat.

Hæc cum ita sint facere non potui (id quod
etiam officij mei ratio postulare, seu potius fla-
gitare videbatur) quin pro singulari mea erga e-
tiam te fide atque beneuolentia, pro maximis &
innumeris tuis in me meritis, pro vicinitatis,
prœque antiqui & sacrosancti fœderis, amicitia-
que nostræ necessitudine, de tanto, tamque præ-
stanti & eximio hoc tuo bono, seu, vt veriùs di-
cam, Dei dono, atque munere (de quo mirum in
modum lætor) tibi gratularer, & inclusam ani-
mo meo lætitiā, beneuolāmque erga te volun-
tatem verbis quodammodo testificarer. Quam
meam gratulationem ex animo, mihi crede, gra-
tissimo, meritorum beneficiorūque tuorum
semper memore, salutis, fœlicitatis, dignitatisc;
tuæ cupidissimo, profectam, tibi pro pari tuo er-
ga me amore, beneuolentia, atque fide, prœque
eximia tua humanitate gratam, acceptāmque
spero futuram.

Gratulor igitur tibi, socia amicissima & fidelissima, & quidem verè, sincere, & ex animo gratulor, quòd priore illo tuo Rege orbata, alium statim singulari Dei benignitate, nacta es Regem vere regium, & egregium, Regis nomine, & splendore, & noua hac, iusta præsertim legitimæque regis dignitatis ad priorem illam quam à parentibus habuit, accessione dignissimum, cui si, vt par est, & vt æquitatis, iustitiæque ratio postulat, te regendam permiseris, & obsequentem, obedientemque præbueris, noli dubitare quin quæ multis iam annis miserrima fuisti, & afflictissima, scælicissima posthac, ac florentissima sis futura, & breui pristinum scelicitatis, dignitatisque tuæ statum recuperatura. Nec verò illum tibi tantum, sed etiam mihi maximo & ornamento & emolumento, vsui atque præsidio spero futurum. Primo autem omnium persuasum hoc tibi exploratumque esse velim, id quod est verissimum, & certissimum, de quo etiam sæpe tibi cogitandum est, hunc Regem non casu, & fortuna, sed singulari Dei consilio, atque nutu, non humanitus, sed diuinitus, tibi obtigisse, & à supremo illo Cæli Imperatore, à potentissimo, misericordissimoque illo Regum Rege, ac dominorù Domino, ad te ex innumerabilibus istis tuis molestiis, ærumnis, calamitatibus atque periculis recreandam datum atq; donatum esse, id quod vel solum te ad illum ambabus, quod dicitur, vlnis amplectendum, & amore, honore, obseruantia, obediētiaque debita colendum meritò exstimulare debet.

Omnes

Omnes namque reges, ipsaque adeo regna & imperia non nisi diuina voluntate atque consilio constitui, ac fundari, & conuelli rursus, atque labefactari nemini profecto, nisi omnis non modò Christiani, sed etiam humani sensus, intelligentiæque experti dubium esse potest. Nam si, teste ipso Christo seruatore nostro, teste inquam locupletissimo, fidèque dignissimo, qui est ipsissima veritas, ne passerulus quidem, vilissima abiectissimæque auicula, passim (vnde etiam sic videtur dicta à Latinis) volitans atque obuia, sine Dei voluntate in terram cadit, si capilli quoque vilissima capitis nostri excrementa illi sunt numero, ita vt ne vnus quidem nisi illo volente defluat, atque pereat, si denique ipsæ sortes (quibus nihil magis videtur esse fortuitum) diuino numine reguntur, vt testis est Salomon Rex ille sapientissimus; quantò magis credendum est Reges, regna, atque imperia, quibus in hoc sæculo nihil est maius, nihil excelsius, nihil magnificentius, & augustius, non nisi singulari eiusdem Dei consilio, nutu, voluntate, & imperio in his terris cum constitui, augeri, stabiliri, & conseruari, tum tolli rursus, atque exterminari. Per me, inquit Sapientia ipsa, Pro. 8. hoc est, mea voluntate, consilio, atque ope, Reges regnant, & legum conditores iusta decernunt. Per me Principes imperant. Hinc apud Danielem. 5. Excelsus. i. Deus Opt. Max. in regno dominari, & cuicunque voluerit illud dare dicitur. Optimo igitur meritissimoque iure in Concilio Parisiensi, sub Ludouico Pio, & filio eius Lo-

thario, regibus Francorum, & imp. anno 829. post habitam disceptationem tandem iudicatum est, Reges regna tenere à Deo æterno potius quàm ab hominibus. Quid dicam quòd Ethnici quoque & prophani homines, vera licet fide, religionèque destituti, tamen duce & magistra natura, idē senserunt, iudicarunt, scripserunt. Quanto magis igitur nos Christiani id sentire, id iudicare, nobisque omnino persuadere debemus, qui sacris imbuti mysteriis, qui diuinis, usq; certissimis edocti oraculis, certo credimus, vniuersum hunc mūdum, omniāque tam minima, quàm maxima, Dei Opt. Max. volūtate, potestatéque ex nihilo producta perpetuò cōseruari & administrari. Vnde (vt ex innumeris pauca tantum quædam delibem) antiquissimi celeberrimique illi poëtæ Hesiodus & Homerus (qui Ethnicorum quasi Prophetæ, ac vitæ, morum, officiorumque omnium sapientissimi magistri extiterunt) Reges Διογενῆς, Ioue natos, Διογενῆς Iouis alumnos, Iouisque fatu procreatos appellarunt, quo quidem significarunt Regiam Maiestatem diuina prouidentia constitui, ac singulari eiusdem beneficio cōseruari. Reliqui quoque Poëtæ idem sentientes neminem existimarunt rectè regnare, aliisque imperare posse, nisi eum, cui Deus ipse regnum imperiūue destinasset: & idcirco reges ab ipso Deo precibus, sacrificiis, atque litationibus petendos esse censuerunt. Hinc Samnius, insignis nobilisque philosophus Ægyptius, non dubitauit Reges Dei tāquam supremi communis omnium mortalium

talium parentis adoptiuos, peculiarésque filios appellare. Is enim cum intellexisset Alexandrum illum Magnum Iouis Hammonis oraculo Iouis filium fuisse salutatum, admirantibus multis dixisse fertur, nequaquam id mirum sibi videri. Nam cum omnes mortales, Dei subiecti sint imperio, ac potestati, illius certe qui inter ipsos homines imperium, ac principatum obtinet, non humanum, sed diuinum potius munus, & officium esse existimandum. Addebat præterea Deum communem quidem & vniuersalē esse omnium hominum parentem, sed peculiari quadam ratione filios sibi adsciscere & adoptare eos, quibus regnandi, imperandique ius, ac potestatem committeret. Plura in hanc sententiam ex prophanis literarum monumentis proferri possent, quæ breuitatis causa prætermitto. Quamobrem tu quoque nunc, ô Gallia, pro nouo hoc tuo Rege tanquam diuino dono atque munere, Deo immortalī, perēni, & inexhausto bonorum omnium fonti, & auctori ingentes & immortales pro pietate tua meritissimè ages, & habebis gratias: Regēque ipsum tanquam tibi natum, tibi à Deo ipso donatum (quem idcirco verissimè à Deo datum cognominare possumus, quod Philippi Augusti Regis Gall. anno 1181. cognomen fuit) amore, obseruantiaque debita complecteris, & iustis, meritisque honoribus afficies. Nam præter oracula, legēque diuinam, præter legem naturæ, & communem illum omnium gentium consensum (qui legis naturalis atque diuinæ vim obtinet)

plurima profectò non obscura, & exilia, sed clara, & illustria Regiæ maiestatis, dignitatisque vestigia in illo cernuntur, clarissimæque refulgent, quæ quidem sunt veluti firmissima solidissimæque argumenta illum singulari quodam Dei fato (si ita loqui licet) hoc est decreto, atque consilio tibi, miseris præsertim perditisque istis tuis temporibus atque rebus datum esse, illumque regali hac dignitate, & amplitudine dignissimum summè tibi meritò amandum, colendum, & obseruandum esse arguunt, ac demonstrant.

Vnde autem potius exordiar, quàm à vitæ illius ortu, atque natalibus, quæ quidem planè regia, optimique auspicij, hunc verum esse Regē, tibi que verè natum, & ab ipso Deo esse destinatum declarant. Natus enim est à Christi in his terris salutifero ortu, anno M. D. LIII. quo anno grauissimum inter Henricum II. Regem tuum, & Carolum V. Imp. bellum gestum est: vnde inter horrentia Martis arma, inter ipsos armorum strepitus illum natum esse constat: quod ipsum bellicæ eius fortunæ, atque virtutis quoddam videtur fuisse præsagium. Quo etiam anno orbis terrarū spes maxima Eduardus sextus Anglorum Rex adolescēs extinctus est: cuius demortui in locum Dei clementia mox voluit nasci Henricum tuum.

Natus est Idibus Decembribus, siue 13. eius mensis die, qui quidem S. Lucie à veteribus fuit consecratus. O diem verè genialem, alnum, festiuium ac luculentum, non tam albo quàm aureo

reo n
in luc
Luci
perst
cis, il
sti op
An n
ce m
men
calig
cuius
paci
esse
tibi
sapi
virtu
tari
nis,
atque
mal
iisq
non
silio
tis n
fere
nat
ius
rici
ius
sup
hui
me

reo notandum lapillo, quo nouus hic tuus Rex in lucem hanc mortalem, non Iunonis cuiusdam Lucinæ siue Luciferæ (quam Ethnici olim superstitiosissimè coluerunt) sed æternæ illius lucis, illius stellæ Iacob, illius Solis iustitię. i. Christi ope & benignitate editus atq; susceptus fuit. An non quæso hic ipse natalis regis tui dies, luce meridiana clarius docet, magnóque est argumento, illum ad tetrâ, diram, tūestamque istam caliginem, qua adhuc obruta, oppressâque iacuiisti, depellendam, & ad alnam atque serenam pacis, libertatisq; lucem tibi adferendam natū esse? Itaque Rex hic tuus stellæ instar splendor tibi præluceat pietatis, religionis, fidei, iustitiæ, sapientiæ, fortitudinis, liberalitatis, & aliarum virtutū quasi luce & exemplo, quod meritò imitari debes. An non etiam quotidie lumen rationis, iudicii, ingenij, consilijque sui tibi porrigit, atque tendit, ad te ex istis plus quàm Cimmeriis malorum & calamitatum tenebris extrahēdam, iisq; liberandam? Quid (quod ipsum quoque non nisi singulari quadam Dei prouidētia, consilio, iudicioq; accidisse, nemo, credo, sanæ mentis negauerit) quod hoc eodem mensis die, quo serenissimus hic tuus rex Henricus III. olim natus est, Henricus dux Guisus, ac postridie eius diei frater eius Ludouicus Cardinalis Henrici III. Regis tui iussu, ac mandato contra cuius ipsi caput & regnum conspirant, merito supplicio Blæsis affecti sunt? Qui ambo Regi huic tuo, vinculo licet affinitatis coniuncti tamen infensi valdè, infestique fuerunt: ita ut eum

non regia solum dignitate excludere, sed etiam
vita ipsa priuare sapissime sint conati. Quinimo
diem hunc Regis tui natalem, totius simul Re-
gni, patriæque natalem, ac salutarem diem ve-
rissimè appellare possumus: cuius quidem splen-
dor tetras istas, quibus adhuc oppleta & obruta
fuissti, tenebras magis magisque discutit ac dis-
pellit, tibi que maiorem in dies pristinae salutis,
libertatis dignitatisque recuperandæ spem &
quasi lucem affert. Hoc enim die is natus, & ex
vteri latebris, tenebrisque in hanc lucem emer-
sit, cuius opera fideli atque strenua nunc Deus,
ad te penè mortuam, atque sepultam quodam-
modo recreandam, ac reficiendam, & ad pristi-
nam vitam, hoc est, salutem, dignitatè que re-
uocandam utitur..

Ortum præterea eius (cuius, vt verè sapien-
tèrque Cic. scripsit, partem patria sibi vendi-
cat) ad præcipuum & singulare Dei beneficium
esse referendum illud quoque non leui est argu-
mento, quòd ea signa illum antegressa, comita-
ta, & consecuta sunt, vt cum ad patriam non so-
lùm tuendam & conseruandam, sed etiam au-
gendam, imperiùmque eius latissimè propagā-
dum diuinitus tibi datum, & oblatum esse om-
nes sibi tunc persuaferint. Cùm enim primùm
hominibus nuntius allatus est, matrem illius
principem & heroinam clarissimam, filium ma-
rem peperisse, tanta passim lætitia consecuta est,
vt multi præ gaudio vim lachrymarum profun-
derent, & incredibiliter exultarent, illùmque non
vt infantem fœliciter exortū faustis ominibus,
sed

sed ut Regem iam spectatum latis acclamationibus prosequerentur. Omnes tunc in felici & auspicio hoc eius ortu diuinum beneficium agnouerant, & spem magnam conceperant, fore, ut cum ad maturam aetatem perueniret, maiorum suorum virtutes, & egregia facta ingenio, industria, pietate, animi magnitudine, & cōtentione non aquaret solum, sed etiam superaret. Quam quidem optimam hominum spem expectationemque illum non modo tueri feliciter, sed etiam superare ac vincere videmus, & experimur quotidie. Nec verò tempus tantum, sed etiam locus, solumque eius natale, optimi ut nominis, ita ominis quoque videtur esse, atque auspicii magnæque felicitatis, ac dignitatis præfagium quoddam, & auguriū. Natus enim est in Bearnia, in Pau, loco ditionis eius munitissimo atque celebri, ubi Parlamentum totius provinciae quasi oraculum floret. Nonne igitur hoc ipso Deus tibi significare quodammodo voluit & ipsum beatum fore atque felicem, & totam patriam suam ex miserrimo, & afflictissimo statu (siquidem cum sequi, eique obsequi voluerit) in beatissimum statum esse vindicaturum? Natiuitatem porro eius (quam verè regiam & imperatoriam genesim appellare licet) consecutus fuit aliquanto post Baptismus, qui quasi alter Christiani hominis dies natalis, atque vitalis merito censeretur debet.

In Baptismo fuit impositum ei nomen verè Regium, Imperatorium, & Augustum, maximæ cum virtutis, tum felicitatis omne, & augurium,

quo & Rex focer eius & agnatus, & Rex Nauaræ auus eius maternus fuit insignitus.

Non autem ignoras (ne leuis hæc fortasse videantur esse momenti atque ponderis) quam diligens olim & religiosa veterū, apud omnes fere gentes, etiam apud Dei populum, in nominibus imponendis cura & obseruatio fuerit.

Non igitur superstitiosa & anilis, vel curiosa, & inanis nominum, in magnæ præsertim dignitatis, claræ, & illustis fortunæ, certisque hominibus obseruatio, & animaduersio iudicanda est: cum non temerè & imprudenter, sed summo consilio, ratione, atque iudicio illis plerumque fuerint imposita: vt scilicet essent vel rerum præteritarum hoc est virtutum rerūque præclarè laudabiliterque gestarum monumenta: vel rerum futurarum, vt fœlicitatis quasi auguria, atq; omina, vel officij incitamenta & calcaria. Christianos autem in primis in nominibus partim imponendis, partim iis, quæ imposita sunt, considerandis, ac perpendendis non parum operæ, atque studij decet ponere. Nomina namq; nostra (vt piè, religiosèque nonnulli monent) nobis in sacrosancto Baptismo indita, diuini, ac cœlestis illius Lauacri memoriam nobis assiduè refricare debent, vt nimirum meminerimus nos sanctissimo pretiosissimòque Domini sanguine impurissimis nostrorum sanguinum id est peccatorum sordibus ablutos, & repurgatos, & in album Ecclesiæ ascriptos, nomen Christo summo nostro Imperatori dedisse, votūque nuntupasse, nos mundo, satanæ, nobismet ipsis renuntiatiuros.

nuntiatiuros. Qua de causa omni nobis studio
 enitendum est, vt per totum vitæ nostræ curri-
 culum cœlestē hanc nostrā sanctā religiosā-
 que inscriptionem, vocationem, sponsionem,
 atque votum vera seriāque pœnitentia sancia-
 mus, vitæ, morūque sanctitate stabiliamus, ac
 confirmemus. Constat etiam ex antiquissima,
 & communi nō Iudeorum tantū, sed reliqua-
 rum quoq; gentium ferē omnium consuetudi-
 ne, paterna, & auita nomina plærumque liberis
 imponi fuisse solita, quæ illis paternæ, auitæ, &
 maiorum virtutis quasi *μνημόσυνα* id est moni-
 menta simul & incitamenta essent. Quod in hoc
 quoque tuo Rege obseruatum fuit. Legimus
 præterea regum & imperatorum apud singulas
 gentes certa quædam & peculiaria fuisse nomi-
 na, quæ quidem aliis vsurpare non licebat. Sed
 vt omittamus vetusta, & aliena Regū exempla,
 Regum Gallicorum & Francicorū nomina pri-
 sca quidem & antiqua fuerunt Pharamundi,
 Merouei, Childerici, Chlodouei, Childeberti,
 Chilperici, Clotarij, Dagoberti, Theodorici,
 Caroli, Martelli, Pipini, recentiora autem Caro-
 li, Ludouici, Philippi, Francisci, Henrici.

Sic igitur Regis tui nomen est Henricus, no-
 men verē regium, nomen vetus regum Galliæ,
 regiæque familiæ proprium, quod ei non casu,
 & fortuitò, sed singulari quodam Dei consilio
 parentum voluntate statim ab ortu in Baptismo
 fuit inditum, tanquam optimi sanctissimique o-
 minis nomen. Tres etenim huius nominis Re-
 ges regno huic præfuisse constat, quorum primū

quidem summam lenitatem & māsuetudinem, quæ in annalibus tuis historiis celebratur: secundi verò (qui huius noui Regis tui socer & agnatus fuit) bellicam fortitudinem: tertij denique (cui nunc successit) singularem eloquentiam sedulo sceleritèrque imitatur Henricus hic IIII. eius nominis Rex tuus. Iam verò si Germanam nominis huius origine Germanici vim, notationemque spectes, compositū est, vel ex Her (quod Græcis, Latinis, & Germanis dominum, virumque strenuum sonat) vel ex Chen Hebræo, quod gratiam: vel ex Er, quod Germanis honorē sonat (vnde Itali Erricum pronunciant) vel denique ex Hand. i. manu: vel Hoch. i. alto, excelsio: vel heim. i. domo: & Rich, quod Gallica, Italica, Germanica, adde & Hebræa lingua diuitem, & opulentum designat.

Henrici itaque nomen gratiam, honorē, dominium, imperium, opes, potentiam, robur designat: nempe,

Conueniunt fatis nomina saepe suis.

Cui igitur dubium quin hoc quoque Regis tui nomen illius fatis atque fortunæ, virtuti, sceleritèrque optimè conueniat, quem gratia, honoribus, opibus, robore corporis atque animi, imperio denique florentissimum esse constat? Denique quid portendat nescio, quòd Germaniæ quoque sororis nostræ Imperatoribus nomen hoc familiare fuisse manifestum est.

Alterum autem gentile nomen familiæ eius antiquissimæ & regalis, Burbonij naturæ illius atque moribus etiam congruum admodum est,

&

& consentaneum. Nam quid Bourbon aliud sonat, quàm purum (quæ vox ab Hebræa bor siue bur est deriuata) atque bonum. Talem autem hunc esse suum Regem reipsa iam multos per annos experta es, nempe integrum vitæ, scelestisque purum, & natura bonum atque benignum, quem Græci καλον ἄσθον vocât. In hoc ipsum nomen, quidam ingeniosus gentis meæ poëta non ineptè, meo iudicio, his versibus lussit.

BORBONIVS ducat qua Rex ab origine nomen
Quæris? Eum FORT-BON *Gallia tota vocat.*
Omen amant Latia Musæ, FORTEMQ. BONVMQ.

Imò vocant PVRVM nomine reque BONVM.
At mihi (dignetur modò Rex hoc sumere pour bô)

BORBONIVS fuerit nil nisi PORRO BONVS.

Tertium nomen est nota & titulus materni regni, vnde Rex Nauarrenus, siue Nauarreus dicitur. Vere autem sic quoque appellatur, propterea quòd gnauus, & industrius egregiam adhuc, fidelem, & foelicem in Gallia tuenda, & cõseruanda operam nauauit, & in posterum quoque nauare est paratissimus. Ergo vel ipsa hæc noui tui Regis regia plane, imperatoria, augusta, magnifica, splendidaque nomina, regiæ illius cùm virtutis, tum splendoris, & amplitudinis notæ, atque symbola foelicissima, auspicaçissimaque omnia, te ad optima quæque de ipso sperandum, & ad omnia iusta debitaque ei officia, obsequiaque præstandum inuitare, & allicere debent. Erunt quoque deinceps ne dubita,

eadem nomina huic tuo regi ad maiorum & prædecessorum virtutem imitandam, & officio suo probè fungendum stimuli, & aculei acerrimi.

Iam verò in natalibus illustrium præsertim hominum, non solum tempus, locus, Baptismus, nomina, signa, quæ ortum illorum vel antecedere, vel comitari, vel consequi solent, hominū denique vota, sermones, gratulationes, gaudia (quæ in hoc tuo Rege regalis dignitatis plenissima reperiuntur omnia) sed parentes quoque in primis, genus, atque familia, vnde procreati illi fuerūt, atque profeminati, diligenter cōsideranda. Hic igitur Rex tuus, vt notum est omnibus, ambos parentes habuit verè regios, ex regali genere vtrinque oriundos, regiisq; virtutibus ornatos, de quibus ego si pro dignitate vellem dicere, tempus me prius deficeret, quàm oratio. Matrimonium hi fœlicissimis auspiciis contraxerunt, nuptiāsque regali pompa, atque splendore magnificas celebrarunt anno **X L V I I I**, mense Octobri, in amplo, celebrique prouinciæ Lugdunensis oppidq, atque Castro Molinensi, quod vulgò *Moulins en Bourbonnois* vocatur.

Fuit autem hic annus partim duplici Henrici **I I**. Regis tui & in Taurinum Pedemontij metropolim, & in urbem Lugdunēsiū introitu magnifico ac triumphali: partim Burdegalensi & Aquitanica, nec non Parisinorum scholasticorum seditione valde insignis: quæ vtraque Henricis Regis summa prudentia tandem compressa, atque sedata fuit. Anno post (nēpe **X L I X**) mense

menſe Decembri, Margarita Valeſia Nauarra Regina, (Franciſci I. ſoror) Regis tui auia materna, ſcœmina heroïna, præter ſexum apprime literata, omnique virtutum genere ornata, vitam cum morte commutauit.

Princeps porro hic magnanimus Regis tui pater Regis Henrici I. in Piccardia legatus anno **x l i i.** in ſeptentrionali Belgicæ parte Terouhanenſem arcem nobiliſſimam cepit, & ſolœquauit, Flandros vnâ cum Comite Reutio ſuo ductore fudit, atque fugauit. Filerium oppidulum, aliâque Caſtella in Artoſienſibus cepit, multâque alia bellicæ fortitudinis documenta dedit. Poſtea abdicata Piccardia, Aquitaniæ gubernator factus eſt anno 1553. Octob. 21. die. Tâdê anno **L x.** ſub nomine primi principis, Regis & fratrum Auguſtiſſimorum, atque adeo totius Regni cura, & adminiſtratio (quam Regentiam vulgò vocant) vt proximi agnati in celeberrimo regni Ordinum conuentu ei delata eſt, atque ita totius regni conſenſu, auctoritate & decreto apud omnes Francos prærogatiuam primi principis habuit, vnde cõſtat liquido ad hunc tuum Regem filium eius primogenitum & vnicum ius Regni pertinere.

Iam verò mater illius Ioanna, Henrici Albrechtij, Regis Nauarræ filia regni hæres ac Franciſci I. Regis tui ex Margarita ſorore neptis: Regina, & heroïna præſtantiſſima, tot tantisque virtutibus floruit, vt nullius tantum ſit vel ingenij lumen, vel rationis flumen, nullius tanta diſcendi, ſcribendique vis, atque copia, quàm illas nō dicam

exornare, & illustrare, sed enarrare, ac percensere possit. Fœmina fuit, non nomine tantum, sed re ipsa, atque moribus, verè Ioanna (quod Latine gratiosam sonat) hoc est pia, casta, religiosa, humana, liberalis, atque benigna. verè itaque illa non huius tantum tui Regis, sed etiam totius Regni, omnis disciplinæ, iustitiæ, iudicij, atque religionis, Scholæ, & Ecclesiæ, omnium studiorum, literarum, atque artium honestarum, & liberalium, quandiu vixit, quasi mater quædam, atque nutrix alma & fidelis extitit, malorum, dolorum, molestiarum, ærumnarum, periculorumque, quæ ei toto ferè vitæ curriculo fuerunt subeunda, patientissima. Has illius virtutes atque laudes nemo est tam invidus, tam audax & impudens, tam maleuolus, & inimicus, qui negare auserit.

Ex his ergo ille parentibus, principibus, & regibus clarissimis cum sit procreatus, dubium nemini esse debet, quin quemadmodum adhuc paternæ maternæque virtutis, laudis, atque gloriæ strenuum sese imitatore præbuit, in posterum quoque eorundem exemplo, & imitatione nullam de toto regno, patriæque optimè promerendi occasionem sit prætermisurus. Quod si verò à parentibus ascendere, & genus eius cum paternum, tum maternum paulò altius repetere volumus, omnia sine dubio regalis dignitatis, virtutis, atque gloriæ plenissima reperientur. Vtraque enim eius prosapia est antiqua, regia, splendida, augusta, magnifica: & quoddam aliquot iam sæculis multorum vtriusque sexus du-

cum,

cum, principum, comitū, atque regum præstantissimorum, de patria, totoque ferè orbe Christiano optimè meritorum quasi seminarium. Ac genus quidem ille paternum non minùs atque Rex tuus recens mortuus à Ludouico I x. illo, cum aliis virtutibus, tum vitæ, morūque sanctitate clarissimo, trahit: qui idcirco Sancti cognomen adeptus est. Ab illo itaque genarcha & communi stipite seu progenitore sanctissimo, à regia inquam, fœlici, sanctaque illa stirpe familiæ duæ familiarum omnium tuarum, imò familiarū orbis totius Christiani omnium præstantissimæ nobilissimæque tanquam duæ sorores germanæ fuerunt propagatæ. Vna est Valesia, quæ à Ludouici illius Sancti filio primogenito (cui Philippi III. nomen Audacis siue Animosi cognomen fuit) orta annos amplius ccc. per continuam legitimamque successionem Franciæ atq; Galliæ tuæ regnum obtinuit, nunc immani (ô facinus horrendum ingens) monachi illius Dementis fraude atque scelere subito est extincta.

Altera verò Borbonia gens ab altero Ludouici illius Sanctissimi filio minore nata, ac secundo genito, Roberto nimirum Comite Clarimontano deriuata, & ad nostra vsque tempora fœlicissime propagata est, vnde hic tuus rex prodit, iustus idcirco, legitimusque regni Gallici hæres. Nam stirpe atque familia Valesia hoc est posteritate Philippi Regis, & fratris maioris, quæ adhuc regni huius imperium tenuit, sublata, & extincta, nunc Borbonia tanquam iusta,

legitimâque ei heres succedit. Ita ergo ex scælici, sancto, regiôque illo stemmate duo hi quasi aurei florentesque rami, hoc est, familia Valesia & Borbonia, per duos fratres germanos enati, ac propagati fuerunt. Vel (si alio simili vti libet) ex illo tanquam sanctissimo fonte duæ hæ familiæ veluti riuuli quidam, seu potius flumina simul, atque lumina clarissima promanarunt.

Quod si altius vtriusque familiæ serenissimæ originem repetere volumus, vtrunque constat ab origine Francicam, Regiam, minimèque peregrinam esse, ex tribus Regiis familiis profectam quæ regno huic tuo, quod iam ferè M. C. C. annos durauit, ex ordine præfuerunt. Constat enim S. illum Ludouicum I. & tritauium eius Henricum I. qui Capeti nepos fuit, Caroli illius magni agnatos fuisse, hoc est continua serie & recta linea masculina non minus à Pharamundo descendisse Reges illos tuos posteriores Capetanos, quam superiores Carolingos, & illis priores Merouingos. Neque verò vlla vspiam familiâ etiam fuit, quæ tandiù populi cuiusquam imperio præfuerit. Labitur enim iam annus ducentessimus ferè atque millesimus ex quo ad V. Varamundum illum (à quo Henricus iste tuus I. V. est in perpetua & nusquam interrupta androgencia) rerum summam & potestatem detulerunt Franci tui liberrimi. Nunc ergo postquam cum Henrico vnâ tuo III. omnes interciderunt Valesij, Monachi illius parricidio, longû illis atque æternum, vt ita loquar, Vale dicere cogeris, & Borbonios Anere plurimum & perpetuum

petuum saluere dicas æquum est, qui tanquam illorum fratres germani & agnati proximi iuxta legem tuam fundamentalem & consuetudinem sacrosanctam illis in Regno tuo nunc iure succedunt. Hinc ergo liquido constat quanta sit familiæ Borboniæ antiquitas, dignitas, nobilitas, atque splendor. Illa namque primum origine est antiquissima, & tota planè regalis, cum ex prima & vltima tua familia regia Pharamundi scilicet & Capeti profecta, eiusdè sit cum regno tuo antiquitatis & originis: ita hanc familiam solam & vnicam vere proprièque Francicam, & Gallicam appellare possis, ac omnino agnoscere debeas, tanquam illam quæ vna cum Regno tuo nata sit, cuiusque gentiles & agnati Merouingi & Carolingi Reges tui intermediij omnino omnes fuerint. Deinde virtutū rerūque præclare gestarum, ac victoriarum gloria, (vt tui domestici atque etiam externi plurimi annales, & historiæ testantur) clarissima, tum vitæ, naturæ, morūque Pietate, ac Bonitate (vnde merito Borbonia dicta) præstantissima. Denique vt regum & principum antiquissimorum est propago, atque soboles, ita multorum regum, atque principum parens est, atque procreatrix.

Quum autem Rex hic tuus à Ludouico Sancto, communi illo Valesiorum & Borboniorum genarcha vndecimus sit: gradus illos quæso ne tepigeat paulò mecum vnà hic recognoscere. Ac de patre quidè illius, Antonio serenissimo Rege Nauarræ iam dictum est, qui in obsidione

Rothomagenſi globulo tormentario iſtus anno M. D. L X I I. die 17. menſis Nouemb. diem ſuum obiit.

Auus autem eius fuit (vt non es neſcia) Carolus dux Vendocinus, Par Franciæ, Piccardiæ gubernator: qui Franciſcam Alenconiam Renati ducis Alenconij filiam anno M. D. X I I I. in vxorem duxit, (quæ nuptiæ Caſtelloduni fuerunt celebratæ) qui obiit anno M. D. X X X V I I. Is præfuit Regio Conſilio quo res Galliæ adminiſtrabantur tum quum Franciſcus I. captiuus in Hiſpania detineretur: & eius prudētia & fidelitate Regnum Galliæ fuiſſe conſeruatum teſtatur Belleyus qui temporibus illis floruit. Huius Ducis Vēdocini ſoror Antonia Borbonia nupſit Claudio Lotharingico Guiſij & Aumalij Comiti, (vnde Guiſij ceteri deſcenderunt) quæ nuptiæ ſimiliter anno M. D. X I I I. Lutetiæ Pariſiorum fuerunt celebratæ: Hinc conſtat quanta ſit inter Regem tuum, & Guiſios cognationis vinculum. vtinam qui ſuperſunt ex Guiſiis ſint memores tanti honoris in maiores ſuos collati. Hunc ipſum Carolum Borbonium (quod hīc ſilentio præterire non poſſum) Ludouicus X I. Rex Gal. vnā cum Longouillano prorege Aquitaniæ, cum valido exercitu auxilio miſit Ioāni Regi Nauarræ, Regis huius tui proauo materno: ad eum regni Nauarreni partem, quam Ferdinandus V. Rex Arragoniæ, pontificiæ excommunicationis prætextu, vi atque iniuria occuparat, recuperandam. Atque ita mira Dei prouidentia Regis huius tui auus paternus, eiufdem
pro

proauo materno, Regis Galliarum iussu, opem, auxiliūque tulit.

Ex hoc autem aui, atque auiæ eius fœlici, & auspicato matrimonio nati sunt filij, nēpe Antonius primogenitus, Regis tui pater: Frāciscus Anguiāni Comes secundo genitus, cuius ductu, & auspiciis, memorabilis illa ad Serizollam victoria tibi parta est, qui sine liberis obiit: Carolus tertio genitus, Cardinalis Borbonius, & Archiepiscopus Rotomagensis, Regis tui patruus, Ioannes quintogenitus, & Ludouicus Princeps Condæus, fortissimus heros, patriæque propugnator, anno M. D. LXIX. 13. Martij ad Iarnacum fortiter pugnans, primū captus, deinde contra datam fidem occisus, 14. post se reliquit filios. Hi sunt Henricus Princeps Condæus primogenitus (qui veneno impie nefariæque sublatu est e medio, relicto filio posthumo) Franciscus Princeps Contiacus, Carolus Cardinalis Vindocinus, & Carolus Sueffonium Comes: qui 111. posteriores nunc omnes fortissimè pro Regis, ac totius patriæ salute pugnāt, quibus Deus contra hostium suorum vim atque insidias & artes prudentiam & simul diuturnam valetudinis vitæque vsuram largiatur. Et hæc de Regis tui auo, & eius filiis, ac nepotibus.

Proauus Regis tui fuit Franciscus Comes Vēdocinus, qui in matrimonio habuit Mariam Luxemburgiam, Ludouici Franciæ Connestabillis filiam, vel, vt alij volunt, neptim. Abauus porrò tui Regis fuit Ioannes Borbonius, Comes Vendocinus, princeps magnæ gloriæ, ac

virtutum, rerumque gestarum laude florentissimus. Fuit enim vnus ex heroum illorum numero, qui sub Carolo v i i. patriæ protectores, & Anglorum flagella fuerunt appellati. Eripuit ex Anglorum manibus Frösacum, vxorem habuit Isabellam de Bellavalle. Nō minor, immo maior etiam fuit atavi illius virtus, atque gloria. Is fuit Ludouicus Borbonius, Comes Vēdocinus, qui supremus fuit Franciæ magister, quem veteres aulæ præfectum, & Comitē Palatinum vocabant. Cūque fuisset gubernator prouinciæ Syluaneſtensis, interfuit sanguinolentæ illi pugne Azincurtianæ anno M. cccc xv. imperante Carolo v i. in qua vnā cum aliis principibus captus fuit ab Anglis. Deinde egregiā fortēque operam Carolo v i. contra Anglos & Burgundos nauauit anno M. cccc xviii. Comitatus enim est Ioannam illam Arēam virginem Lotharingam, & pro sua virili patriam tutatus est, Anglos inde maximis laboribus, atque periculis conatus eiicere. Vxor eius fuit Ioanna Lauallensis, ipse obiit anno 1446.

Tritauus Regis tui Ioannes Borbonius, Marchiæ Comes, qui vnicus Iacobi Borbonij (de quo paulo post) filius fuit. Duxit in vxorem Catharinam Vendocinensem & Cessleronensem Comitissam & hæredem. Tritaui pater fuit Iacobus Borbonius, Marchiæ Comes, Ludouici Ducis Borbonij filius minor natu. Franciæ equitū magister occubuit fortiter pro patria pugnans, vnā cum primogenito fratre Petro Borbonio Duce in nobili illo prælio Pietauici anno 1356.

in quo captus est Ioannes Rex cum fratre Philippo. Vxor eius fuit Ioanna de S. Paulo.

Tritauus auus fuit Ludouicus F. Roberti Franci, primus Dux Borbonius, Mar & Camerarius Franciæ, dictus Magnus. Intertuit pugna illi acerrimæ Philippi vi, in Flandria ad Montem Casselli, in qua occubuerunt Flandrorum rebellium xx. millia. Vxor eius fuit Maria Hannonia: ipse obiit anno 1341. Postremo tritauus proauus fuit Robertus Francicus Comes Clarimontij & Charlesij, Ludouici S. ex Margarita filia Comitis Prouinciæ Reimūdi filius, lineæ & stirpis Borboniæ genarcha frater Regis Philippi iii. Audacis minor natus, qui lineæ seu stirpis Valensie iam intermortuæ genarcha extitit. In uxorem duxit Robertus Beatricem Archambaldi Borbonij Comitis filiā, hæredem & dominam Comitatus Borbonij, ex qua suscepit Ludouicum, qui matri in Comitatu Roehenio, & patri successit in Claromontano Comitatu, qua ratione etiam Comes Marchiæ fuit. Dominium illud Borbonij tam amplum fuit, ut à Philippo Valesio regnum incūte anno 1327. titulo Ducatus augeretur. Decessit Robertus anno 1317. sepultus in Iacobitarum monasterio, Parisiis, in medio Capellæ Borboniæ.

Atque hæc quidem est, quam breuiter perstringere volui, Regis tui serenissimi ad Ludouicum vsque Sanctum deducta genealogia, valde gloriosa, clara, & illustis, quæ vel sola hunc tibi Regem vehementer debet commendare. Est etenim veluti Catena quædam aurea, iuris,

religione, sanctitate, sapientia, fortitudine, iustitia, & aliis præclaris virtutibus, ceu annulis, monilibus, atque gemmis pretiosissimis disiuncta: ac proinde cum virtutum nobilissimarum, quibus maiores eius fuerunt ornati, tum iustæ, legitimæq; eius in hoc regno Gallico successionis testis est locupletissima. Nimis autem longum & operosum foret, de maiorum eius virtutibus, factis atque præclaris meritis de patria verba facere, quæ cuius vel paululum in historiis tuis versato sunt notissima.

Verum quoniã Ludouici illius IX. Francorum Regis (qui vtriusque familiæ, & Valefiæ iam intermortuæ, & Borboniæ adhuc florentis, & in regno succedentis quasi stirps communis atque Caput extitit) cum virtus, tum fortuna magnam cum hoc tuo Rege affinitatem & cognationem habet, non erit, vt spero, tibi molestum de eo quædam à me dici. Nam quemadmodum Ludouicus ille Sanctus natus anno 1213. patri defuncto anno M. D. XXVI. (quem nonnulli veneno extinctum fuisse volūt) successit tertio decimo ætatis anno: ita Rextuus annos nondum X. natus patre serenissimo Rege Nauarræ orbatus est, anno salutis M. D. LXII. Deinde vt Ludouicus Sanctus partim intestinas Regni turbas, seditiones, motus, tumultus & conspirationes aliquot ciuitatum, ac principum rebellium, vt Comitum Tholosæ, Comitum Campaniæ, Comitum de Dreux, Comitum de S. Paulo, & Comitum Britanniæ (quæ statim ab initio Regni eius existerunt) mira felicitate sedauit, & composuit:

partim

partim externas Anglorum impressiones, & impetus fregit, atque repressit: ita Rex tuus adhuc partim in intestinis atque domesticis regni sui turbis, & conspirationibus, (quæ illum itatim exceperunt) sedandis, partim in externorum hostium copiis fugandis atque frangendis non fortis solum atque strenuus, verum etiâ mirum in modum felix adhuc Dei beneficio ac fortunatus fuit. Adhæc ut Ludouicus à pueris ipsa necessitate cogente rei militari deditus fuit: ita Regi tuo Castra ab ipeunte ætate pro ludo fuerunt, non in umbra quiete & otio, sed in sole, in pulvere, atque acie educatus fuit, vnde maximâ rei militaris peritiâ est consecutus. Præterea ut Ludouicus Sanctus iustitiâ, iura, atque iudicia plane corrupta instaurauit: ita Regi huic tuo nihil prius est, & antiquius, nihilque magis studet, quàm ut iudicia ferè omnino consueprata pristinæ integritatis, dignitatique restituâtur. Quem admodum Ludouicus Sanctus magistratuum ambitum, & sordes omnibus modis repressit, & honores, atque munera publica venalia esse noluit, grauitérque prohibuit: ita tuus hic Rex munus officiorumque, cum ciuiliû, tum Ecclesiasticorum turpissimas nûdinationes, atque negotiationes odit, execratur, atque vetat grauissimè, omnemque dat operam, ut illa dignissimis quibusque maximè aptis, & idoneis, optimèque de patria meritis mandentur, ac committantur. Item ut Ludouicus Sanctus parasitos, histriones, mimos, ludiones, homines ignauos, inutiles, luxu, luxuriâque perditos, ex aula sua

eiecit: Ita tuus hic Rex perniciosorū huiusmodi
 hominum turbam procul à familiaritate, con-
 suetudine, conspectūque suo remouet, ac repel-
 lit. S. Ludouicus à blasphemis, & deierationi-
 bus abhorrens Dei nomen in vanum assumen-
 tibus cauterium in fronte inuri curauit: sic Rex
 tuus blasphemum nominis diuini abusum ne-
 quaquam terre, ac tolerare potest. Præterea vt
 Ludouicus S. literarū, ituciorūque libera-
 lium paternam curam gessit, Scholam Parisio-
 rum, quæ propter motas iniurias, & cædes scho-
 lasticis illatas, dilabebat, restituit, Sorbōnæ col-
 legium instituit: quæ malam nunc Regi tuo, &
 Regi etiam demortuo: (illius nepotibus) reddit
 gratiam, & plures alias scholas fundauit, ita Rex
 tuus literarū disciplinarūq; liberalium, scho-
 larum, & Academiarum fidelissimum adhuc se-
 se patrem atque patronum præbuit. Itē quem-
 admodum Ludouicus S. varia, & aduersa tortu-
 na ab ineunte ætate diuexatus fuit: ita Rex tuus
 ab incunabulis adhuc vsque tempus plurimis
 periculis fuit expositus, maximis grauissimisque
 curis, sollicitudinibus, ærumnis, molestiis, la-
 boribus, atque doloribus, iactatus, ex quibus
 Deus illum mirifice adhuc cum omnium admi-
 ratione seu stupore potius eripuit, & liberauit.
 Ludouicus S. Venetis vsus est amicis, & opitula-
 toribus fidelissimis: ita Regi tuo Serenissimo
 maxima intercedit cum antiquissima, amplissi-
 maq; illa Repub. (quam omnium ciuitatum, &
 rerūpub. liberarem reginam, atque dominam
 appellare possumus) amicitia, quæ etiam prima
 (quod

(quod optimi auspicii locū duco) inter omnes orbis christiani respubl. atque principes ei honorificentissime gratulata est. Ludouicus S. graues exactiones pecuniarum prohibuit, & repressit, suspectam habēs Rom. curiæ auaritiā. Vnde legati quidam Pontificij, qui pecuniæ extergno tuo corrogandæ, emendicandæ & exportandæ causa missi fuerant, vacui cum ludibrio, risu, atque sannis ex Regno ad Papam redierūt: id quod in Anglia quoque illis accidit. Sic Rex tuus nullis iniquis, & iniustis tributis, vectigalibus, pecuniarūque exactionibus, populum suum vel ab Ecclesiasticis, vel à politicis premi, & aggrauari patitur, totūque in eo est, vt omnibus illis oneribus intolerabilibus populus omnino leuetur. Ludouicus S. precibus sacris sine cessatione fere, & intermissione operam dedit, ac in primis in morbo suo lethali morti vicinus assiduas & ardentes ad Deum preces fuisse, & huius modi precandi formam saepe iterasse dicitur: Fac nos, quesumus Domine, prospera mūdi despicere, & nulla eius aduersa reformidare. Deprecatus etiā est assidue, & ardentem pro populi salute hoc modo: Esto Domine plebis tuæ sanctificator, & custos. Et cum iam ad vitæ huius mortalis finem appropinquasset, sublatis in cælum oculis sic orasse fertur: Introibo in domum tuam Domine, & confitebor nomini tuo. His dictis in Domino obdormiuit. Quæ Matthæus Parisius historiæ Anglicæ scriptor literis Regis Nauarræ ad Dominum Tusculanum scriptis confirmat. Regis verò tui quā assiduū,

& indefessum quámque flagrans sit Deum pro sua, & totius populi, atque regni salute, deprecandi ac inuocandi, gratiásque illi pro omnibus acceptis beneficiis agendi studium: nemo, qui vel à limine aulæ eius salutauit, inficiari potest.

Postremo Ludouicus S. admirandæ fuit pietatis, ac probitatis, vnde Sæctus cognominatus: Ita Rex hic tuus mirifica vitæ, morumque probitate, & sanctitate, toti regno præluet, ita vt admirationi sit omnibus, & mirabilia mundi reuera dici queat, non minus atque excellentis. ille olim Imp. Otto III.

Ex his igitur adhuc commemoratis patet, Regem tuum Ludouico illi S. progenitori suo non agnatione tantum, sanguinisque coniunctione, sed etiam virtutum studiorumque similitudine, esse coniunctissimum, ac proinde illum tanquam verum, non solum Regni, sed etiam vitæ successorem, tibi amandum summè & obseruandum esse. Quocirca non in hunc tantum Regem tuum præsentem, qui nunc Regni gubernacula tenet, atque tractat, sed etiam in omnes eius maiores, in omnes, inquam, Reges, & principes tuos Francicos, & Gallicos, qui huic Regno præfuerunt, ac plurima in te beneficia contulerunt, iniurij, ingrati, & impij sunt vindicandi, qui huic iusto, legitimoque suo & filio, & hæredi, & successori, & virtutum laudumque non imitatori solum, sed etiam amplificatori fidelissimo resistunt, repugnant, aduersantur, iustum & paternum eius imperium detrectant, eius non dignitatem solum regiam (qua multis nomi-

nominibus est dignissimus) sed vitam quoque ipsam eripere conantur. Hi profectò Dei, hominumque omnium, in quibus vel gutta est sanæ mentis, iudicio, graui & inexprabili sese obligât atque obstringunt scelere.

Ac gens quidem hæc illius paterna nō à Ludouico solum illo Sancto, sed à Capeto etiam & Pharamundo denique Regibus tuis, gentium vna omnino omnium quæ supersunt hodie nobilissima perpetua serie, & linea masculina descendens, argumentum est apodicticum, vt ita loquar, firmum, atque solidum, Regnum hoc tuum Gallicum, iuxta perpetuum Regni huius ius, & consuetudinem, ad illum pertinere, illi deberi, ita vt non nisi per summum nephas, atque iniuriam (quod Deus auertat, atque prohibeat) ei eripi possit. Nam neminem latet, tuum Regnum Franciæ non esse electiuum, nō etiam hæreditarium simpliciter, & patrimoniale, aut feudale, sed successiuum, & regiæ familiæ proprium, ad quod eius familiæ proximus semper demortui agnatus, quocunque ille gradu sit, vocatur, successione & subrogatione perpetua, seruato in infinitum illo agnationis ordine. Itaque Baldus Perusinus, Iureconsultus suæ ætatis celeberrimus, quasi præuidens, atque præfagiens id, quod nuper accidit, ducentis ferè antè annis disertè affirmauit, deficiente regia familia (scilicet Valesia) regnum hoc Borboniæ deberi, ita vt si quis illi vel millesimo gradu agnatus, existat succedat, is iustus Rex sit appellandus. Idem senserunt etiam alij, viri doctissimi, vt Ioannes

de Terra Rubea, Boëtius, & Iacobinus de Sancto Georgio, qui de Regni huius successione scripserunt.

Sed nolo, nec etiam opus est, Sereniss. tui Regis in successione iura certissima pluribus perscrui, cum illa nota sint omnibus, qui non manifesta veritati claudere volunt oculos: ita ut illi qui his repugnant & aduersantur, iniustitiæ nomine & criminis etiam læsæ maiestatis merito sint accusandi.

Iam verò quantum ad familiam maternam, quæ est Albretia, attinet, illâ quoque antiquiss. constat esse, atque regiam: ex qua tanquam ex equo Troiano aliquot Reges, Reginas, ac principes illustrissimos prodissc historia tuæ testantur. Ex iisdem quoque constat, iam ab aliquot sæculis Regum Franciæ & Nauarræ summam fuisse & arctissimam non animorum tantum, ac voluntatum, sed etiam affinitatis atque sanguinis coniunctionem. Vnde quatuor olim etiam Francorum simul, & Nauarrorum reges fuisse legimus, id quod nunc quoque in Rege tuo accidisse vides, qui optimo, iustissimoque iure vtrumque simul regnum obtinet, quod singulari Dei consilio, atque beneficio acceptum est referendum.

Theobaldus, ut pauca quædam hîc attingam, ex Campaniæ comite Rex Nauarræ factus, Ludouico S. socero suo. Comitem sese, atque socium fidelissimum ad expeditionem, & bellum sacrum præbuit, in quo post Soceri obitum vnâ eum eius filio Tunetum expugnauit, ac inde rediens

diens paulò post ad superos in reditu migravit. Philippus I v. Philippi III. & re, & cognomine Audacis, siue Animosi, Regis tui filius, Ludouici Snepos, vnà cū tribus filiis Rex similiter Franciæ Nauarręque fuit, multis laudibus dignissimus, à quo per gradus XI. nunquam interrupto successionis ordine Regni illius hæreditas ad Ioannam Reginam Regis tui matrem peruenit.

Sed omittis antiquioribus, hinc præcipue Ioannis Regis Nauarrorum (qui Regis tui proavus fuit maternus) mentio est facienda, quā præsertim illa historia nostræ huic ætati, seu potius tempestati, præsentique rerum tuarum conditioni, atque fortunæ per quā similis sit, & accommodata. Nam anno Christi M. D. XI. Ludouicus XII. Rex tuus (qui patriæ parens ob paternum nimirum in patriam, Regnūque Gallicum amorem fuit cognominatus) vnà cum Ioanne isto Rege Nauarræ cognato, à Iulio II. Pontif. Rom. proscriptus fuit. Hic igitur laudanda magnopere & prædicanda est Ioannis illius Regis Nauarreni erga Ludouicum XII. Regem tuum & propinquum suum egregia ac perpetua laude, prædicationēque dignissima fides. Nam cum Iulius ille Pōtifex Rom. Ludouicum XII. (qui mos est Pontif. Rom. antiquus & vsitatus) anathematum suorum fulminibus feriisset, Regnūque eius prædæ omnium ac direptioni exposuisset, Ioannes iste Albretius Rex Nauarræ, ab illo rogatus, & admonitus est, vt sibi pro cognationis, & Senioris iure & clientelarum feudatium institutis, aduersus hostes suos

opem, auxiliūque ferret. Rex itaque Nauarrę, cum & in tuo Regno natus, Regisque tui & propinquus, & propter magna, quę in illius regno possidebat, teuda, cliens esset, atque Vassallus, officij sui nequaquam immemor, coactis summa celeritate in suo Regno peditum, equitūque copiis, tantum in Gallię fines adduxit auxiliarem exercitum, vt Regnum suum viris propē nudatū ac destitutum reliquerit. Hac re cognita Papa Iulius cum Hispanorum Rege Ferdinando v. (cui tum primū Catholici cognomen tum, anno nimirum M. CCCC. XCII. imposuit) per internuntios agere instituit, vt celeriter, comparatis copiis Regis Nauarrę absentis ditionem viris & armis exhaustā inuaderet, pollicitus se & Nauarrum pro hæretico, & Schismatico proscripturum, & ipsius Regnum pro præmio addicturum. Ferdinandus Rex tantam rei gerendę occasionem nactus, ei deesse noluit. Promulgata itaque Pontificia in Regem Nauarrum execratione, manus maximas cogit, & post Rauennensem victoriam Galliam tuam se inuadere velle simulans, improuisam, & inopinatam impressionem in vicini Regis absentis ditionem facit, & primum quidem urbem primariam, Pampelonam nomine, Pompeiopolim olim dictam, deinde maximam totius Regni partem occupat.

An non quæso in his, quę commemorata sunt, expressam nostrorum temporum, & eorum, quę nunc in patria tua acciderunt, imaginem cernere licet? Nam quemadmodum olim

Ioannes

Ioannes ille Albretius Rex Nauarræ Regis tui proauus, Ludouico XII. Pio cognomine, Regi tuo propinquo, & patrono suo, in maximo, propter Pontificios anathematismos, & execrationes, discrimine constituto, contra vim hostilem fidelissimas suppetias tulit, idque cum extremo vitæ, fortunarumque suarum omnium discrimine, vnde etiam maximam Regni sui iacturam, & naufragium fecit : Sic Rex quoque tuus proauus illius sui pietatem, fortitudinē, fidemq; imitatus, contēptis omnibus minis, atque periculis, (etsi à Sixto v. Pontif. Rom. nostri temporis diris deuotus atque proscriptus fuisset) Henrico tamen III. Regi tuo agnato, affini, atque patrono suo opem ferre, & contra hostium eius vim, & impetum, operam fidelissimam præstare non dubitauit; cuius quidem suæ fidelitatis fructum statim amplissimum cepit, & idcirco meliore, quàm proauus eius, fortuna fuit vsus.

Quum igitur tale sit Regis tui Christ. cum paternum, tum maternum genus, planè regium, tam vetustum, tam splendidum, tam clarum, tam magnificum, ab vno ferè eodémque fonte deriuatum, & cum tales sint vtriusque generis illius parentes, aui, proauus, maiores, regali laude, dignitatēque præditi, quis quæso inter vos Francos, tam perditæ profligatæque fuerit audaciæ, & improbitatis, qui illum non Regia hac dignitate (quam à maioribus suis hæreditario Regni iure accipit) dignissimum iudicet, eique tanquam iusto, natiuo, & legitimo suo domino parèdum esse existimet, cum præsertim vtriusq;

generis parentum atque maiorum suorum virtutes tam strenuè imitetur, vt maiorem illis gloriam, quàm ipse acceperit, daturus esse videatur. Omnes boni, inquit Cicero, nobilitati fauemus (quam idem blandam conciliatriculam appellat) & quia vtile est Reipub. nobiles homines dignos esse suis maioribus, & quia valet apud nos clarorum hominum, & bene de Repub. meritorum memoria etiam mortuorum. Merito igitur te, omnesque bonos nouo huic tuo Regi fauere decet, quem paternam, auitam, ac maiorum suorum gloriam, laudémque tanquam hæreditatem, & patrimonium pretiosissimum suis propriis virtutibus, laudibus, rebúsque gestis, non conseruare solùm, sed etiam augere quotidie, & amplificare videmus.

Gaude igitur, & lætare, ô Gallia (quo etiã nomine plurimum tibi gratulor) quòd Regem nacta es genere & patrio, & materno, non nouo, sed antiquo: non humili & obscuro, sed claro, illustri, planèque regio: non externo, & peregrino, sed domestico, & intestino, Regio inquam illo Gallico, & Francico sanguine oriundum, ad quod sine vlla controuersia ac dubitatione, omniumque confessione, optimo, iustissimòque Regni ipsius iure, ac consuetudine perpetua, Regni tui ius, atque possessio pertinet, Regem posremò nacta es maiorum suorum vestigiis insistentem, facta illorum atque virtutes laudabiles fœlicissimè imitantem, ac proinde nõ genere tantum, sed etiam ingenio, & virtutibus generosissimum.

Huc

Huc accedit regia, & egregia illius educatio, & institutio, quæ & ipsa quasi altera quædam hominis natiuitas seu generatio merito censeretur debet, cum sit vitiosa, praua, & corrupta nostra natura quædam quasi regeneratio, hoc est, instauratio, correctio, & emendatio: & ad vitiosam, deformem, corruptamque nostram naturam, qua nascimur omnes, regenerandam quodammodo, & recreandam, id est, corrigendam, & emendandam plurimum conferat, atque conducatur. Ac maximam quidem vim puerilem educationem, ac institutionem, vel ad virtutem, vel ad vitium, vel ad decus, vel ad dedecus habere tam certum est, quam quod certissimum: ita ut illa verissimè totius reliquæ vitæ quasi basis, seu fundamentum dici posse videatur. Nam teste experientia quotidiana, qualis est cuiusque educatio puerilis, talis reliqua vita, mores, actionesque esse consueverunt, iuxta illa Horatiana. Quo semel est imbuta recens seruat odor. Testa diu. Et, ut inquit Vegetius, non tantum celerius, sed etiam perfectius imbibuntur, quæ discuntur à pueris. Quod si igitur in accipitrum, auium, canum, aut aliorum animantium educatione, quæ vel animi, & voluptatis gratia, vel ad venationem, ad equitationem, ad vecturam, ad custodiam, ad agriculturam, aliūmque vitæ humanæ usum aluntur, plurimum operæ, studij, atque laboris consumitur: quàm turpe quæso est, non multò plus operæ, studij, atque laboris in liberorum educatione, & institutione collocari, qui partim ad Deum colendum, partim

ad humanæ societati inseruiendum, & denique ad æternam & immortalem illam vitam adipiscendâ nati, & in his terris à Deo collocati sunt. Etsi vero cuiusvis etiam privati, vel vilissimæ, abiectissimæq; sortis, & fortunæ hominis probam, diligentem, accuratamque institutionem esse decet: tamen illorum præcipuè nequaquam negligenda, sed summo potius studio procuranda est educatio, atque institutio, & illorum vitæ, atque moribus hæc adhibenda est cultura, qui plurimis aliquando sunt præfuturi, & idcirco non sibi tantum, sed plurimis aliis plurimum sanè vel prodesse, vel obesse poterunt: à quorum inquam, vel probitate & virtutibus, vel improbitate atque vitiis, non paucorum tantum hominû, vnius familiæ, vel ciuitatis, sed hominum innumerabilium, ac totius alicuius gentis, atque regni vel salus, vel exitiû atq; interitus depēdet.

Hic igitur, ô Gallia, socia, sororque charissima, meritò tibi rursus gratulor quod Regem non regio solùm genere natum, sed regaliter etiam, egregièque educatum, regiis, & egregiis pacis, bellique artibus probè ab ineunte ætate excultum, & informatum es consecuta. Rex, inquit Plato, non nascitur in Repub. quemadmodum inter apum examina corporis & animi dotibus ceteros antecellens, ideò necesse est eum probè diligentérque ad reipub. administrandæ munus eradii atque institui. S. Chyostomus educationis liberorum neglectiōem non dubitauit parricidium appellare: quam ob causam Heli summum sacerdotem, virum alioquin piû
& re-

& religiosum, horrendas in senectute pœnas
luisse legimus. Id si in priuatis culpâdum, quan-
tò magis in principibus. & Regibus, qui non si-
bi tantum, sed multis hominum myriadibus na-
ti sunt.

Nam primum quidem quum nondum 10. na-
tus annos patrem suum, gloriosæ & illustris me-
moriz, Nauarræ Regem amisisset, singulari Dei
consilio, atque benignitate, ipsa matre sua, diui-
næ virtutis scœmina, optima fidelissimâque pie-
tatis, fidei, religionis, charitatis erga Deum, &
proximum, aliarumque virtutum magistra, vsus
est, quæ partim præceptis suis atque monitis sa-
pientissimis, partim piæ, sanctæq; vitæ suæ exem-
plo, (cuius maxima vis est atque pondus) ad o-
mnem Regiam virtutem ipsum præclare erudi-
uit. Ac ipse quidem pater (vt ex viris fide dignis-
simis, qui ei tunc adfuerunt, intellexi) iam iam
moriturus, animamque suam Deo traditurus,
hunc suum filium Reginæ coniugi suæ, licet ab-
senti, magnòque à se locorum intervallo disun-
ctæ, per quosdam, qui aderant, vnicè commen-
dauit, ipsique filio suo hoc per eosdem præce-
ptum dedit, vt sese fidelissimæ suæ matris disci-
plinæ totum subiiceret, eiusque præceptis, atque
monitis libentissimè obsequeretur, iuxta illa Sa-
lomonis, Audi fili mi, castigationem patris tui,
& ne abiicias legem matris tuæ. Nam hæc sunt in
capite tuo additamentum gratiæ, & torques circa
collum tuum. Sic ergo mater tui Regis, quæ illi
post Deum vitam hanc mortalem dederat, ei-
dem & vitæ huius, bene, sapienter, scèliciterque

degende, & æternę illius vitę consequende, optima, saluberrimęque præcepta dedit, & cum materno quasi lacte instillauit. Non irritum autem & inane, sed fructuosum hunc illius fuisse laborem, ipse certę euentus, & experientia quotidiana, illius virtutes, & facta præclara satis superque testantur; vnde non tam in ipsum, quàm in totam patriam vestram, atque Regnum amplissimum vberissimi commodorum, & ornamentorum fructus redundant. Tantò autem præstantior materna hæc disciplina, & educatio iudicari debet, quò illam videmus esse maiorem. Nam plerumque illustris præsertim conditionis, atque fortunę liberos, parentum, ac imprimis matrum vel negligentia, & incuria, vel peruersa, præposterąque indulgētia, & molli, delicata, ac eneruata educatione corrumpi potius, ac deprauari, quàm corrigi, & emēdari, bonamque ad frugem perducere videmus, & experimur ferē quotidie. Contra quem communem morem, ac consuetudinem Regis tui mater, verē materno, pióque erga illum affecta animo, non negligenter, remisce, languidē, molliter, & delicatē, sed summa adhibita seueritate, grauitate, industria, diligentia, cura, & sollicitudine filium hunc suum institui, & erudiri curauit, ita vt non tam in illius sinu, atque gremio molli, & delicato, quàm in sanctissimis eius sermonibus, præceptis, atque monitis optime fuerit educatus. Apud Romanos illos totius orbis terrarum olim domitores, atque dominos, legimus illustres quasque familias aliquam ē maioribus natu spectatę pro-

etate probitatis, sapientięque scēminam eligere fuisse solitos, apud quam liberi sui educarentur. Sic enim Corneliam Gracchorum, Aureliam Cēsaris, Actiam Augusti matrem, principum liberis educandis, ac moderandis pręfuisse, literis memorięque est proditum.

Sed vĩa pręterea est ad filium hunc suum probē educandum virorum pietate, sapientia, virtutibus, & optimarum artium scientia pręstantissimorum fideli opera, atque ministerio. Ad hęc dedit operam, vt statim à pueris non prouectę tantum ætatis, sed etiam æqualium familiaritate, & consuetudine vteretur optimorum, qua quidem ipse cū bonis probisque moribus, tum scientia tantò facilius augeri posset. Et sanē multi piorum, doctōrum, sapientumque virorum consuetudine plus longē proficiunt, quā vel assidua, & diuturna librorum optimorum lectione, vel longinquis, diuturnisq; peregrinationibus. Contra autem Mammeam illam Alex. Imp. matrem, scēminam pręstantissimam imitata, turpis & infamis vitę, morumque homines, vt histriones, mimos, moriones, turpilos, lenones, parasitos, totumque illud adulatorium agmen (quod, vt rectē poēta ille cecinit, media procedit ab aula) ab illius consortio, consuetudine, colloquio, conspectuque arcere, ac summouere sedulò studuit, ne improborum morum, gestuum, dictorum, factorumque quasi pestifera contagione, tenella & infirma illius ætas atque animus inficeretur.

Iam verò cui est dubium, quin cuiusvis edu-

catio ad illud potissimum munus, vitæque genus, ac institutum, cui aliquando obeundo, atque gerendo quis est destinatus, accommodari debeat? unde, exempli gratia, aliam eius, qui Ecclesiæ, aliam eius, qui Reipub. aliquando sit præfuturus educationem, institutionemque esse oportet. Atqui cum in Rege, non modo iuris, legum, rerumque politicarum, sed rei etiam bellicæ, ac militaris magna scientia requiratur; hic tuus Rex & politicis, & bellicis in rebus statim à pueritia diligentissimè fuit institutus, & informatus, unde mirum profectò non est, tantam, & tam admirandam in eo esse artium pacis, simul atque belli peritiam. Ac Martis quidem armorumque magistris optimis, ac fidelissimis usus est, præter alios cum patruo suo Ludouico principe Condæo, heroicæ virtutis, fortitudinisque incomparabilis viro, tum Gaspare Colignio Castilionæo, magno illo quondam Thalassiaracha, seu classis, rei que maritimæ præfecto, qui immortalem post se reliquit gloriam, & quo cum aliis virtutibus, tum præcipuè rei militaris scientia vix præstantior ullus in Galliis extitit. Nec verò ille armorum tantum, sed etiam morum eius rector ac moderator optimus & sapientissimus fuit. Ac quoniam Regis tui ætas in medium belli ciuilis, rerumque omnium discrimen, atque certamen inciderat. ludus illius, atque schola ab initio ætatis fuerunt castra, ei que palæstra, sol, puluis, labor, militia in studio semper fuit, unde excellentem hanc quam admirantur omnes, rei militaris scientiam, non vel magistrorum

strorum voce, atque sermonibus, vel librorum, & historiarum lectione, sed usu ipso, & exercitatione assidua sibi comparauit. Ludi quoque illius, & exercitia puerilia, quibus à teneris annis fuit deditus, fuere verè regia, rei que bellicę quasi progymnasmata, vt pileę ludi, cursus, saltus, venatio, natatio, equitatio, decursio equestris, campi cursio, hastiludium, iaculorum & sclopetorum emissio. Nam quoniam pueri ludis maxime ducuntur, ac delectantur, sapientes pædagogi omnem dant operam, vt puerorum, quibus præ sunt, ludi negotiis atque muneribus seriis, quæ aliquando, vbi ad virilem ætatem peruenerint, sunt obituri sint accommodati, quo quasi per iocum, atque ludum res simul serias atque vtilēs discant. Tales fuerunt quoque Regis tui ludi, quibus à primis annis fuit deditus, planè regij, & imperatorij, illius muneris, & officij quasi præludia quedam, & progymnasmata. Artibus præterea, & disciplinis liberalibus, quantum ei per bellicas occupationes licuit, operam tribuit, ita vt & linguę Latinę aliquam notitiã sit adeptus, & Italicę, atque Hispanicę non sit ignarus. Denique in historiis sacris & prophanis admodum est versatus: quorum cognitione cum ad omnem vitę vsum, atque munus, tum ad reipub. regni que administrationem nihil ferè est vtilius, & accommodatius. Ac omnino cogitanti mihi, & veterem illam filiorum regiorum apud Persas educationem memoria repetenti, Regis tui educatio videtur illi esse quàm simillima. de qua sic Plato in Alcibiade. Postquam enim puer

septimum ætatis annum attigerat, rei equestri, atque venationi dabat operam, idoneis ad id v-
tēs magistris. Anno autem decimo quarto pueri
curam suscipiebant ij, quos illi Regios pedago-
gos appellabant, qui erant selecti e Persis. III.
constantis ætatis viri, quorum vnus sapientissi-
mus, secundus iustissimus, tertius temperantissi-
mus, quartus fortissimus habebat: Horum pri-
mus sapientissimus Diuinum cultum, & Regia
instituta puerum docebat, Secundus iustissimus
puerum illum Regium docebat, per vniuersam
vitam vera dicere. Tertius temperantissimus,
monebat vt ne vllius voluptatis imperio, & libi-
dini se subiiceret, sed mature assuesceret esse li-
ber, & reuera Rex, iis primum imperans quæ in
ipso sunt, non autem illis seruiens. Quartus for-
tissimus, puerum reddebat impavidum, & intrep-
idum: quippe cū is, qui timet sit seruus. Ho-
rum igitur primus cultus diuini, ac legum, & in-
stitutorum regionum, Secundus veritatis, & ius-
titie, tertius temperantie, & continentie, quar-
tus fortitudinis doctor ac magister erat. Omnium
autem harum virtutum, quæ cū in omni ho-
mine, tū præcipuè in Regibus valde sunt ne-
cessariæ, magistrā habuit matrem suam, quæ
spectatę pietatis, religionis, veritatis, fidei, tem-
perantie, castitatis, sobrietatis, frugalitatis, forti-
tudinis denique fuit mulier.

Regia ergo planè fuit Regis tui educatio, siue
matrem eius reginam clarissimam spectes, qua
ille non solum procreatrice, sed etiam nutrice,
& vitæ, morumque educatrice, atque magistra
optima,

optima, & fidelissima usus est: siue modū ipsum, formamque educationis, quæ Regia fuit, & Regi futuro conuenientissima, consideres, quæ & ipsa tibi meritò & optime de hoc tuo Rege sperandi, & illum amore, studio, obseruantia, & obedientia debita prosequendi causa debet videri iustissima, & stimulus acerrimus.

Multi quoque hic referri & commemorari possent præclara eius facta, dicta acuta, atque falsa quæ in ætate illa puerili eius fuerunt ingenij, atque acuminis specula, futuræque dignitatis indicia ac testimonia, quibus magnam sibi apud omnes gratiam, beneuolentiæque conciliauit. Quinetiam verissimè affirmare possumus illas ipsas funestissimis belli ciuili funestissimas clades, & calamitates, quibus puerilis illius ætas exposita fuit & obnoxia, illi patientiæ, fortitudinis, omniumque virtutum fuisse magistras, & quasi cotes. Vexatio, inquit propheta, dat intellectū: Itaque Rex tuus à pueris, plurimis diuexatus, & exercitatus malis, miseriis, & ærūnis simul maiori in dies scientia, atque sapientia auctus fuit. Idem de Rege tuo verissimè affirmari potest, qui puer innumerabiles exantlauit labores, perpessus est ærumnas, subiit atque sustinuit pericula: vnde illum ad gloriæ, atque laudis metam quotidie propius accedere videmus, donec optatissimū, & perfectissimum illum æternæ gloriæ scopum contingat, & coronam reportet immortalē. Etsi autem mater Regina Nauarrenna, illam ditionem, atque regnum suum partim suis, partim fidelissimorum, & sapientissimorum viro-

rum consiliis, atque opera optimè, felicissimè-
 que administrabat: tamen filium quoque suum
 licet adhuc puerum in Regij illius sui muneris
 societatem asciscebat, quo ille statim à pueris
 tractandis Regni habenis assuesceret. Nam à te-
 neris, vt poeta ille ait, assuescere multum est. V-
 sus ergo statim ab initio ætatis, Regij illius sui
 muneris socia, imò non tam socia, & administra,
 quàm magistra cum sua matre, (cui se semper
 morigerum, & obsequentem præbuit) singula-
 ris ingenij, iudicij, consiliique fœmina, tum aliis
 optimis, & sapientissimis viris, ita statim ab ini-
 tio sese gessit, vt omnibus eius imperio, pote-
 statique subiectis, non gratus solum, & iucundus
 propter suauissimos mores, verùm etiam pro-
 pter multa, quæ dedit, egregiæ indolis, & inge-
 nij documenta, maximæ admirationi fuerit. Et
 hic quidem fuit probæ & eximię illius educatio-
 nis fructus longè præstantissimus, qui in totum
 illud regnum statim redundauit. Sux enim tum
 sapientiæ, tum iustitię, tum fortitudinis, tum im-
 primis facilitatis, humanitatis, lenitatis, atque
 clementiæ in tenera adhuc illa sua ætate clarissi-
 ma edidit specimina. Erga omnes cuiusunque
 ordinis, status, fortunæ, religionisue homines se
 valde facilem, comem, & humanum præbuit, ac
 non modò nemini vllam vel minimam intulit
 iniuriam, neminem læsit, sed multorum etiam
 offensas remittere, & condonare, quàm vlscisci,
 ac persequi maluit; vnde multos sibi ex inimi-
 cissimis amicissimos, fidelissimósque reddidit.
 Et quemadmodum ipse nemini vllam iniuriam
 intulit,

intulit, ita nec ab aliis iniuriam cuiquam inferri passus est.

Et hæc fuerunt Regij illius muneris quasi incunabula, initia, ac prima rudimenta, minimè contemnenda, sed præclara & eximia.

Habes igitur, ô Gallia, Regem Regiæ & Imperatoriæ artis minimè rudem, imperitum, & ignarum, sed in hoc, omnium ut maximo, ac præstantissimo, ita difficillimo, laboriosissimo, periculossissimo regnandi & imperandi munere, ab initio ætatis versatum optimè, & exercitatum. Nam cum in omnibus aliis vitæ muneribus, atque negotiis, tum in hoc omnium maximo & difficillimo munere regali usus & exercitatio plurimum valet: sine qua omnia vel optima utilissimæque præcepta, ac instituta videntur esse quasi corpus sine anima. i. mortua ac nullius ferè momenti. Vnde sapienter Cicero, Nec medici, inquit, nec imperatores, nec oratores, quamvis artis præcepta perceperint, quicquam magna laude dignum sine usu, & exercitatione consequi possunt. Experientiam similiter Aristoteles, Poliviri sapientissimi testimonio probat, artis atque scientiæ parètem esse, & procreatricem: id quod tui quoque Regis exemplo facillimè comprobari, ac confirmari potest; qui quidem vel ipsa experientia eximiam hanc sibi bene regnandi, imperandique scientiam peperit, quæ tibi nunc utilis valde est, & fructuosa. Quia verò, ô soror charissima, hæc mea ad te oratio gratulatoria est, libenter prætermitto tum nuptias illas funestissimas, tum ea quæ à die 24. Augusti Anni 1572. ad

finem anni 1574. acciderunt: quum hic Rex tuus singulari Dei prouidentia & auxilio ex aulica custodia, simulque ex grauissimis periculis excessit, euasit, erupit. Nimirum Deus hac ratione testatam voluit paternam suam atque admirabilem curam erga tuum Regem: & hoc exemplo docuit, humanos conatus aduersus Dei consilium nihil posse. Atque vt in hoc tuo Rege aliquid cæleste & supra naturam contemplemur facit quod noua stella quæ anno 1572. fulserat visa sit 17. post annis apparere: quasi nouum hunc Regem ex tot malorum tenebris tandem emergum fœliciter exceptura.

Rursus ô Gallia velim cogites, Regem te habere non in regali hoc munere peregrinum & hospitem, imperitū, & rudem, sed peritum valde, & exercitatum, qui scientiæ huius atque artis regalis plurima iam & maxima documenta dedit, quibus non apud domesticos tantum, sed etiam externos atque peregrinos maximam nominis famęq; celebritatem, laudem, atque gloriam sibi comparauit. Eius enim prudentia, æquitas, clementia, & regiæ omnes virtutes in Bearnia & inferiori Nauarra regenda, & in gubernandis suis subditis clarissimè eluxerunt. Per aliquot igitur annos, quum Henricus III. tibi & Henricus IIII. nouus hic tuus Rex Bearnie & Nauarrę benè fœlicitérq; imperarent pax utroq; in regno fuit quæ anno M.D.LXX. mense Nouēb. inter Romanę & Reformatę religionis studiosos, regio edicto, inita atq; sancita fuit, quod quidem edictum regiū & pacificatorium ipsius

Regis

Regis mandatu, publico præconio, per totam Galliam fuit promulgatum. Paulatim itaque patria tum tua à præteritis malis, miseriis, turbis, atque molestiis respirare, ac reuiuiscere, viresq; paulatim rursus colligere atque recuperare cœpit. Nam iustitia religiosa legum sanctione & obseruatione vires paulatim recolligebat: Pietas ius suum (cuius iacturam insana effrenatæque annorum licentia maximam fecerat) in hominum animos, & conscientias repetebat. Nobilitas diuersis studiis, factionibus, & inimicitiiis depositis, mutua rursus lenitate charitatēque coalescebat. Plebs post innumeras ærumnas, à bellicis & infestis istis depopulationibus immunis, labore atque sudore partis iucundè fruebatur. Denique belli calamitates, inimicitia, atque simultates grauissimæ, breui temporis spatio per æmulationem, obliterabantur, ac sepultæ iacebant. Sed tandem anno 1585. extremo Martij, fatalis rursus quædam calamitas incidit, & improuidas hominum mentes occupauit, iustoque Dei iudicio domesticum & intestinum istud bellum, quod, ad tempus aliquod sopitum fuerat, certorum quorundam hominum culpa, religionis, iustitiæque specie, & simulatione ex interis quasi rursus excitatum, ac redintegratum fuit; & coniuratio illa quam Liguam vocant, ex tenebris atque latebris erupit, palamque armata in regno Gallico volitare, atque grassari cœpit. Non autè ignoras, Gallia, socia, & fœderata charissima, qui postremi huius tui belli (cui Deus mox finē imponat) quo adhuc premeris, & affligeris,

quasi tubę, buccinę, faces, præcipui duces, auctores, ac principes extiterint, qui eius quasi classicum cecinerint, à quibus fax ista fuerit accensa, quorum nonnulli diuini iudicij seueritate, atque iustitia pœnas iam graues, & atroces dederunt, (ita vt omnes nominare non sit necesse) reliqui nisi resipuerint, & à cœptis ausisque istis suis destiterint, non est quod impunè se id laturos existiment. Non es nescia, quàm honesti, religiosique in speciem illorū pretextus fuerint, quibus causis, & rationibus se ad arma capienda, bellumque hoc suscipiendum adduci, & impelli palam protestati fuerint: quibus illi plurimos in patria tua nobiles, procures, ciuitates, ad eiusdē belli, quod videbatur esse sanctissimum & iustissimum, societatem pertraxerint. Spem etiam fecerant Regi tuo defuncto, & aliis, se paucos intra menses, omnes nouę & reformatę ipsius Religionis, (cuius cultores Hugonoti vulgò appellabatur) reliquias exterminaturos & totū regnum ad vnā religionem atque fidem, ad pacem & trāquillitatem, ad pristinum splendorem, dignitatēque esse reuocatuos. Plurimum illi nitebantur atque confidebant exterorum & potentissimorum quorūdam Regum, Principum, populorūque auxiliis: quę quidem illis non defuerunt. Quid hæc, Rex tuus defunctus egerit, quomodo se ab initio belli huius gesserit, neminem latet. Nam literis nuntisque ad Regem Nauarrenum, proximum suum agnatum, ad regni procures, ad externos etiam principes missis, apertè & palam protestatus est, bellum istud

contra

contra voluntatem, & maiestatem suam susceptum esse, atq; geri: & idcirco simul omnes grauissimè adhortatus est ad opem sibi ferendam, & ad se totumque regnum aduersus iniquam & iniustam coniuratorum istorum vim tutandum, ac defendendum. Edictum quoque pacificatorium editum anno LXXX. eodem tempore, (anno nimirum LXXXV.) renouari, ac denuo promulgari curauit. Sed paulò post mutato rursus consilio atque sententia, & inita cum coniurationis, vel sacri illius fœderis sociis pace, consilia rursus illorum, atque conatus palam approbavit, iisque assensum prębuit, edictum præterea pacificatorium anno LXXX. primùm editum, deinde anno LXXXV. renouatum, ac rursus publicatum, eodem anno reuocauit, & nouo edicto XVI. die Iulij publicato, religionis, reformatę cultum, & exercitiũ capitis pœna grauissimè prohibuit. Et tamen multorum sermones Regem tuum inuitum hæc omnia, & quasi oppressum facere testabatur: At verò idem hoc triste, funestumque bellum nouo huic tuo Regi fuit quasi campus quidam (quem ei Deus dedit) amplus, & spatiosus, in quo diuina eius virtus excurrere, cognoscique posset. Ac ab initio quidem istius belli non te fugit, ô Gallia, quàm inuitus hic tuus Rex (quem idcirco verè Solomonem, pacisque filium, hoc est, pacificum, & pacis amantem dixeris) ac nõ nisi extrema compulsus necessitate, ad arma rursus sumenda, bellumque suscipiendum accesserit. Recordare hic quęso, mente memorięque recale, quàm bono fortique

animo statim ab initio, duello seu monomachia cum primario belli istius auctore atq; duce cōgredi (etsi minimè dignitate & nobilitate sibi pari) cum magno vitæ dignitatisq; suę discrimine, atq; ita caput, fortunas, vitam, dignitatēq; suā patriæ deuouere, ac cōsecrare paratus fuerit? Sati-
 tius enim esse apertè profitebatur, vel alterutrū, vel ambos perire. quàm tot hominum millia (id quod euenturū esse prospiciebat, quod etiā euenit) calamitosissimo illo bello rursus implicari, miserrimēq; interire. Duello igitur vitā, dignitatē, fortunāq; suas omnes presentissimo offerens periculo, libenter charissimā suam patriam tristissimo funestissimōq; isto bello, quod præi-
 debat, plurimorum funerū, atque malorum fore causam, liberasset, pacēque patrię, dignitatis, sanguinisque sui profusione redemisset. Non igitur iuuenili quodam ardore, non cæco, & præcipiti animi impetu, non temeritate, & audacia, non ira, non vindictæ cupiditate, non ambitione, sed deliberato consilio, flagrantissima patrię, regnique totius charitate, atque cōmiseratione adductus, & impulsus: & cum causę suę bonitate, conscientięq; puritate, tum Dei potissimū fretus iustitia, misericordia, atque ope, nulla nec vitæ, nec dignitatis suę ratione habita, singulare istud certamen cum præcipuo incendij istius auctore, Sacrique (vt vocant) scēderis duce, suscipere, caputque suum pro patriā in discrimen offerre, atque obicere paratissimus fuit. Boni enim imperatoris est, inquit Plutarchus, ciuium salutem suā incolumitati antepondere. An non quæ-
 fo hic

hic illius conatus cū amoris erga patriam
 longe maximi, tum purę, ac sincerę conscientię,
 tum denique magni excelsique animi signum &
 iudicium fuit manifestissimum, cū suo sangui-
 ne tot tantosque misērias, atque calamitates,
 quas toti Gallię impendere cernebat, redimere,
 atque auertere voluerit? Deinde nonne multis
 scriptis in lucem editis, multis nūtiis, literisq; ad
 Regē, ad Reginam, matrē, ad Clericos, ad Nobi-
 litatē, ad tertium Statum, vt vocāt, ad Parisiēses,
 ad Collegium Sorbonicū, statim ab initio istius
 belli (quod aduersus se potissimū, familiamque
 suam instrui, & comparari animaduenerat) mis-
 sis, apertē testatus est, nihil se malle quam pacem
 & concordiam, quā patrię salutem, Regis re-
 gnique dignitatem: se ab omni bello ciuili prę-
 fertim intestino, ceu patrię perniciosissimo, to-
 to pectore abhorrere, omnes ab armis, atque bel-
 lo ad pacis concordięque studium grauissimē est
 adhortatus, denique testatus est, se inuitum ac
 necessario, vis hostilis à sua & suorum vita, atq;
 fortunis arcendę, ac depellendę gratia adigi, &
 impelli. Nihil enim omnes illę literę atque scri-
 pta in lucem edita aliud fuerunt, quā adhorta-
 tiones ad pacem, & concordiam, dehortationes
 à bello, atque armis, quā querelę, & deplora-
 tiones miseriarum, & afflictionum totius patrię,
 quā testificationes sui animi, pacis, concordię,
 salutis, dignitatisque communis cupidissimi, à
 bellis, atque tumultibus abhorrentis & alieni,
 quā preces, atque vota ardētissima, quā pe-
 titiones iusti legitimęque alicuius Concilij, siue

OEcumenici, siue Nationalis, quo Religionis cōtrouersię diiudicari, & Ecclesię pax cōstitui posset, quā deniq; vaticinia, verē diuina, de futurarum rerū euētu, de futuris cādibus, atq; lanienis, de diuina vitę causāq; suę iustissimę defensione, de futura vindicta, & vltione diuina, de hostium suorū certissimo exitio, atque interitu: quę ipso euētu partim iam cōprobata esse, partim magis magisq; cōprobari nemo sanę mentis inficiari potest. Ne te pigeat quęso hac, ô Gallia, in mētem tuā reuocare, dininas illius prędictiones, quę in literis illius extant: ex quibus ipsis patet diuino illū duci spiritu, atque numine, & idcirco dignissimum esse, quem nō solum diligas, & obserues, sed etiā suspicias, & admireris. Eius rei aliquot tantum ex plurimis proferam testimonia: ex quibus de reliquis facile est iudicare. Epistolam Bergeraco ad Regem defunctum anno LXXXV. 21. Iulij missam, his verbis concludit: Interim istis in malis mea me consolatur innocentia, & integritas, amor, fidēsque mea erga maiestatem tuam, atque Rempub. quodque mihi sum conscius, per me non stetisse, quo minus illam vel vitę meę periculo liberarem à naufragio. Fretus igitur Deo, defensore meę æquitatis, iustitię, atque fidei tutore, persuasum exploratūque habeo, illum mihi semper fore propitium, mēque vi iusta nequaquam deserturum, sed ope, auxiliōque pręsto mihi semper futurum, & maiores in dies additurum vires, atq; animū aduersus hostes meos, qui iidem etiam tui sunt hostes. Hūc supplex oro, vt Maiestatem
tuam

nam saluari iuuat atque regat consilio, saluam incolumemque conseruet, eique in tantis difficultatibus, atque periculis adsit: mihi que eam largiatur gratia, vt quoad vixero iusta debitaeque maiestati prestare possim officia, & obsequia. Epistolae praeterea eodem anno, vndecimo die Octob. ex Mariscano monte ad amplissimum senatum Curiae Parisiensis missae hic est finis: Iesum Deum appello, me Regi domino meo esse, & fuisse fidelem, à me diligere Galliam, à me viros bonos, & virtutis amantes coli, qui Galliam defendunt: à me acerbissimum dolorem percipere ex ista rerum communium, omnisque status perturbatione. Sed Deum spero hanc in me collaturum gratiam, vt & ego hac in causa Regi domino meo, ita vt par est, inseruiam, & omnes veri Franci, Regni patriaeque suae amantes, tam bene suum praestent officium, vt breui mea opera cum hostium suorum visurus sit exitium, & interitum, tum Regni tranquillitatem: quam ad rem certum mihi deliberatumque est, sanguinem, vitamque meam profunderem. Literarum ad Collegium Sorbonicum eodem ex loco, atque tempore missarum est clausula. Testor autem vobis, me paratum esse iusto ac legitimo concilio acquiescere, paratum esse in eo audire Ecclesiam, itaque pro Ethnico & publicano haberi me à vobis non posse. Quod si verò generale concilium haberi non potest, me à nationali (vt facilius expediantur omnia) non abhorрere, quam viam sepe in hoc regno meminimus de iudicio, consilioque vestro obseruari. Quod si praeter petitio-

nem meam, contráque omnem Ecclesiæ ordinem, morem, ac consuetudinem, proscriptionibus, cædibus, & aliis duris, iniquis, iniustus, planéque barbaris modis amplius agetur, constitui iustissimam defensionem omnibus violentisque istis proscriptionibus opponere, minimè dubitans fore, vt maledictione diuina illi inuoluantur, qui falso fucatóque Ecclesiæ prætextu Regno huic tantas turbas conciliât. Vos autem testes appello æquissimarum conditionum, quas offero omnibus, quibúsque me obstrinxi. Deum verò appello testem, & defensorem, qui causæ meæ æquitatem diiudicabit, ac pronuntiabit cōtra meos aduersarios: quem oro, vt vobis sit propitius. Eiusdem literæ ex mōte Albano Cal. Ianuarij anno. M. D. LXXXVI. ad Clerum Franciæ datæ, hunc habêt finem: Credo bellum, quod tanto animi ardore, atque contentione geritis, Christianis esse indignū, & quòd inter Christianos, & eos potissimum qui profitentur se doctores Euangelij, mouetur. Si bellum vobis tantopere arridet, si placet magis prælio, quàm Christianæ disceptatione decertare, si sanguinaria coniuratio magis delectat, quàm Concilium, Lauo manus meas, sanguis, qui hinc effundetur, sit supra capita vestra: scio imprecationes eorum, qui affligentur, in me non cadere. Mea enim patiétia, mea obedientia, & rationes, quas adduxi, notæ sunt omnibus. Expectabo benedictionem Dei in iusta hac mea defensione: à quo precibus contendo, vt spiritum pacis, & concordie, vnde tranquillitas huius regni, & concordia Ecclesiæ

Ecclehiæ existat, vobis largiatur. Idem literas eodem tempore & loco misit ad tertium ordinem Franciæ, quarum hæc est conclusio: Nihil aliud à vobis expeto (qui ad ierenda potius, quàm inferenda mala nati estis) quàm vota, affectus, precæque vestras. Deum Opt. Max. orate, vt pro æquitate, iustitiæque sua segreget, atque secernat eos, qui felicitatē, ac salutem huius regni querunt, ab iis, qui eiusdem calamitatem & ruinam. Ego verò Deum obtestor, me nihil aliud exoptare quàm Regni, vestrumque omnium commodum, ac salutem: ita me Deus amet, si vnquā ambitione, aut prauo aliquo affectu arma sumptierim. Literas quoque Calend. Ianuar. M. D. LXXXVI. ex Monte Albano ad Parisienses scripsit, sub quarum finem hæc continentur: Sed Deus nouit meum cor: sanguis eorum sit super auctores istarum miserationum. Quòd ad me attinet, Deum precor, & precabor assidue, sine vlla cessatione & intermissione, vt ipse viam aperiat, ac patefaciat, qua nomen eius sanctè colatur, Regni iustum obsequium, debitum exhibeatur, status huius regni in pristinam tranquillitatem, felicitatem, dignitatem atque splendorem vindicetur. Literæ ad Reginam Bergeraco 1. Decemb. anno M. D. LXXXV. Nemini absurdum & ab officio meo alienum videri debet, quòd omnem adhibeo operam, vt me tueri, ac conseruare, & hostes meos opprimere possim. Hic cū maximo animi mei dolore atque cruciatu maximas præuideo clades, & calamitates, quæ in hoc Regnum redundabunt. Sed Deus nouit, nouisti

tu quoque, Domina, quis illarum culpam sustineat. Conscientiam habeo puram: naturæ ipsi aduersarer, si non vitæ familiæque meæ patrocini-
 nium, ac defensionem susceperem. Videbo illum
 diem, Domina, quo Rex & tu, sed nimis forsan
 sero, cognoscetis, & experiemini, qui sint illi,
 quorum manibus arma dederitis, quorum ma-
 nus vos amastis, nimis seræ erunt vestræ querelæ
 de pace cum illis inita, & de bello quod subditis
 vestris fidelissimis inferitur. Deus me tueatur ad-
 uersus illorum conatus, insidias, atque minas:
 càmque mihi gratiam impertiat, ut possim vide-
 re ruinam, & exitium meorum hostium. Maxi-
 ma incommoda, atque dolores, quibus afficior,
 hæc mihi verba extorserunt, quæ oro Maiesta-
 tem ut bonam in partem interpretetur, quam
 Deus diu saluam, incolumemque conseruet. An
 non hæc illius literæ testes sunt locupletissimæ
 singularis eius pietatis, religionis, iustitiæ, inno-
 centiæ, integritatis, fidei, amoris, charitatis erga
 Deum, erga Regem, erga patriam admirandæ?
 Nōne Deus, ut Psalmistæ verbis utar. (Ps. x x l.)
 Deus illi dedit cordis desyderium, & prolocu-
 tionem labiorum eius non prohibuit, hoc est il-
 lum precum istarum, atque votorum suorum fe-
 cit compotem; & iis plenè cumulatèque satisfe-
 cit, illius vaticinia (quæ S. Spiritus afflatu illum
 fudisse quis dubitet?) cùm de salutis dignitatisq;
 suæ conseruatione, & amplificatione diuina ac
 cœlesti, tùm de hostium suorum ruina & exitio,
 partim ad exitum iam perduxit, vel partim per-
 ducit adhuc quotidie, atque implet? Hic quoque
 mihi

mihi in mentem venit (de quo à viris fide dignissimis ad me perscriptum est) cuiusdam doctrina pietatèque clarissimi, vaticiniū: quod ille anno **LXXXVI** ante Guisianorum fratrum cædem in magnifico quodam epulo, quo à principibus quibusdam, doctisq; nonnullis viris exceptus fuerat, edidit. Nam cum de Regni rerumq; Gallicarum statu incidisset sermo, atque mentio, ille magna parrhesia atque contentione dixit: Regem Nauarrenum, (quem Deus tam diuturna adhuc cruce exercuit, atque probauit,) breui ad summam dignitatem peructurum, & Ecclesiam Regnūque Gallicum sub eo respiraturum ab immanissimis istis bellis, atque miseriis, & pristinam recuperaturum pacem, ac tranquillitatem. Hoc etsi illis, qui aderant, tunc temporis incredibile visum fuit, ac tantum non ab illis irrisum, & explosum, ita vt bonus ille vir nonnullis delirare, & desipere videretur; tamen videmus illud iam impletum esse, & magis magisque adhuc quotidie impleri.

Hoc igitur modo Rex tuus (vt ad propositum redeam) pro pietate, sapientiæque sua se ab initio funesti istius belli gessit. Belli enim initiis, & nefariis eorum, qui illud indixerant, conatibus omni studio operæque sua obstitit, nihilque intentatum reliquit, vt pacem, qua ille vnice delectatur, fartam tectam tueretur, omnemque bello isti viam intercluderet. Non igitur voluntate seu libidine quadam animi, sed inuitus, & extrema coactus necessitate, tentatis frustra omnibus remediis bellum tandem, suæ nimirum

& suorum, imò totius Regni, Regisque ipsius salutis, aduersus hostilem vim & impetum, iuxta legem naturalem, atque diuinam pro virili sua tuendæ, & defendendæ gratia suscepit. Nihil enim illius arma voluerunt, nisi vt vim & contumeliam propulsaret, nihil egit cunctus illius exercitus, nisi vt ius suum tueretur & auctoritatem. Secutus est hac in re Cic. sapientissimi viri consilium, atque sententiam. Bellum, inquit, ita suscipitur, vt nil nisi pax quæsita esse videatur. Item: suscipienda sunt bella eam ob causam, vt sine iniuria in pace viuatur.

Cùm itaque Rex tuus nullum pacis consiliiis atque monitis videret relictum esse locum, omnia contrà salutaria pacis consilia, atque remedia, vi impediri, atque tolli; audaciam virtute, temeritatem consilio, furorem fortitudine, manum manu, vim vi sibi esse superandum duxit. Huc accedebat Regis ipsius auctoritas grauiissima, qui ipsius cæterorumque Regni procerum opem, auxiliùmque ab initio implorauerat, cum scriptis publicis literisque testatus fuisset, arma, bellaque à sacri illius fœderis vel potius impiæ coniurationis sociis contra se, maiestatem suam, totùmque Regnum moueri, ac comparari. His igitur iustissimis de causis arma tãdem sumpsit, bellum suscepit, exercitum confecit, rei præfuit, remque optimè fœlicissimèque, Dei in primis auspiciis ductumque gessit; ac vt ab initio, ita in ipso quoque belli cursu & ardore auctor suasorque pacis semper fuit, pacem flagitare non destitit. Quàm verò in belli illius ad-

ministracione piè ac religiosè, quàm prudenter, & sapienter, quàm fortiter, quàm clementer, quàm moderatè sese gesserit, testes sunt non illius modò amici, atque socij, siue domestici, siue externi, verùm etiam hostes & inimici vel acerbissimi. Itaque bellum hoc ipsum anceps, atque dubium, quod aliquot millia hominum breui tempore absumpsit, eximiarum eius virtutum, imperatoriarum vt fortitudinis, ac scientiæ bellicæ, prudentiæ, sapientiæ, clementiæ, patientiæ, iustitiæ, temperantiæ, fœlicitatis denique, atque fortunæ, seu fauoris potius erga illum diuini, quasi theatrum quoddam excelsum, & sublime fuit. Egregia honestaque in illo exempla vidiſti, omniaque munera imperatoria ita egregiè obiit, vt nihil in illo deſyderari potuiſſe videretur. Mira enim fuit illius ſolertia, & ſagacitas in hoſtium inſidiis præcauendis, in illorum conſiliis, itineribus, conatibus explorandis, & cognoscendis. Omnibus velitationibus, præliis, oppidorum oppugnationibus interfuit, ac præfuit: princeps prælium iniuit, vltimus prælio exceſſit: magna fuit ad conſilia ex tempore, atque è re nata capiendæ eius animi vis, atque ſolertia: incredibilis inediæ, ſitis, frigoris, caloris, vigiliarum, laborum militarium patientia, ac tolerantia, ita vt nunquam militibus plus laboris impoſuerit, quàm ſibi ſumpſerit. Summa in rebus gerendis & conficiendis celeritas, quam in Alexandro, Q. Curtius, in C. Iulio Cæſare Suetonius maximè laudant: cuius præſidio illos res incredibiles confeciſſe teſtantur. Commemorabi-

lis præterea eius apparuit atque eluxit semper clementia, lenitas, ac mansuetudo, qua victis non insultauit, sed pepercit. Breui itaque tempore plurima castella, castra, atque oppida cepit, prælia secunda fecit, victorias egregias reportauit, in omnibus suis pugnis, velitationibus, oppidorum oppugnationibus superior semper, victorque equalit: ita vt dubitari posset fortior ne an felicior fuerit, quæ tamen omnia ipse pro singulari sua pietate non sibi, sed soli in solidum benignitati diuinæ accepta retulit, vt sermones & scripta quædam eius in vulgus edita testantur. Quò præterea maioribus copiis, maioriq; contentione seu furore potius ab hostibus suis potentissimis fuit oppugnatus, tantò clarius & luculentior eius semper eluxit virtus, ac fortitudo, palmæ instar inuictæ, & inexpugnabilis, tanto maior eius fuit felicitas, atque gloria, tantò denique maiora & illustriora diuini erga illum amoris, atque fauoris signa apparuerunt. Nam cum toto hoc tempore decem, quod prorsus incredibile nostræ futurū est posteritati aduersus illum (cui exiguæ admodum erant copię) diuersis in locis, Regij exercitus, & quidem maximi, omnibusque rebus instructissimi fuissent comparati, & instructi, qui quidem certissimum illi minitabantur exitium, cum hostes trimestri spatio Nauarrenum se deleturos, & omnes eius agnatos tota Gallia profligaturos iactarent, tamen animo semper excelso, impauido, & præsentī fuit, ac maximis illis difficultatibus, atque periculis non succubuit: non animum despondit,

despondit, sed diuina fretus ac fultus bonitate, restitit fortiter, ac contrà audētiōr iuit. Tandem igitur omnes illi exercitus (id quod velint nolint amici pariter atque inimici fateri coguntur) à Deo miraculosissimè partim fame & inedia, partim pestilentia, atque morbis, partim (& hic quidem minima ex parte) ferro, tormentis, & cædibus, partim metu breui tempore deleti ita fuerunt, vt ex eorum omnium reliquiis vix vnus iustus exercitus confici potuerit. Quis igitur dubitet, quin Deus ipse è Cælis pro Rege tuo pugnauerit?

Victoriam autem præ cæteris insignem, & claram Deo iuuante cōsecutus est aduersus Ioycufium Ducem Henrici III. Regis tui adfinem, cuius quidem exercitum maximum, copiis suis numero inferioribus vnus ferè horæ spatio vicit, fugauit, atque prostrauit, tormentis bellicis, atque vexillis omnibus captis, cæsa maxima militum manu, ducibus propè omnibus partim occisis, partim comprehensis, quos tandem gratis sine vllo lytro liberos dimisit. Illa itaque ipsa victoria cum aliarum præstantissimarum eius virtutum, tum lenitatis præcipuè, ac moderationis eius singularis testis fuit, quæ potius, non vt plærunque fieri consuevit, insolentem se ac ferocem, non vindictæ, & vltionis cupidum, sed clementissimum erga victos præbuit. Per totum itaque hoc quadriennium totam belli molem propè solus cum paucis suorum sustinuit, nullis tum adiutus externis auxiliis: & tamen sæpius cum hoste congressus, nunquam vi-

ctus, semper victor fuit. Nam quantum ad auxiliares illas Germanorum, Helueticorumq; meorum copias attinet, quæ ad te, anno LXXVII. aduenerunt, numerosissima licet illæ fuerint, tamē (vt notum est omnibus) cum diuino iudicio tum hostium dolis atque fraudibus subito ac vno quasi momento fuerunt dilapsæ: quo ipse Deus proculdubio significare & tibi & mihi voluit, non in humanis copiis, atque viribus, sed in sola Dei potentia ac misericordia salutis spem omnem nobis esse reponendam: nec vt Salomon, inquit, in multitudine exercitus victoriam belli consistere, sed de Cælo fortitudinem esse.

Sed ne quod ei tentationis, & afflictionis genus deesset, coniunx quoque eius aduersus illum tum vi tū dolis insurrexit, & copias, exercitumq; misit, ei bellum intulit, donec tandem conatus illius fuerunt repressi, & ipsa à Rege defuncto fratre suo in quandam Arterniæ arcem, tanquam in custodiam fuit traducta. Itaque vt lobum olim singulare illud patientiæ exemplum, ita hunc quoque tuum Regem vxor eius afflixit: ita vt quæ ei omnium ærumnarum, laborum, periculorumque socia, & solatio esse debuerat, eius potius insidiatrix, & oppugnatrice extiterit. Accessit denique ad cumulum maximorum malorum, atque miseriarum Condæi fortiss. principis & fratris chariss. ac fidelissimi mors subita, immatura, & indignissima. Quam quæso grauem, & acerbum hunc illi casum putas fuisse, socio illo & comite studiorum, periculorumque suorum à se tam subita indignaq; morte orba-

te orbari?

Quid dicam de comitiis illis Blæsiis, quæ à Regni quibusdam ordinibus, atque proceribus, Regis defuncti auspiciis, & auctoritate, in medio in bello contra Regem istum tuum potissimum indicta fuerunt agitata, ad quæ huic tuo Regi aditus fuit interclusus, cum tamen ipse tanquam primus Regij sanguinis princeps, Regniq; heres, iis potissimum interesse debuisset. Illa verò Comitia tota videbantur ad exitiū, interitumq; illius esse comparata, vnde etiam illis nondum finitis maximus aduersus illū missus est exercitus, cui tamen opē auxiliōque Dei exercituum, maiorem calamitatem inflixit, quàm ab illō acceperit, multa quoque castella, arces, atque oppida cepit: ita vt quò maiori contentione hostes illum oppugnarunt, & opprimere fuerunt conati, tantò maior semper virium ei facta sit accessio. Nunc autem recognoscas quæso mecum quis Comitiorum illorum exitus, & quæ fuerint consecuta. Admiranda profectò seu stupenda fuisse illa Dei iudicia atque miracula vidimus: & fuerunt mirabilia in oculis nostris. Cum enim Rex tuus in maximo rursus discrimine versaretur, desperatā, deploratāq; res illius esse viderentur, cum noui exercitus, nouæ vires aduersus illū instruerentur, ipse spe omni auxiliij humani esset destitutus: ecce subito ac improuiso præter omniū spem & opinionem Deus illi opem tulit. Illi enim ipsi, qui præcipui fuerāt omnium istorum malorum, atque turbarum auctores, quasi hereditarij, qui exitium Regis tui spirabāt, qui prin-

cipem in Comitibus illis dignitatis potestatisque
 locum tenebant, gratia & auctoritate plurimum
 pollebant, qui noua moliebantur aduersus Re-
 gem tuum consilia, quorum inuicta quodam-
 modo adhuc & inexpugnabilis videbatur esse
 potentia, qui maximis cincti & stipati erant
 praesidiis humanis, ita ut ab omni periculo pla-
 ne immunes esse viderentur, hi inquam omniū
 grauissimi, potentissimi, immaniſſimi que illius
 hostes, illo absente, inscio, & ignaro, Regis de-
 functi Henrici I I. iussu & mādato, qui praeueni-
 re eos, quā praeueniri ab eis prudentissimē ma-
 luit, partim trucidantur ut meriti sunt, partim
 comprehensi in vincula, atque carceres conii-
 ciuntur. Ipsi illi consiliorum, atque malorum o-
 mnium architecti, horrendis sed bene meritis
 modis confossi, iugulati, capite truncati, com-
 busti, & in profluentem proiecti fuerunt: (cuius-
 modi variis suppliciorum generibus immerito
 innumerabiles pios homines affecerūt.) Suppli-
 ciū praeterea illud statim Reginae matris (socrus
 tui Regis) mors fuit cōsecuta: in quo ipso quoque
 singularem erga te Dei prouidentiam, atque
 clementiam satis admirari non possumus.

Quatriduo post sublatos Guisios, Rex tuus
 Niorium, nobile Pictauiensis agri oppidum,
 commodissimo loco situm, unico ē suis deside-
 rato milite, capit: quo capto alia non pauca de-
 ditionem fecere. Cum verò simili animi ardore
 & impetu ad maiora properaret, subito in pleu-
 ritidem, acutum sanē periculosūque morbum
 incidit, quem continuis & immodicis laboribus
 contraxerat.

cōtraxerat. Sed Deus, in quo ille sperare, quém-
que assiduís, & ardētibus precibus inuocare non
destitit, ceu verus animi corporisq; medicus ve-
rè medicā & salutarem ei manum suam, despe-
rantibus iam ferè de eius vita medicis omnibus
porrexit, illúmque præter omnium spem illo
mortis periculo liberavit, pristinaq; valetudini
restituic.

Cùm autem Rex tuus defunctus, post cædem
illam Guisianā frementibus atque freudentibus
passim in toto regno tuo cōiuratis, deficientibus
ab illo aliquot prouinciis, & ciuitatibus regni
primariis, in summis difficultatibus, angustiis,
atque periculis versaretur, statim reuocatis illis
copiis, quæ ad Regem hunc oppugnandum, &
opprimendum missæ fuerant, ipsius opem, auxi-
lium, præsidiumque aduersus hostium suorum
vim, & impetum petiuit, quem ille adhuc siue li-
bens, siue coactus (id enim soli Deo notum, cui
humani cordis recessus intimi perspecti sunt at-
que cogniti) acerrimè oppugnauerat, vel certè
oppugnari permiserat. O Deus immortalis,
quàm inscrutabilia sunt tua iudicia, quàm im-
peruestigabiles sunt tuæ viæ? Quid enim quæso
fuit admirabilius quàm Regem tuum defunctū
ad eius opem, auxiliūque, tanquam ad fidū
sua post Deum salutis portum confugere, quem
antea infectatus fuerat? Hunc contrā nunc vl-
trò accersit, & aduocat. Rex itaque hic tuus pro
incredibili constantique sua erga Regem suū,
regnūque charitate, omnium oblitus offen-
sionū, & iniuriarum, non sine magno perica-

lo, cùm non parua essent maximorum periculorum suspiciones, cum copiis suis statim nulla mora interposita accurrit, regique suo iacenti & afflicto (ad quem paulo antè omnis ei interclusus fuerat aditus) magna animi alacritate succurrit, & opitulatur. Hi itaque duo reges animi copiisque coniunctis, communibus suis hostibus fortiter aliquandiu sceleratèque resistunt, non sine magno hostium quidem damno, atque dedecore, suo autem totiusque regni honore, atque commodo. Sed, pro dolor, non multò post, duo hi Reges, morte alterius, rursus à se inuicem fuerunt distracti. Nam monachus ille Iacobita quasi alter Sinon, Lutetia prodians (qui, vt audio, ab initio captus parum abfuit quin in flumen præceps fuisset datus) fictis literis, ficto, fucatoq; vultus, sermone, gestibus, fidei, amoris, honoris, & amicitiae specie, ac simulatione (vt est fucatum & hypocriticum istud hominum cucullatorum genus) Regem tuum in ipso conclavi suo, quo ab illo fuerat intromissus, letali vulnere afficit, quo paulò post ille fuit extinctus. Facinus horrendum, ingens, nouum, & ante illum diem inauditum. Nullum enim tuorum Regum populi coniuratione cæsum fuisse legimus. Quis hic quæso non item admiretur admiranda seu stupenda potius Dei iudicia, qui Regem tuum à monacho potissimum sauciari, atque interim noluit, quod hominum genus ex fraudibus, atque fallaciis totum conflatum, ei carissimum semper antea, & familiarissimum fuerat: séque ab illiusmodi hominibus ad reformata

mata

mata religionis odium, & persecutionem incitari passus fuerat.

Mortem porrò Regis tui subitam, & improvisam, maxima consecuta est animorum in aula, totòque exercitu perturbatio, ac consternatio. Et tamen Deus (qui pro immensa, ac infinita sua bonitate, atque potentia ex malis quibuscumque potest elicere bona, & mala quævis ad bonum finem, vsumque conuertere) immani illa nefariaque cede, illo vulnere, illa prioris tui Regis morte, nouo huic tuo Regi ad nouam hanc eius dignitatem, viam, aditumque (qui illi omnino videbatur esse obstructus & interclusus) patefecit. Sic enim, vt Dionysius Areopagita rectè dixit, diuina prudentia his quoque, qui mali sunt, benè vtitur, ad aliquam videlicet vel ipsorum, vel aliorum siue priuatam, siue communem utilitatem. Admirabili igitur Dei ope atque virtute hic tuus Rex præter omnium hominum spem, & expectationem, imò contra multorum potentissimorum hostium suorum voluntatem, atque conatum in excelsa hoc & sublimi dignitatis gradu collocatus est. Et, vt olim quo maiori studio, atque contentione cum Iosephum fratres eius, tum Dauidem Saul socer, & Absolonius eius filius, permultique alij, cum aperti, tum occulti hostes, omni honoris, dignitatisque aditu prohibere fuerunt conati, tanto magis vtrumque ad summum honorem, dignitatemque promouerunt: sic quò magis plurimi inuidi, maleuoli, & inimici, hunc tuum Regem non solum omni dignitate, sed vita quoque ipsa spoliare sunt con-

ti, tantò magis illum ad amplissimam hanc dignitatem prouexerunt.

Venio igitur nunc ad Regis huius tui vocationem, hoc est, post superioris obitum in Regno tuo Gallico successionem: quam nò iustam solum, & legitimam, sed etiam admiratione dignissimam esse omnes coguntur confiteri, ita ut nemini dubium esse possit, quin Deus ipse singulari quodam consilio illum potenti sua dextera, atque brachio ad summum & amplissimum hunc honorem, dignitatémque perduxerit. Ac legitimam quidem, iustamque esse hanc eius in Regno tuo successionem facillimè comprobari potest: de quo etiam luculenta quèdam doctissimorum virorum extant scripta, atq; testimonia.

Nam primum quidem, cum Regna, & imperia alia sint electiua, alia hæreditaria, alia successiua: constat Regnum tuum Galliarum neque electiuum, neque hæreditarium, aut verè patrimoniale, sed merè successiuum esse: ita ut Regi defuncto illo momento mortis subrogetur primogenitus, vel proximior agnatus: cui Regnum debetur ex sola lege, vel consuetudine Regni, à qua sola ius illud accipit, & non à patre, vel alio prædecessore. Ab hac autem Regni tui Francici seu Gallici successione, arcentur lege Salica, à Pharamundo vsque annos iam propè ducentos & mille religiosissimè semper culta (cuius hæc sunt verba: De terra Salica. i. Francica, in mulierem nulla portio hæreditatis transit, sed hoc virilis sexus acquirit) seu, ut alij volunt, perenni & perpetua ipsius Regni tui consuetudine, non filij tan-

lia tantum, sed etiam ex filiabus descendentes masculi à Regni successione penitus remouentur & excluduntur in perpetuum. Regnum enim Franciæ est ita nobile & clarum (vt ait Cosinus Guimerius Regis quondam consiliarius) quod in eo nunquam succedit fœmina. Et, vt Chapanus prætor Parlamenti Burgundiæ testatur, In Regno Francorum non succedunt fœminæ, ex speciali consuetudine ipsius Regni: & non extantibus masculis, alij consanguinei in Regno secundum prioritatem gradus, in linea masculina, exclusis fœminis, succedunt. Et si contingeret, quod tota domus Franciæ moreretur, & itaret vnus de sanguine antiquo, etiamsi esset in centesimo gradu, talis iure sanguinis & antiquæ consuetudinis succederet iure hæreditario, & non per electionem. Hinc ergo apparet agnatos Regis quantumuis remotos, excludere natos ex filia Regis. Huius autem quædam proferuntur iudicia, vt res iudicatæ, quæ legis vim obtinent. Sic enim primum Philippo I v. Pulchro, Regi Franciæ & Nauarræ vnâ cum trib. filiis Regibus sine masculis liberis mortuo successit in Regno Franciæ non eius filia Isabella Regina Angliæ, neque Isabellæ filius Eduardus I I. sed Philippus v I. nepos Philippi I v. ex fratre Carolo Valesio. Deinde Ludouico x. Hutino (qui Philippi Pulchri filius primogenitus fuit) non successit in Regno Francorum Ioanna filia Nauarræ Regina, aut Carolus Rex Nauarræ eius ex hac nepos, sed frater Philippus v. Longus. Præterea Philippo v. Longo successit frater Carolus I v.

Pulcher, non autem filiarum aliqua. Huic Carolo, IV. qui Rex Franciæ & Nauarræ fuit, mortuo, Ioanna filia Ludouici X. successit in Regno Nauarræ (ad quod etiam admittuntur fœminæ.) Sed in Regno Franciæ ei neuiquam successit, sed Philippus VI. filius Caroli Valesij quarto gradu. Ad hæc Caroli VII. successor fuit Rex Ludouicus XII. tanquam agnatus proximus non Anna, Caroli VIII. soror, Borbonij Ducis relicta. Huius ratio redditur quia si nati ex filia Regis ad Regni successionem admitterentur, nulla certa esset Regni familia, ius Regiæ familiæ tributum euanesceret, quia Regnum defultoriè ab vna familia in alteram transferretur: Et ob eandem causam priuilegium generi, posterisque alicuius concessum negatur ad eos qui ex fœminis nati sunt, pertinere: alioqui priuilegium ipsum euanesceret. Hinc Chassaneus quoque, Lib. I. de Repub. Galliæ. nullo tempore visum est ait, per fœminam Francorum imperium moderari. Et Io. Feraldu; gloriari, inquit, debent Franci, sicut ille Thales Milesius, qui maximas gratias se agere dicebat, quod vir esset, non fœmina. His adde quoque Claudij Sessellij, qui Ludouici XI. cōsiliarius fuit, testimonium; cuius hæc sunt verba: Primò quidem, inquit, singulare est illud, quod ad solos masculos Galliæ defertur imperium. Salicam vocant eam legem, qua id cauetur, & optimo quidem consilio: Si enim fœminæ succedant, fieri posset vt in externi alicuius potestatem summa rerum perueniat: in quo permultum sit futurum incommodi. Nam

is, cum

is, cum & educatione, & moribus, & lingua, & ingenio differat, à natura ipsa diligere quodammodo cogitur, & in rebus omnibus præferre suæ nationis homines, iis honores, & præfecturas, & ubicumque est aliquid emolumentum communicat: qua quidem ex re necesse est graues oriri offensiones, ac inuidiam, cum multitudinis, tum nobilitatis. Quum verò soli masculi locum habent, certus ac perpetuus est hæres; quoniam qui genere proximus est, is indubitè succedit, eūq; populus reueretur, ac colit, ut magistratū suum legitimum, etiamsi remotiori gradu distet ab eo, qui decessit: Quod nuper vidimus, inquit, mortuo Carolo VIII. atque etiam Ludouico XII. Et quanquam aliquando vehementissimæ dissensiones, grauissimæque bella videntur ob eam rem extitisse: tamen ius tandem obtinuit, eoque res deducta, & legibus ad eum modum est confirmata, nihil ut posthac turbæ sit idcirco metuendum, nulla etiam ut dubitatio refrdere deinceps possit.

Hæc quum ita se habeāt, ne tibi, quæso, Gallia, diutius fucum fieri patiaris ab iis, qui contra certissimum hunc morem, & antiquissimam consuetudinem Regni tui ius & possessionem, etiam ad eos, qui ex fœminis descendunt pertinere existimant: quod quidem quid est aliud, quàm omnia iura, leges, consuetudines, & res iudicatas Regni euertere? Cogitabis etiam hîc, id quod sanè cogitatione & animaduersione est dignissimum, quod si fœminis quoque, aut masculis qui ex iis descendunt, ad Regni successio-

nem aditus pateret, tamen idè Regi quoq; tuo id optimo iure deberetur, cùm is, vt supra demonstratum est, non modò paternum, sed etiam maternum genus quodàmmodo à Ludouico Sancto & ceteris tuis antiquis Regibus ducat: ita vt Regni tui Franciæ, atque Galliæ, secundum vtrumque genus vel maximè sit capax. Exclusis igitur penitus ab huius Regni successione fœminis, & iis qui ex illis descendunt, iuncta legem Regiam, & perpetuam Regni consuetudinem, Rege mortuo, ad filium eius primogenitum: vel hoc prēmortuo, ad nepotem eius Regni successio peruenit. Sin verò sine filio aut nepote decesserit, & in eius stirpe masculus esse desierit: tunc ad proximam Regiæ gentis stirpem eodem primogenituræ ordine seruato Regni successio transfertur. Lex enim Franciæ non liberos, sed primogeniti primogenitum: & deficiente prima stirpe secundæ stirpis primogenitum, & eius primogeniti primogenitū vocat disertissimè. Proximus autem legē Regia definitur non gradus, aut ætatis, sed lineæ, & ordinis successionis prærogatiua. Nam cùm proximus in iure dicatur quem nemo antecedit, proximus in successione non utiq; is est censendus, qui defuncto est proximus, sed quem nemo antecedit in defuncti successione. Accidit enim interdum vt aliquis lineæ, siue stirpis, & ordinis successionis respectu sit proximior, qui tamen gradu est remotior, & contrà quis agnationis gradu sit proximior, qui lineæ gradu sit remotior, vnde nepos ex primogenito præferendus filio secundo genito, siue

patruo.

patruo.
tionis f
gnation
nem vo
nique
Rege
muni g
Genar
tūm st
mascul
mo in
interm
Atque
gni tu
Nam
defini
Franc
stima a
in Reg
præfer
ptæ le
tam e
ri & g
inscul
ta (qu
lurec
Franc
nem
est al
qui n
anim
leges

patruo. Agnati igitur Regum nequaquam agnationis suæ iure succedunt, sed iure stirpis, & pro-
gnationis: neque tanquam agnati ad successionem vocantur, sed tanquam prognati: neque denique causam, & titulum, & ius successionis ab Rege nouissimè defuncto accipiunt, sed à communi gentis auctore, & principe, quem Græci Genarchum, Latini genitorem vocant: iure tantum stirpis, & progeniei deferuntur: hoc est, ei masculo, qui ex communi gentis auctore, & primo inuestito prognatus, nunc sublati omnibus intermediis, proximum ab eo gradum obtinet. Atque hæc quidem est perennis & perpetua Regni tui consuetudo, quæ Lex Regia appellatur. Nam Lex Regia seu Francica, ut à Iureconsultis definitur, cōsuetudo ab omni ævo tacito omnium Francorum tuorum consensu recepta, & longissima annorum serie stabilita: siue ius successionis in Regno Francico. Consuetudo enim diuturna præsertim contradictionis iure confirmata, scriptæ legis auctoritatem obtinet. Hæc lex non tam est scripta, quàm in omnium eorum, qui veri & genuini sunt Franci, pectoribus impressa, & insculpta: id quod testantur Francica Parlamenta (quæ iuris Francici sunt quasi oracula) omnes Iureconsulti iuris interpretes, omnes denique Franci tui, qui vel minimam iuris sui cognitionem habent. Itaque lex hæc Regia, & patria nihil est aliud quàm totius Galliæ, & omnium eorum, qui non nomine tantum, & natione, sed etiam animo sunt Franci & Galli, hoc est, qui patrias leges, ac proinde te patriam ipsam, saluam vo-

lunt, & incolumem, perpetua consensio.

Lex hæc cum est antiquissima, tum æquitati, & iustitiæ, iuri diuino, & humano congrua planè, & consentanea: vnde verè sacrosancta, inuiolabilis, nunquam satis veneranda à Iureconsultis appellatur. Meritò etiam & Regia, patria, & Francica, & fundamentalis vulgò appellatur: propterea quod in eius salute, & Regis, & totius Regni salus consistit. Hæc est quasi vnicum Regni tui afflicti, ac tantum non funditus euerſi quasi fundamentum, columnen, & propugnaculum, qua sublata & abrogata, Regnum ipsum tuum tolli, atque conuelli sit necesse. Hanc igitur, ô Franci, qui Francos geritis animos, sartam tectam tuemini. Huius legis tanta est vis, ut etiam Regibus adimat omnem de Regni successionem testamenti factionem, hoc est ut legibus tuis minimè liceat per istam ipsam legem tuam fundamentalem, successorem & Regni hæredem nominare alium: quàm quem Deus talem nasci voluit. Quamobrem etiam si Henricus I I I. eius prædecessor, alium præter hunc Regem Regni hæredem, & successorem testamento suo fecisset & declarasset: irritum planè, & cassum fuisset hoc eius testamentum.

Huius legis virtute nunquam deficit Rex in Regno Frâcico, sed Rex semper viuit: propterea quod defunctus ipso iure successionis proximo agnato Regnum relinquit, quamuis ad Regni administrationem ineptus foret, & parum haberet Iudicij. Iuxta hanc itaque legem tuam patriam, Regiam, Frâcicam, Gallicam, fundamentalem,

talem, immutabilem, sacrosanctam, & inuiolabilem (vt passim à Iureconsultis Regni tui celeberrimis appellatur.) Rex hic tuus in Regno Gallico rectè legitimèque successit: ipso mortis articulo & momento mortuo Regi tuo superiori Henrico III. cum quo deficiente simul familia eius siue stirpe Valesia, ad Regni tui successionem ocysus vocata est familia Borbonia, quæ ex eodem fonte prodiit. In ista autem familia nemine repugnante prærogatiuam primi Principis apud omnes Francos habuit Antonius Rex Nauarræ: vnde etiam illi anno M. D. LX. Regis Caroli IX. & fratrum eius Augustissimorum, atque adeò totius Regni cura, & administratio (quam Regentiam vocatis) vt proximo agnato, ac sanguinis Regij primo principi, in celeberrimo Regni ordinum conuentu delata est, totius Regni consensu, auctoritate, & decreto. Huius itaque filius primogenitus cum sit hic tuus Rex, qui quidè iure Repræsentationis (quod naturalem æquitatem Vlpianus Iureconsultus appellat, quodque in omnibus feudis seruatur) in patris sui primogeniti locum successit, cui est dubium, quin Regiæ patriæque illius tuæ legis vi, & virtute successionis ius in hoc Regno, nunc ad illum solum perfineat?

Sed nolo pluribus de lege hac Regia, deque hoc successionis Regiæ iure verba facere, ne actum agere, aut Lucernam in meridie accendere vider, cum hæc à viris doctissimis, & iuris, legum, consuetudinum, & historiarum Francicarum siue Gallicarum peritissimis plenè pla-

néque disputata sint, & explicata: imò nulla demonstratione apud te potissimum, indigeant: & nemini Francorum ignota esse possint. Cuius iuris vestigia, ex Caroli I v. Imp. providentia (qui apud te educatus, tuis moribus & legibus institutus fuit.) Germaniæ sorori nostræ, vnica supersunt in Aurea, quam vocant, illius Bullæ: ubi seriò cauetur, vt eodem isto tuo iure in Electoratus Imperij quatuor perpetuò succedatur: hoc est Bohemiæ Regno: Comitatu Palatino, ad Rhenū: Ducatu Saxoniz: & Marchionatu Brandeburgico. Ecquis igitur quæso erit, vel adeò omnis iuris, consuetudinis, legumque tuarum rudis & imperitus, qui hunc ignoret iustum, legitimumque tuum esse Regem: vel tam iniquus, tam iniustus, & impius, qui cum id norit, tamen ei iusta debitæque obsequia, & officia præstare grauetur? Nam fieri profectò non potest quin vel is, qui hoc ignorat, brutæ inscitiz ac ignorantiz, vel is, qui scit, & tamen rebellem se, ac contumacem aduersus illum præbet, non tam humanæ, quàm diabolicæ cuiusdam malitiæ, & audaciæ (cùm humanum sit peccare, diabolicum in peccato perseverare) meritò sit accusandus. Peccat enim grauissimè non in Regem tantum, sed in legem etiam illam Regni tui fundamentalem, antiquissimam, augustissimam, æquissimam, & iustissimam: ac proinde in ipsum tuum Regnum atque patriam, cuius quasi fundamenta quantum in ipso est conuellere conatur.

Et hæc de iusta legitimæque Regis tui ad hoc regnum vocatione, seu in Regno hoc Galli-

co suc-

co successione sint dicta: quæ ut Regi tuo maximo est in omnibus molestiis solatio, ita vel sola æquissima tibi iustissimâq; causa videri debet, cur hunc Regem, ceu naturalem, proprium, iustum, legitimûmque tuum dominum, atque Regem agnoscere, colere, & venerari debeas. Id autè facièt omnes illi, sat scio, in quibus vel gutta sanæ mentis, gutta amoris, & charitatis, gutta denique Francici, & Gallici sanguinis relidet. Contra verò, qui ei regni huius possessionem simul cum vita extorquere conantur: illi non Regem tantum, sed Regnum tuum ipsum, patriamque totam lædunt, ac violant: & idcirco gravissimo atrocissimôque sese parricidij scelere manifestè contaminant. Huius præterea ipsius legis regiz, patriæq; beneficio, Regem habes non alienum: peregrinum, externum, sed Regem proprium, nativum, domesticum, intestinum, indigenam, ex tuis visceribus excitatum: quem os de ossibus tuis, ut ita loquar, appellare potes. Aliæ gentes Reges sæpe externos & peregrinos adsciscunt, & eligunt, non sine magno dedecore, ac sine plurimis damnis atque incommodis: ut experientia ipsa testatur. Quæ de causa nō faciliè ac temerè externi & peregrini ad regnorum & rerû pub. gubernacula vocari, eligi, & admitti debent, nisi gravissimæ id causæ postulent. Quid quòd Deus ipse, populo illi suo, quasi peculio siue gregi electo & eximio præcipit, ne peregrinum aliquem Regem eligant: sed ex fratrum suorum numero, hoc est, natione Israelitam? Sic enim Deut. x v i i. scriptum est: Constituendo

constituēs Regem quē elegerit Dominus Deus, Ex fratribus tuis constituēs super te Regem: nō poteris super te constituere Regem, qui non est frater tuus. Aug. in illa verba: Verumtamen, inquit, præcepit, ne fieret alienus, sed esset ex eodem populo, indigena, non alienigena. Fuit hoc ad hunc vsque diem per tot sæcula præ cæteris propè omnibus orbis terrarum regnis, & imperiis, quasi prærogatiua tua peculiaris, ac beneficium singulare tibi à Deo, supremo omnium regnorum & imperiorum auctore, & moderatore tributum, & concessum, quod nullo peregrino & extero, sed domesticis tantum, & natiuis Regibus semper vsa es: quam ob causam tantò diuturnior, firmior & scelicior Regni ac reipub. tuæ fuit status, ac conditio. Hoc autem ipsum factum est patriæ illius, atque Regiæ tuæ legis beneficio, qua non nisi Regij & Francici sanguinis viris, non autem scæminis, aut ex scæminis descendentibus, ad Regni tui successionem aditus patet: quam idcirco tā studiosè sartam tectā tueri, & conseruare debes, quàm Regni tui perturbationem, confusionem, seu euersionem potiùs, euitare, & salutem eius incolumitatique benè vis esse consultum.

Sed ad hæc alia quoque accedunt in hac eius successionem animaduersione dignissima, quæ si diligenter, accuratèque, vt par est, perpenderis: magis adhuc cogeris confiteri, cum iustam, æquā, legitimam, tum diuinam planè & admirandam hanc eius successionem esse, Dei hominumque consensu, approbatione, auctoritatèq; confirmatam

confirmatam
Rex pr
adhuc
gem n
uit, vt
cætun
gocia
ualese
nem
suorum
cibus
ceribu
Regem
mum
nis co
que, a
tuam
timun
Rege
atque
comm
& qu
nemi
ces, d
debe
Regn
est R
psius
ipsius
Regi
conf
ne, v

confirmatam, & stabilitam. Nam primò quidē Rex prior statim accepto illo vulnere, cū spes adhuc ei vitæ diuturnioris esset non exigua, Regem hunc tuum ad se accersuit, illique mandavit, vt suas vices obiēs, principum & optimatum cœtum cogeret, ei præesset, & cuncta regni negotia tractaret & administraret, donec ipse convalesceret. Deinde verò postquam vitæ suæ finem adesse animaduertit, edita peccatorum suorum confessione, eorūque veniam supplicibus votis à Deo deprecatus, conuocatis proceribus, & principibus, coram illis hunc tuum Regem tãquam proximum suum agnatum, primum Regij sanguinis principem, sibi & sanguinis communione, & affinitate, & nomine quoque, atque ætate coniunctissimum, iuxta ipsam tuam regiam legem atque patriam, iustum legitimūque suum successorem, regni heredem, Regem denique tuum coram regni ordinibus atque proceribus declarauit, illūque eis vnice commendauit, & hanc quidem tūc postremam, & quasi cygneam vocem edidit: cū dubium nemini sit, quin eorum qui morti sunt vicini voces, dicta, monita atque testimonia plurimi fieri debeant. Etsi verò, vt suprà demonstratum est, Regnum quod agnato proximo defertur, non est Regis morientis patrimonium, neque ex ipsius volūtate & iudicio successorī defertur, sed ipsius legis patriæ institutis, & moribus, tamen Regis illius tui prioris legitimi, in agone mortis constituti, de legitima huius tui Regis successione, verum, luculentūque testimonium negari

profectò non potest, quin maximi momenti, ponderis, ac oraculi cuiusdam instar, sit existimandum. Sed illud prætereà maximam apud me admirationem habet, quòd Rex ille superior qui paulò antè, siue coactus & inuitus, siue à coniuratis illis incitatus, (vt plerique existimarunt,) maximas & instructissimas copias ad eum opprimendum, & exterminandum miserat, mox eum iustum legitimumque Regni hæredem ac successorem, Galliæque tuæ Regem declarat, omnes ad ei parendum adhortatur, ei quasi coronam imponit, & Regnum hoc tanquam lampada tradit. An non hæc ipsam Dei manum & dexteram omnipotentem effecisse, & Regis illius animum ad id flexisse firmiter est credendum?

Iam verò post Regis obitum, nonne in communi & maximo illo luctu, ac mœrore, is qui antè Rex Nauarræ solùm fuerat, statim omnium Principum, Ducum, Parium, Marschallorum, Comitum, Baronum, Nobilium, & Militum, quotquot aderant, vnanimi consensu, faustissimæque acclamatione Rex Galliarum appellatus, & salutatus fuit? Prætereà vt olim belli tempore non solùm apud Romanos, sed etiam in hoc ipso tuo Regno, vel in ipsis castris, nouos statim Reges, & Imperatores ab exercitu, & ducibus salutatos seu appellatos, & (qui mos apud maiores tuos, Reges inaugurandi vsitatissimus fuit) scutis impositos, eleuatos, & circum gestatos fuisse legimus: (vnde tria illæ dicendi formæ, aliquem in Regem eleuari, sublimari) ita belli

belli hu
cosissim
hic tuu
applau
ctus fui
rum tu
(quod
eorum
paucos
Regem
imò ce
bus fui
rant, e
obstrin
gnes v
tus De
minun
obsequ
uitates
cessori
rant, l
vltro
fidem
licent
Regi
se ded
ctunt
que l
in R
Nam
se Au
dent

belli huius tempore periculofissimo, & calamitofissimo, in iplis castris, iuter media arma Rex hic tuus totius exercitus voce, suffragiis, atque applausu, ad amplissimum hunc honorem euectus fuit, ita vt nihil hic factum sit contra maiorum tuorum exempla, & instituta. Quid dicam (quod satis mirari non possurus) quòd plurimi eorum, qui infestis animis armisque illum ante paucos menses oppugnaverant, eundem nunc Regem ac dominum suum, iustū, & legitimum, imò ceu patrem, ac patronum optimum vocibus suis profitentur, proclamant, atque declarant, ei dant nomen, seque sacramento militari obstringi patiuntur? Quemadmodum igitur magnus vi quadam insita attrahit ferrum: ita Spiritus Dei, qui verè est flexanimus, quorumuis hominum corda, dura licet, emollire & ad Regi suo obsequendum flectere atque mouere potest. Ciuitates quoque & prouinciæ illæ, quæ in prædecessoris fide & obsequio constanter permanferant, huic quoque statim ceu legitimo suo Regi vltro ac libenter sese submitunt & subiiciunt, ei fidem, officia & obsequia sua deferunt atq; pollicentur. Aliæ quoque ciuitates, quæ præcedenti Regi aduersatæ fuerant, huic obsequuntur, ei sese dedunt, imperium eius suscipiunt, & amplectuntur. Quid quòd ipsum quoque tempus, atque locus quodammodo huic eius successioni in Regno suffragantur, eamque comprobant? Nam primo quidem quo ad tempus: ipse mense Augusto in Regno hoc tuo Gallico præcedenti Regi defuncto successit, qui quidem ipse

mensis Augustus sanè augustissimus huius tui Regis, siue Augusti & Imperatoris (quibus nominibus, & titulis Reges tuos fuisse insignitos annales tui testantur) bonum, augustum & auspiciatum quodammodo videtur esse augurium: & maioris forsan adhuc & amplioris dignitatis præfagium. Deinde locus quoque ipse huic eius dignitati suffragatus est. Is est oppidum Sancti Clodouæi, quod non procul à Lutetia Parisiorum totius Regni metropoli, & ab oppido S. Dionysij (quod clarum est monumentis Regiis) distat: in quo superior quidem Rex Monachus illius cultro venenato cōfessus, hic verò, Rex tuus primùm declaratus & salutatus fuit. Sic autem oppidum illud à Clodouæo Rege conditore fuit appellatum, cui Anastasius Imperator tunicam purpuream, siue, vt tum loquebantur, blateam, & coronam auream multis vnionibus distinctam misit: Is autem Caunacarium Cameraensem, & Atrebatium regulum, quòd se verum Regni hæredem diceret, & eius simul fratres, & totam familiam è medio sustulit: & omnes ferè Gallias, sub ditione sua tenuit. Videtur ergo hic ipse locus Clodouæi illius primi Galliarum Regis Christiani nomine insignis, boni esse huic tuo Regi ominis, & auspicij iudicium. Multis igitur nominibus, siue legem Regiam, & consuetudinem patriam, siue personas, siue locam, siue tempus, siue alias circumstantias spectes, cum iusta, legitima, vere Regia, tum admirabilis ac planè diuina huius tui Regis in hoc Regno successio censerì, & iudicari debet. Illa enim sunt
potius

potius spectanda quàm externi quidam ritus & ceremoniæ ante aliquot sæcula vsurpari solitæ.

Quid dicam quod silentio prætermitti hîc minimè debet, quòd paulò postquam ad Regiam hanc dignitatem fuit euectus, Deus illum rursus ex præsentissimo mortis periculo eripuit, quam illi audacissimus quidam nebulo, diabolico furore incitatus, & impulsus, sclopeto intentauerat: quod ipsum non leui est argumento, Deum hunc tuum Regē diutius viuere, patrieq; tuæ præesse simul ac prodesse velle. Postremò Deus Opt. Max. hanc verā, iustam, legitimamq; Regis tui in Regno Francico successionem, felicissimo rerum eius omnium, contra hostium suorum conatus, successum, multis præliis secundis, victoriis admirandis, plurimarum urbium, oppidorumque expugnationibus, ac deditionibus, denique quotidiana plurimorum, qui alieni ab eo fuerant, reconciliatione, multifariā comprobauit & comprobatur adhuc quotidie. Prætereà illud quoque velim consideres, quod hic tuus Rex nō solum ex regali tam materna, quàm paterna prosapia ortum suum ducit: sed etiam quod iam antea regali functus est munere, regalis eius fuit status, atque conditio. Et vt olim duo hæc Regna Francicum & Nauarrenum fuerunt coniuncta, imperantibus nimirum Philippo i v. Pulchro eiusque filiis, Ludouico x. Hutino, Philippo v. longo, & Carolo i v. Pulchro (qui omnes Franciæ simul & Galliæ Reges fuerunt) ita Deus admirabili suo consilio eadem nunc denuò coniungi voluit: vnde maxima in-

colarum vtriusque Regni cōiunctio, atque concordia & vtilitas etiā est speranda.

Præterea ætas quoque tui Regis ad imperandum apta valde, atque idonea magnam tibi optimi rerum status spem facere, illūque gratum valde & acceptum reddere debet. Nostioraculum illud diuinum: Væ terræ, cuius Rex puer est: Et hoc quidem tute ipsa si vlla vquam prouincia cum maximo certè tuo damno, & quasi naufragio per multos iam annos optimè es experta: quando post Henrici II. Regis tui obitum, filij eius adhuc ferè pueri in Regno hoc ei ex ordine successerunt: quorum pueritia callidi & astuti quidam homines, & ij quidem extranei, ad totius Regni damnum, pestem, atque perniciem abusi fuerūt, eiūsque perturbandi ac tantum non euertendi inde ansam arripuerunt. Est igitur quod hic quoque agnoscas singularem Dei prouidentiam, clementiam, atque curam paternam, qui regem tibi dedit difficillimis periculosisque istis temporibus eius ætatis, quæ est media, constans, matura, florens, planèque regia, hoc est ad bene regnandum opportuna valde, atque commoda. Vitæ præterea antea cte cursum adhuc eum tenuit, vt maximam meritò laudem, atque gloriam sit consecutus. Porro regis tui cani, qui præter ætatem in illo conspiciuntur, primò quidem indices sunt atque testes innumerabilium eius curarum, molestiarum, solitudinum, laborum, atque periculorum, quæ ille pro salute tua adhuc fortissimè, foelicissimèque exantlauit, atque perpeffus est,

iuxta

iuxta tritum & peruulgatum illum versiculum,
Cura facit canos, quamuis homo non habet an-
nos. Quam ob causam hi ipsi canes tibi meritò
caritèque ad iustam debitamque gratitudinem,
atque caritatem illius meritò impellere debent.
Deinde hi iidem canes quasi flosculi quidam iu-
cundi & amæni, signa sunt venerabilis, canæ, at-
que maturæ illius sapientiæ; & idcirco te ad
eundem venerandum, atque colendum exsti-
mulare debent.

Iam, quid dicam de corporis illius regia sanè
egregiæque forma atque statura? Annon frons
lata, supercilia decora, & elata, oculi cæsi, nasus
aquilinus, qualis olim Cyri, vultus illius totus est
regius, regiæque præ se fert dignitatem, & M.
Cataldi Finnatis antiquam prædictionem? Etsi
verò ut in omni homine, ita in Rege potissimū
quoque atque principe, nō tam corporis, quàm
animi forma atque pulchritudo (quæ nihil est al-
liud quàm virtus) spectari debet: tamen gratior
est pulchro veniens è corpore virtus, ut poëta
ille cecinit. Et ut Lucianus ait, ea demum per-
fecta est pulchritudo, quando concurrit in idem
animi virtus, & corporis forma pulchra & ele-
gans. Nam corporis pulchritudo sine virtute,
nihil prodest, sed potius obest: ut Saulis, Abso-
lonis, Priami (cuius species digna fuisse dicitur
imperio) Alcibiadis & aliorū exempla docent:
qui eleganti corporis specie barbaricam tegan-
tes crudelitatem maxima damna regnis impor-
tarunt. Vnde Socrates pulchros, virtute vacuos,
dicebat habere pulchram nauem, sed gubernam-

torem malum: vnde nil expectandum nisi naufragium. Persæ tamen, qui cœleste aliquid & diuinum Regibus inesse statuebant, iisq; diuinos tribuebant honores: idè enixè dabant operam, ne quid in eorum forma & specie deforme, & indecorum appareret. Si quid igitur in Regum filiis erat prauum, atque distortum, dabatur ea cura certis mulieribus, quæ dum corpora erant tenera, & emendari poterant, ea quodammodo fingerent, & ad rectitudinem sensim, & lentè reuocarent. Indignum enim censebant Regis nomen, apud illos sanctissimum, aliqua corporis insigni prauitate deformari. Sic *Æthiopus* olim, qui supra *Ægyptum* habitabant, legimus eum Regem eligere fuisse solitos, qui omnibus corporis proceritate anteiret: cum ius statueret illum dignitate omnes vincere, quem natura specie & magnitudine præcellentem finxisset. Plura ex prophanis literarum monumentis exempla proferri possent. Quid quòd in sacris quoque literis *Dauid* cum manu fortis, tum vultu pulchro, amœno, & amabili fuisse dicitur: vnde etiam nonnulli sic volunt fuisse dictum. An non idem de Rege tuo verissimè dici potest, qui cum manu est fortis, & robustus, tum vultu aspectuq; eleganti, pulchro, iucundo, & amabili: qui quous ad se amandum allicit, & inuitat, ita vt *Pulchri* cognomen illi meritò tribui possit, ob eximiam animi, corporisq; pulchritudinem. Hoc idem olim cognomentum habuit *Carolus* IV. & pater illius *Philippus* III. *Philippi* III. *Audacis* filius, *Ludo. S. nepos*, & successor: qui à Bonifacio

nifacio Papa fuit excōmunicatus anno M. CC. LX XXV I. quique Palatij Parisini cōditor fuit, quo imperante collegium Nauarrenum à Ioanna Regina Nauarræ eius vxore, institutum, & fundatum fuit: Et Carolus IIII. eius filius, qui floruit anno CIO. CCC. XXI. qui ambo Franciæ simul & Nauarræ Reges fuerunt: quibus nunc addi potest tertius, hic tuus Rex Pulcher, animo & corpore pulcherrimus Franciæ & Nauarræ Rex.

Præterea ad tam arduum, difficile, & laboriosum munus alacriter obeundum, corporis quoque; non sanitas solum, ac valetudo, verum etiam robur, atque vires requiruntur. Nam si Rex fuerit imbecillus, & infirma valetudine præditus, nullo modo tantum Regni onus atque pondus sustinere poterit. Mixtam alacritatem ad res acriter & animosè gerendas corporis cum sanitas, tum infirmitas atque robur affert. Etenim vt corpus infirmum animi vires frangit atque debilitat: Ita robustum validumque corpus animum acriorem animosiorémque reddit, multoque; magis in omni labore, & periculo confidentem.

Habes ergo, ô Gallia, singulari Dei beneficio Regem non animo solum, sed etiam ore, vultu, corpore pulchro, formoso, sano, validoque præditum. Quæ quidem ipsa corporis & pulchritudo, & sanitas, & robur, cum animi illius insignem pulchritudinem, sanitatem, atque robur indicant, tum maximo illi ad tot tantaque munera, atque negotia bellica præsertim gnauiter, strenuèque obeundum, sunt adiumento. Hanc

autem naturalem corporis sui constitutionem sanam, elegantem, ac robustam cum sobrietate, ac cibi potusque temperantia singulari, tum honestissimis & utilissimis quibusdam exercitiis non conseruauit solum, sed etiam auxit atque firmauit. Duo autem sunt corporis exercitia verè regia, quibus tuus hic Rex ab ineunte ætate deditus fuit, nempe pilæ ludus atque venatio. Ac pilæ quidem ludum, qui corpus reddit agile, alacre, robustum, sudoris, atque laboris patiens, Regium esse ludum clarissimorum celeberrimorumque Regum ac principum, vt Dionysij Syracusani, Alexandri M, Iulij Cæsaris, & Meccenatis (qui antiquo regum Hetruscorum genere oriundus, omnes virtutes regias habuisse scribitur) exempla docent: quos literis memoriæque proditum est illo crebro vsos, ac magnopere delectatos fuisse legimus. Quod ad venationem attinet illa quoque exercitatio est Regia, & imperatoria, quæ cum bello, & militari arte, atque disciplina maximam cognitionem, & affinitatem habet: quemadmodum Xenophon nobilis ille scriptor in Cyri Regis pædia pluribus explicat. Sunt enim vt pauca quædam ex illis attingam, in venationibus nemorum lustra peragrandæ, sylvarum exitus difficiles explorandi. Item qui venandi studio de multa nocte vigilant, feris insidias moliuntur, saltus omnes obsident, exploratores in speculis disponunt, alas scienter instruunt, equitando, currendo, prosiliendo feras insequuntur, eas telo confodiunt, communi strepitu progressui atque receptui canunt, dant signa prædæ

gna prædę, atque victorię: (vnde venatiō bello acpugnę est simillima) niues, frigus, æstus, sitis, inēdia, lassitudo, multaque alia incommoda eius modi perferenda: (quę quidem venandi studium paulatim facilia reddit,) multaque alia facere solent, quę à bellicis laboribus & disciplinis non sunt aliena. Huiusmodi corporis exercitationibus cū Rex tuus fuerit à pueritia deditus, mirū profectō non est illum tam eximia corporis non sanitate solū, sed firmitate etiam atque robore frui, ad quosuis dolores, labores, atque molestias sustinendas, ac superandas idoneo. Hinc illa frigoris, caloris, inedię, vigiliarum, armorum, atq; laborum militarium incredibilis patiētia: quam omnes nō satis mirari possunt. Graues adhuc meo quidem iudicio maximique momenti atq; ponderis, ô Gallia, gratulationis meę de nouo hoc tuo Rege causas intellexisti: quę eadem tibi quoque ad illum summa charitate, obseruantia, & obedientia complectendum grāuissimę iustissimęque causę, atque rationes & videri & esse debent. Regis enim huius tui (vt breuiter ac summatim ea quę adhuc dicta fuerunt repetam, atq; complectar,) Regij & egregij sunt natales, Regium natale solum, regius Baptismus, regia nomina, regij parentes, atque maiores, regium genus tam maternum, quā paternum, regia educatio, regia patrij, atque hæreditarij regni susceptio, & gubernatio: regia & egregia in hoc bello ciuili, & intestino facta, dicta, victorię, trophęa: regia iusta legitimęque eius est post superioris regis mortem successio: regia est illius

xtas: regia corporis totius forma, ac constitutio, An non hæc quæso, (quorum omnium te ipsam testem appello,) firma sunt solidæque argumenta hunc tibi Regem diuinitus cœlitusque esse datum? (vnde meritò Adeodatus cognominari meretur, quod Philippi II. Angusti. filij Ludovici VII. cognomentum fuisse accepimus) ac proinde illum tanquam verum, iustum, legitimumque Regni Francici hæredem, ac successorem regem, regia hac dignitate dignissimum, fide, amore, beneuolentia, & obseruantia summa tibi colendum esse? Venio nunc ad regias & egregias illius virtutes, propter quas vel solas Regno hoc, regiæque maiestate, & amplitudine dignissimus est iudicandus. Itaque etsi hic non esset Rex tuus proprius & naturalis, iure, lege, consuetudinèq; Regni perpetua tibi natus, tibi destinatus, & additus: essetque regnum tuum non successiuum, sed electiuū tibiq; alterius alicuius Regis, sine legis tuæ patriæ atque regiæ violatione vel in regno tuo, vel in toto orbe Christiano eligendi facultas daretur, & optio: neminem vel tua ipsa attestante conscientia præstantiorem, pluribus, & maioribus ornatum virtutibus, tibi tuisque rebus commodiorem, & vtiliorem eligere posses.

Etsi igitur præclara, eximia, planèque regia sunt illa fortunæ, corporisque (vt vulgò appellantur,) bona, quibus illum Deus cumulauit, & de quibus adhuc dictum est: tamen illis longè antecellunt animi bona, hoc est, virtutes. Virtus enim, vt verissimè, scitissimèque Cicero illud elo-

lud eloquentiæ lumen dixit, vna altissimis est defixa radicibus, quæ nunquam vlla vi labefactari potest, nunquam loco dimoueri: alia omnia incerta sunt, caduca, fragilia, mobilia, falsa, & fallacia. Hæc autem ipsa animi bona id est virtutes, cum in omnibus hominibus, tam in regibus præcipuè requiruntur, ad munus illud suum tam augustum, tam magnificum, tam amplum, tam graue, tam arduum, tam difficile, ac laboriosum, cum dignitate, fructuque sustinendum ac obcundum. Nam quemadmodum ad onera corporæ, magna præsertim, atque ponderosa, vel tollenda vel ferenda & sustinenda, magnæ requiruntur manus, brachiorum, lacertorum, ac totius omnino corporis vires: sic ad Regij huius muneris seu oneris potius omnium ponderosissimi, grauissimique, vim, molémque ita vt decet sustentandam, necessariæ omnino sunt non tam corporis, quam animi vires, hoc est, virtutes maximæ, ac præstantissimæ: de quibus multa à doctissimis sapientissimisque viris subtiliter copiosèque tradita, scripta, ac disputata sunt: quæ si quis animo cogitationeque sua perlustrabit, facile illas ferè omnes Regi huic tuo inesse perspiciet.

Si autem vis omillis multis disputationibus omnium regiarum virtutum quasi ideam & epitomen quandam, atque compendium, siue synopsis habere: proponas tibi ante mentis tuæ oculos ipsum augustum Regis nomen, cuius si vim potestatemque accuratè perpenderit, ac penitus introspexeris, facile animaduertes illo

vno tanquã fasciculo quodam omnes regias virtutes atque munera comprehēdi. Ac ipsum quidem Regis nomen Latinum, si illud diligenter, accuratēque consideraueris: omnes regias virtutes atque munia complectitur, animoque tuo, vno quali intuitu contemplanda proponit. Regem enim Latinis constat dictum esse à regendo (iuxta versiculum illum peruulgatum: Si benè regna regis, dignus sis nomine Regis) vnde Rex non incommodè meo iudicio definiri potuit, bonus & sapiens populorum rector, ac moderator: siue alios regendi gnarus & peritus: quam definitionem descriptionēque huic tuo Regi conuenire non est dubium. Regere autem, vnde Regis nomen deductum est, idem est quod aliquid in rectum finem dirigere. Rex itaque hoc quidem tam augusto nomine dignus, hoc est populorum rector, vel id agit atque molitur, vel certè id agere atque moliri debet, vt populum in eum finem, in quem intueri debet, modo & ordine atque disciplina perducatur: Is autem est, florens & beatus, reipub. status. Atque hoc ipso quidē nihil Regi tuo prius esse nec antiquius, dicta factaq; eius omnino omnia, quotidie testantur. Regere, vnde Rex latinis dictus, etiam idem est, quòd ea quæ praua, obliqua, distorta sunt, recta efficere, ad rectitudinem reuocare: vnde vernacula nostra lingua, iudex (Kuster) eleganter à regendo dicitur, quasi dicas rector seu director: eò quod iudicis partes sunt, quasuis res, causas, lites, & controuersias, quæ quasi curæ sunt, obliquæ, distortæ, & confractæ ad rectitudinem

tudine
iudica
puè su
Regis
à prau
norm
idem
stris,
studic
suum
Ex hi
comp
tantu
ficatu
magn
tiz, se
libus
gerit,
publi
domi
ter la
volup
Rege
fissim
tem,
gesti
re, q
à nen
hac F
qui c
Foru
ac pr

tudinem legum, iurisque regulam reuocare, di-
iudicare, atque componere. Hoc autem præci-
puè summi illius quasi iudicis, & rectoris, id est
Regis, est officium, vt nimirum & ipsemet rectū
à prauo discernere, & ea quæ praua sunt, ad recti
normam dirigere, atque componere studeat, &
idem à reliquis iudicibus, magistratibus, mini-
stris, & officiariis sui Regni fieri curet, summo
studio atque opera. Regere præterea, vnde Rex
suum nomen habet, idem est, quod rem gerere.
Ex his enim duobus verbum hoc videtur esse
compositum, vnde etiam ex regere transpositis
tantum literis fit gerere. Hoc ipso autem signi-
ficatur, illum deum verum esse Regem, hoc tā
magnifico titulo dignum, qui non otio & iner-
tia, sed negotiis, & actionibus bonis ac laudabi-
libus est deditus: quique semper boni aliquid
gerit, & agit: qui rem non suam, & priuatam, sed
publicam bene sapienterque gerit: qui denique
domi, forisque, in pace, & in bello, rebus forti-
ter laudabiliterque gerendis studet, nullisque se
voluptatibus à rebus agendis abduci patitur.
Regem autem hunc tuum, iuris & æqui studio-
sissimum, & ab omni otio & ignauia abhorren-
tem, benè laudabiliterque adhuc rem publicam
gessisse, ac multarū rerum gestarū gloria flore-
re, quid opus est multis verbis explicare, quū id
à nemine vel impudentissimo negari possit. Ad
hæc Rex, si vim nominis spectes, is est habendus
qui cū vniuersam rempub. Curiam, Senatum,
Forum, ecclesiam, atque religionem collapsam
ac prostratam, tum singulos Regni sui incolas ia-

centes, miseros, & afflictos, potentiorum vi, ac tyrannide oppressos, consilio, consolatione, ope, operaque sua erigere rursus, excitare, ac subleuare: deniq; corrupta, & vitiosa quęuis corrigere, & emendare sedulò studet. Atqui huius quoque officij Rex tuus multa iam omnium confessione edidit specimina, & edit adhuc quotidie. A Regis præterea nomine deriuatur regio & regia, eo quod Rex cum totam regionem, ditionemue iuri potestatique suę subiectam, eiusque incolas, tum regiam in primis suam, hoc est, aulam, domum, atque familiam pię, honestę, sapienterque & in officio continere debet. Idem de hoc quoq; tuo Rege verissimè affirmari potest, qui cum regnum tuum Gallicum, tum domum & familiam suam, aulicos suos ministros, & officarios, partim vitę suę exemplo, partim præceptis, & monitis, partim pænīs, atque præmiis in officio continere, ac coercere studet: Recte facientes diligit, honoribus augeat, præmiis afficit: delinquentes, minus officio, & exultationi suę consulentes, coercet. Porro, Rex præterea à regendo dictus, is etiam est qui seipsum regere potest & affectus suos moderari (vt doctissimi quique censuerunt) & qui se sanctis monitis ab aliis quoque regi patitur: quod vtrunq; in Rege tuo elucere omnes vident. Præterea à verbo regendi (vnde Rex denominatur) rectum deriuatur & rectitudo (ita vt rectum omne regium, & regium vicissim rectum dici possit) Rectum autem id est quod honestum, verum, iustum, legitimum, syncerum, simplex, firmum, constans:

constans: idem denique quod virtus, siue cum virtute & officio coniunctum: vnde virtus à Cic. recta ratio & recta animi affectio appellatur. Rex igitur siue rector populi est, qui recti id est omnis virtutis, honestatis, & officij est amans, studiosus, qui rectè & ex ordine cuncta in repub. facit, qui recta à prauis optimè discernere potest, qui dictis factisque rectis studet, & delectatur, à prauis abhorret, recta sectatur, praua fugit, cuius rectum est cor, recta mens, recta conscientia. Tuus itaque Rex hanc ob causam Regis titulo & honore est dignissimus, cum corde animoque sit verè regio, & recto, hoc est, fideli, simplici, sincero, & integro, iusto, firmo, constanti, forti, excelsso, ad Deum, ad cælum, ad regni salutem tuendam, & conseruandam erecto semper & excitato nō depressso, & defixo in mūdo, rebúsque mundanis, & terrenis: qui recto est oculo, recto ore corde & sermone. Recta preterea regiáque via, hoc est, patria lege, & consuetudine ad hoc regnum peruenit: recta regiáque via incedit, neq; ad dextram neque ad sinistram declinat, hoc est, ad verbum, legémq; diuinam (quæ quidem recta regiáque est via, omnis officij recta perfectaq; norma atque regula) omnia dicta, facta, consiliáque sua dirigit, & componit. Ad hæc cum Regis nomine, legis atque gregis voces, magnam affinitatem habent. Vnde legimus cuiusdam Regis hoc fuisse Symbolum PRO LEGE ET GREGE, quo significabatur ipsum legis pariter, atque gregis, hoc est, populi sui fidelem & paternam curam gessisse. Et

id quidem officium est cuiusvis Regis, ac principis, vt aimirum legum diuinarum, & humanarum, quæ regula sunt atque norma vitæ, morum, atque religionis, & in primis legum patriarum, religiosissimus sit cultor, amator, atque custos: & cum ipse leges colat, & obseruet, tum alios ad legum obseruationem incitet, & impellat. Deinde vt populi vniuersi tanquam gregis hominum, egregij & dilecti sit pastor atque custos. Id ipsum Regi tuo optimè conuenit, qui Legis pariter atque gregis sui Francici & Gallici fidelissimum sese adhuc tutorem, patronum, & pastorem exhibuit. An non ergò ex his apparet Regis nomen atque titulum huic tuo Regi optimè conuenire, cum virtutes atque officia, quorum nomen illud nota est atque symbolum, quæque Regem decent, eidem probè congruant, ita vt illum non nomine tantum, atque titulo tenus, sed re ipsa atque virtutibus, regio vt nomine, ita honore dignissimum esse constet. Sed vt de Regis tui virtutibus pergam dicere (de quibus satis dici non potest, quæque totius orbis Christiani sermonibus celebrantur) regia in primis hoc est, regibus & re & nomine conuenientissima virtus est vera religio: quam verè reginam, atque dominam, caput, & fundamentum, atque adeò quasi animam omnium virtutum appellare possumus, sine qua reliquæ virtutes sunt quasi mortuæ, ita vt ne nomen quidem virtutum mereantur. Religionis itaque Christianæ, quæ est purus Dei cultus, verbo eius, ac voluntati consentaneus: sinu, complexuque omnes reliquæ virtutes continentur.

continentur. Vnde timorem Domini, (quo vera religio intelligitur) sapientissimus ille Rex, sæpe initium, fontem, radicem, & scaturiginem sapientiz vocat. Hæc verò cum omnibus hominibus ad suam salutem, tum Regibus in primis ad se, suarq; potestati concreditos bene regendos, & ad bene fœlicitérque regnandum omnino est necessaria. Religionem autem veram, & orthodoxam, non in auri, & argenti, in suppellectilis, vestium, vasorum, ceremoniarum, rituum, ac gestuum externorum splendore, pompa, & magnificentia: sed in spiritu, & veritate, in fide, spe, & charitate, in legis ac mandatorum diuinorum obseruatione, in vitæ, morumque puritate, & sanctitate assidua, in primis & ardenti numinis diuini inuocatione consistere, apud omnes veros Christianos extra omnem est cōtrouersiam. Reges porrò religionis Christianæ non cultores solum, confessores, ac imitatores, sed etiam patronos, tutores, alumnos, pastores, patres, propugnatores, ac propagatores esse decet: vnde Rex hic tuus optimo iure Christianissimus appellatur. Nam Christianæ fidei, doctrinæ, atque religionis rudimentis & mysteriis à teneris vnguiculis parētum suorum pia ac fideli opera imbutus ac institutus fuit. Christum Dei filium vni-genam & corde credit, & ore confitetur venisse in carnem: hoc est, pro se ac totius generis humani salute securdum carnem ex Spiritu sancto conceptum, & ex Maria gloriosissima castissimæque virgine natum, passum, mortuum, ac sepultum esse, descendisse ad inferos, resurrexisse,

ascendisse in Cælos, sedere ad dextram patris sui omnipotentis, inde rediturum ad iudicandum viuos, & mortuos, ad exercendum vniuersale & vltimum illud iudicium, & ad electos quidem cœlesti æternæque beatitudine donandos, reprobos autem æternis illis gehennæ ignibus, ac tormentis addicendos & mancipandos. Christum Immanuelem verum Deum & hominem, solum, vnicum, & quidem sufficientissimum Dei hominûmque mediatorem, pacificatorem, sequestrum, & aduocatum, caput, pastorem, pontificem, Regem, Prophetam, doctorem, magistrum summum, sp̄sū Ecclesiæ agnoscit, credit, confitetur, ac veneratur. Nihil se aliud cum S. Paulo scire profitetur ad salutem æternam consequendam, nisi Christum, & hūc crucifixum. In solo Christi nomine cum S. Petro & aliis Apostolis confitetur saluos fieri, remissionem peccatorum consequi omnes, qui credunt in eum. Christum confitetur atque credit solum esse agnum occisum ab origine mundi, agnum prædestinatum ab æterno, agnum purum, atq; mundum, omnis labis & maculæ expertem, verum Pascha, tollentem peccata mundi. Christum credit & confitetur cum S. Paulo in mortem traditum esse propter delicta nostra, & resurrexisse propter iustificationem nostram, Christum credit & confitetur nobis factum esse sapientiam, iustitiam, sanctificationē, redemptionem. Christum Iesum credit in hunc mundum venisse vt peccatores saluos faceret. Christum credit ac confitetur dedisse semetipsum pro nobis, vt nos redimeret

redimeret ab omni iniquitate: & mundaret sibi
 populum acceptabilem, sectatorem bonorum
 operum. In Christo credit ac confitetur omnes
 thesauros sapientiæ, & sciëntiæ esse absconditos.
 Christum credit ac confitetur per mortem de-
 struxisse eum, qui habebat mortis imperium. In
 Christo solo, filio Dei viui, nos ante iacta mun-
 di fundamenta ad æternam vitam electos, in &
 per illum solum vocari, adoptari, iustificari, san-
 ctificari, glorificari, ad æternam, cœlestem, &
 immortalem illam vitam, gloriam, ac beatitu-
 dinem, sola Dei gratia prouchi. Christum a-
 gnoscit solum suum & orantium credentium Ie-
 sum id est seruatorem, liberatorem, redempto-
 rem, viam, vitam, veritatem, resurrectionem, pa-
 cem, salutem in illo solo, & omnem salutis spem,
 defixam, & collocatam habet. Sola Christi ho-
 stia atque victima piaculari & saluari nititur, ac
 confidit, qua hostem generis humani victum, at-
 que prostratum, caputque illius contritum est,
 quæq; sola, vt S. Bernardus loquitur, vt prodesse
 possunt, ita sola sufficit: ita vt nō Christū simul,
 & Petrum, aut Iacobum, vel Ioannem pro salu-
 te generis humani pati oportuerit, solius Chri-
 sti iustitia, sanctitate, & excellentibus omnium
 virtutum meritis nititur & acquiescit: quibus il-
 lum hominum peccata expiasse, patris numen
 humano generi infersum placasse, aditumque
 nobis in cœlum peccatis nostris interclusum
 patefecisse credit. Christi passio, quā S. Bernar-
 dus potentissimam ad extinguenda omnium ge-
 nera peccatorum vocat, illius mors, atque crux

salutifera, illi vita est, atque lux iucundissima: hanc sibi semper ante mentis suę oculos proponit, assiduę cogitat, meditatur, inde solatia, atque quotidie remedia omnium malorum, miserrum, periculorumque efficacissima, saluberrimamque haurit. Nam vt S. Bernardus pie dixit, quę tam efficax ad curanda conscientię vulnera, nec non ad purgandam mentis aciem, quàm Christi vulnerum sedula meditatio? Et idcirco omnia iuramenta vana, & futilia, deierationes, execrationes per Christi mortem, crucem, passionem, vulnera, sanguinem, corpus (quibus vniuerso generi humano æternam salutem partam esse credit) hodie inter Christianos frequentissimę fieri solitas, tanquàm diras tetrasque blasphemias, contumelias, & iniurias ipsi Deo factas, à Christi nomine atque religione abhorrentes, & à veris Christianis alienissimas toto pectore execratur, detestatur, grauissimę prohibet, vetat, atque punit. Nihil itaque illi meritò Christo carius, nihil iucundius, nihil suauius: prę Christo pretiosissima quęq; illi scētēt, ac sordent, Christum spirat, ad illum aspirat, atque anhelat toto pectore. Doctrinam Prophetica, & Apostolica, (quę quidem sola Christi est doctrina, & à Christi Spiritu est profecta) rectissimam, certissimam, plenissimamque vitam, morum, fidei, religionisque regulā & Canonem (vndē rectē Canonica appellatur) agnoscit, Christi sacramenta ab ipso instituta ceu diuinorum promissionum sigilla, certissima, plurimi facit, iis religiose ad salutē suam cōmunicat, vti-

tur,

tur, a
cuius
sim
nim
ctitat
fuetu
erga
duas,
tu tri
ri sed
Chri
nom
hære
Chri
ficien
cipit,
ergo
verē
Chri
esse.
nit d
dign
vt pu
ceter
stian
conu
Chri
ritate
& fid
gissim
Chri
Reg

tur, ac fruitur. Christi spiritu agitur, & ducitur: cuius rei grauiſſimo argumēto ſunt Chriſtianiſſimæ illius virtutes, dicta, atque facta. Chriſti enim mores, vitam, ac virtutes, & pietatem, ſanctitatem, iuſtitiam, tolerantiam, lenitatem, maſuetudinem, liberalitatem, atque beneficentiam, erga pauperes præſertim, inopes, orphanos, viduas, peregrinos, pro gratia ſibi à Chriſti ſpiritu tributa, atque conceſſa, imitari, atque æmulari ſedulò ſtudet, Chriſtiſque ita veſtigiis inſiſtit. Chriſtiani enim inquit S. Bernardus, à Chriſto nomen acceperunt: at operoſum eſt, vt ſicut ſunt hæredes nominis, ita ſint imitatores ſanctitatis. Chriſtum in membris ſuis eſurientem cibant, ſitientem potant, nudum veſtit, peregrinum excipit, captiuum conſolatur, atque liberat. Ex his ergo adhuc commemoratis patet: Regem tuum verè ac merito non Chriſtianum ſolum, ſed etiã Chriſtianiſſimum cenſendum & appellandum eſſe. Nam quemadmodum ei, cui regia conuenit dignitas, atque honos, eidem regiæ quoque dignitatis, & honoris inſignia, atque ſymbola, vt puta Corona, ſceptrum, gladius, purpura, & cætera eiufmodi conueniunt: ita cui virtutes Chriſtianæ inſunt, eidem quoque Chriſtiani nomen conuenit. Contrà autem hodie multi in orbe Chriſtiano nominantur Chriſtiani, qui re, & veritate nihil ſunt minus, cum illoſum & doctrina, & fides, & vita, à Chriſti doctrina atq; vita longiſſimè diſcrepent, atque diſſideant, imò contra Chriſtum criſtas erigant, eiq; cornua obuertant. Reges olim Iudæorum in Veteri teſtamento di-

cebantur Christi, id est vncti, propterea quòd iuxta ceremonias illas Mosæas externo & corporeo oleo inungi, ac consecrari consueuerant: quòdque erant typi, & figuræ Christi, Regis illius gloriæ, qui oleo illo latitiæ, hoc est Spiritus sancti, eiusque donis, atque muneribus plenè perfectèque delibutus, & imbutus fuit. Sic omnes veri christiani, qui eiusdem olei latitiæ id est Spiritus Sancti fiunt participes, verè vncti appellantur. Talis autem est Rex tuus, qui vnguentis illis virtutum christianarum fragrantissimis, saluberrimisque redundat: quum Christum in monte Sion, hoc est, in Ecclesia (vt Psaltes Reges ac principes adhortatus est) exsculatur. Nam Regem tuum Christi Spiritu præditum, & ornatum esse arguunt ac demonstrant manifestè christianæ eius virtutes, quæ in illius vita, moribus, & actionibus suauissimi instar & odoriferi vnguenti, ac flosculorum instar fragrantissimorum florent, nitèt, olent suauissimè. Nisi igitur Rex tuus pulcherrimum hoc Christianissimi cognomen à maioribus suis hæditarium accepisset, id ipse sibi, posterisq; suis virtutibus peperisset: quibus profectò illud non tuetur solum egregiè & conseruat, sed etiam auget.

Iam verò Catholici seu Catholicissimi quoque titulum optimo iure eidem tuo Regi assignari posse, vel ex eis, quæ de Christianiss. titulo, atque cognomine dicta sunt, faciliè colligi, atque intelligi potest. Nam Christiani, & Catholici, (si rem & veritatem spectes) eadem est ratio, & cui
vnum

vnum
Rege
mun
esse C
ca(qu
à vete
doxo,
heter
gi tuo
mò q
hoc e
Prop
Apo
de lit
vsque
tholi
atque
Cath
rectu
terra
totiu
vobis
mne
tus a
nem
cano
gion
se iu
tholi
tulli
cis,
vt n

unum conuenit, ei cōuenit & alterum. Itaq; cūm Regem tuum probauerimus esse Christianissimum, inde facile concludi potest, illum quoque esse Catholicissimum: Nam vox Catholici Græca (quæ sonat Latine generalem seu vniuersalem) à veteribus pro Christiano, Apostolico, Orthodoxo, verèque religioso vsurpata fuit, opposita heterodoxo, siue heretico. Sed hunc titulum Regi tuo conuenire, facillimè probatur. Nam primò quidem Verbum diuinum, atq; canonicum, hoc est, Veteris & Noui testamenti doctrinam, Propheticam, & Apostolicam, à prophetis, & Apostolis vnica primùm voce prædicatā, deinde literis, memoriæque consecratam, & ad nos vsque singulari Dei beneficio transmissam, Catholicum Religionis canonē, hoc est, normam, atque regulam esse confitetur. Et idcirco adhuc Catholicum Canonem, Apostolicum, verum, rectum, atque perfectum, (qui exiuit in omnem terram, quique per Apostolos, Catholicos illos totius mundi legatos, atq; nuntios, καθ' ὅλον τὸν κόσμον, hoc est, per vniuersum mundum, per omnes nationes, & in omnib. linguis, promulgatus ac publicatus fuit) ad illum, inquam, Canonem, tanquam ad lydium lapidem, omnes alios canones, traditiones, opiniones, doctrinas, religiones denique explorandas, & examinandas esse iudicat. Deinde Symbolum Apostolicum, Catholicæ, & Apostolicæ fidei tesseram, (quod Tertullianus Fidei regulam appellat) ab Apostolicis, & Catholicis illis totius mundi præconibus, vt nonnulli volunt, compositum, aut ab Aposto-

lorum discipulis collectum, ac proditum, ab Apostolica, & Catholica Ecclesia receptum, & approbatum, omnium patrum cōsensu laudatum, & probatum, tanquam prophetica, apostolica, & canonica illi doctrina, atque disciplina consentaneum, (cuius illud epitome est, atq; compendium) toto pectore recipit, amplectitur, omnemque contrā doctrinam, Symbolo huic canonico, & Catholico dissentaneam reiici, ac repudiari debere existimat. Præterea Orationem Dominicam ab ipso Christo Domino Seruatore nostro nobis præscriptam ac traditam, seu perfectissimum omnium precum nostrarum exemplar, atque formam, cum ore, tum pectore suo assidue usurpat: ad quam etiam omnes reliquas nostras preces exigi, dirigi, atque componi deberi verè sapienterque iudicat. Ad hæc Decalogum, legem illam 2. tabularum (quæ fons est, atque caput omnium aliarum legum) cum corruptæ, vitiosæque nostræ naturæ, speculum, tum diuinæ iustitiæ, misericordiæ, ac voluntatis imaginem, tum denique affectuum, cogitationum, vite, morum, studiorum, officiorumque nostrorum omnium erga Deum, & proximum canonem, atque normam cōfitemur esse Catholicam, exactam & perfectam. Itaque omnia siue dicta, siue facta, siue cogitata, quæ ei sunt consentanea, tanquam vera, orthodoxa, & Catholica approbat: contrā omnia, quæ ei aduersantur, atque repugnant, reiicienda & aspernenda esse arbitrat. Præterea 4. illa catholica, seu OEcuménica, vetustissima, celeberrima, legitima concilia,

nempe

nempe Nicenum primum, quod Constantini M. Constantinopolitanum, quod Theodosij M. Ephesinum primum, quod Theodosij iunioris: Chalcedonense, quod Martiani Imp. auspiciis, aduersus hæreticos celebratum fuit: concilio-
rumque illorum doctrinam, atque cōfessionem ex animo amplectitur, ac profitetur: errores contrā, & hæreses ab illis condemnatas ipse quoque damnat, & improbat. Porro secundum hanc ipsam Apostolicam disciplinam, & Euangelicam doctrinam, secundum scripturam Canonicam, secundum symbola Apostolica, & concilia illa Catholica, fidem Catholicam: Patris, Filij, & Spiritus S. vnā credit deitatem, sub pari maiestate, & sub pia trinitate, Vnum Deum in Trinitate, & Trinitatem in Vnitate veneratur. Atque hunc quidem Deum, vnum essentia, trinum hypostasi, cœli, ac terræ, totius mundi, ac singularum eius partium, omniumque naturarum, siue visibilium, siue inuisibilium, tam minimarum, quā maximarum, sapientissimum, potentissimum, iustissimum, ac misericordissimum creatorem, conseruatorem, atque rectorem esse confitetur: illūque tanquam spiritum immensum, & infinitum, in Spiritu & veritate colendum, & adorandum esse credit. Christum Dei filium vnicū, verum Deum, & hominem, Catholicum, (si ita loqui volumus) hoc est, vniuersalem, credit totius mundi esse Seruatorem, & illius Hostiam credit, vniuersalem, & quidem perfectam, sufficientemque esse peccatorum totius mundi expiationem. Spiritum item Sanctum ex patre

& filio procedentem, credit verum esse Deum, Patri & Filio consubstantiali, & vniuersalem Ecclesiæ Sanctificatorem: Ecclesiam denique credit esse vnam Apostolicam, & Catholicam, cuius pars est in cœlo triumphans, pars in terris militans quæ per totum terrarum orbem ita diffunditur & ad nouissimum vsque diem diffundetur vt nullis locorum finibus sit circumscripta. Credit Catholicam Ecclesiam, Sactorum communionem, cuius caput, fundamētum, Petra lapis angularis, sponsus, summus pastor, & Pontifex, est ille Vnicus mediator Dei & hominum Iesus Christus: in qua viuere & mori cupit, pro cuius salute assiduas ad Deum preces fundit, pro cuius defensione in quouis sese offert mortis pericula. Ecclesiam quoque veram Catholicam illam esse credit, quæ Catholicam profitetur, colitque religionem. Religionem porro Catholicam esse statuit, quæ prophetica, apostolica, canonica, atque Catholice doctrinæ, ac proinde voluntati diuinæ est consentanea. Huic ecclesiæ simul atque doctrinæ Catholice cum honorem defert, vt eius iudicium libenter subire, eius sententia stare, & acquiescere semper sit paratus. Ac quoniam errores, hæreses, superstitiones, & abusus multi à primitiua Ecclesiæ iudicio, more, ac consuetudine alieni, à Catholica & canonica illa doctrina atque scriptura abhorrentes, præsum ecclesiæ partim incuria, & negligentia, partim avaritia & ambitione, partim superstitione paulatim in ecclesiam irrepserunt: de quibus iam aliquot sæculis religiosissimi sanctissimique viri multi,

multi, cum doctores & Ecclesię antistites, tum Reges, atq; principes grauissimę conquesti sunt, ecclesię, religionisque reformationem vehementer flagitantes: quoniam etiam his præsertim temporibus grauissimę sunt de religione in orbe Christiano controuersię: idcirco hic tuus Rex ad exemplum primitiue Ecclesię, imitatione maiorum, & prædecessorum suorum, libero, iusto, atque legitimo aliquo concilio, omnes huiusmodi errores, & abusus tolli, ac aboleri: quę vitiosa sunt, corrigi, & emendari, Ecclesiam reformari, ac instaurari: deniquę graues illas controuersias decidi, diiudicari, componi, atque ita Ecclesię veritatem atque concordiam stabiliri cupit, ita vt nihil magis in votis habeat.

Quum verò duę sint in hoc illius regno religiones, quarum vtraque Apostolica, Catholica, Christiana, vera, & orthodoxa vult censi: & quarum vna, Romana, altera Reformata, seu Euangelica vulgò appellatur: Rex tuus pro pia sua sapientia, atque modestia, vtriusque religionis dogmata, non (sicut adhuc cum maximo totius regni damno ac detrimento factum est,) vi, ferro, armis, atque flaminis, sed humanis, modestis, beneuolisque colloquiis, disputationibus liberis, legitimisque synodis, & iurę diuino, Prophetis & Apostolicis scriptis comprehensus, vult disceptari, diiudicari, & decidi, vnde veritas magis magisque clucescat. Præterea fidem iureiurando etiam interposito dedit, sese vtriusque Religionis hominum semper fidelem aduersus omnem vim, & iniuriam, velle esse tutorem, at-

que patronum: omnemque daturum operam, ut
vtriusque Religionis cultores religionem suam
libere colere, & exercere possint, atque ita uni-
cuique sub hac sua tutela, & patrocínio, secun-
dum religionem, & conscientiam libere, tuto,
securè, pacatè, atque tranquillè viuere, & suis ve-
ctigalibus, stipendiis, honoribus, muneribus, at-
que bonis uti, fruique liceat. Ne quis autem reli-
gionis pretextu alteri vim, & iniuriam inferat,
sedulo se prohibiturum, & quosuis inhonestè,
sceleratè, flagitiosèque viuentes, quamcunque
illi religionem profiteantur, acerrimè grauissi-
mèque puniturum, omnèsque æquabili iure in
pace & tranquillitate cōseruaturum, acerrimum
denique omnium iniuriarum vindicem, & cul-
torem futurum profitetur. Cùm igitur Rex tuus
ita sit animatus, & ad vtramque Religionem
Romanam & Reformatam (quas spes est fore ut
paulatim in vnā religionem & Ecclesiam coa-
lescant) ab omni vi, iniuria, atque tyrannide de-
fendendam propensissimo sit animo, atque stu-
dio: quis illum non Christianum, atque Catho-
licum, imò Christianissimum, & Catholicissi-
mum, meritò habendum, & appellandum du-
xerit?

Et hæc de Registui religione, de qua copio-
sior aliquantò & prolixior fuit mea oratio: &
quòd religio est quasi metropolis omnium reli-
quarum virtutum, & quia Regibus illa maximè
est necessaria, & quia de illa hodie maximæ sunt
inter Christianos contentiones, & denique quia
hic tuus Rex, à maleuolis, inuictis & imperitis
quibusdam

quibusdam hominibus falsæ religionis, & hæreseos insimulatur: unde nonnulli suæ aduersus illum rebellionis, contumaciæ, ac felonie occasionem, ansamq; arripiunt, & hoc quasi velo, & tegmento illam conantur tegere, atque palliare.

Nec verò mirum tibi videri, aut te offendere debet, quòd religionem illam constanter adhuc retinet, profitetur, atque colit, in qua natus, educatus, & ab ineunte ætate fuit institutus, quàmq; Catholicam, Canonicam, Apostolicam veram & orthodoxam esse animo suo penitus persuasum habet, pro qua etiam quàm plurimi, in tua patria, vt non es nescia, non dubitarunt mortem oppetere, & sanguinem suum profundere. Sed enim docilem omnino, & attetum cuius illum meliora & veriora ex verbo Dei docenti, se præbiturum semper est professus. Hoc certè ipsum religiosissimi, constantissimique animi singulare est testimonium, quòd non temerè quouis doctrinæ Religionisve vento se huc vel illuc agitari, & impelli sinit, quum obstinatio, & cōtumacia in errore, postquam eius veris solidisque rationibus est conuictus, hereticū faciat. Quamobrem minimè hæresos nomine vel accusandus, vel damnandus est Rex hic tuus, si non omnia ea credit, & recipit, quæ Rom. Pontifices, episcopi, cardinales, sacerdotes, doctores, monachi, credenda obtrudunt. Damnanda enim hoc pacto esset primitiua & Apostolica Ecclesia, quæ plurima illorum, quæ hodie creduntur, coluntur, & sunt in Ecclesia Rom. ignorauit. Damnandæ essent duę tertiæ orbis Christiani, ac multi Reges,

principes, magistratus, ciuitates, populi nostræ ætatis, qui non omnibus Rom. Ecclesię ceremoniis, opinionibus, & traditionibus, assensum præbent. Quàm multi enim, quæso te per Deum immortalem, viri & doctrina, & pietate præstantissimi, aliquot iam annis, imò sæculis, grauissimè conquesti sunt de superstitiosa imaginum, simulachrorum, atque statuarum innumerabilium veneratione, de Sanctorum, quos in diuos Pontifex Ro. retulit, (de quorum nonnullis dubitatur sint ne in cœlo an in inferno, an fuerint vquam in rerum natura) inuocatione, de ossium, reliquiarumque multarum, fictarum, & incertarum ostentatione, atque cultu: de Eucharistiæ seu Cœnæ Dominicæ prophanatione, ac mutilatione: de panis consecrati in pompis Ecclesiasticis, & agrorum illustrationibus, circumgestatione: de transubstantiatione, de campanarum baptismatione, de aquæ lustralis ad abluendas animi labes aspersione: de rebus ad arcenda fulgura & tempestates à pontifice Rom. consecratis, de fustitu ante aras: de immodica dierum festorum multitudine, de eorundem abusu partim superstitioso, partim luxurioso, & lasciuo: de bullis & indulgentiis pontificiis: de precibus idololatricis: de peregrinationibus ad Sactorum simulachra, atque statuas: de impuro sacerdotum atque monachorum cœlibatu. Quàm multæ præterea & quàm graues eorundem extiterunt quæstiones, disputationes & querele, de confictis multis miraculis, de commentitiis & anilibus multis fabellis, de diuorum vita, morte, atque operibus:

de

de violatis ob institutiones hominum præceptis
 diuinis: de multis traditionibus incertis, dubiis,
 & perplexis, de quæstionibus potiùs Philosophi-
 cis, quàm theologicis, quæ plus futilitatis quàm
 utilitatis habent, de multis conscientiarum la-
 queis: de multis aliis vitiis, & abusibus, qui Reli-
 gionis fucò in Ecclesiam fuerunt introducti, qui
 omnem ferè vigoris Euangelici scintillam ex-
 tinxerunt. His adde eorundem querelas graues,
 & iustas de Pontificum Rom. potestate, quam il-
 li sibi arrogant, & assumunt, ferè infinita, de il-
 lorum proscriptionibus, bellis, atque tyrannide:
 de fratrum mendicantium & aliorum mona-
 chorum omnibus voluptatibus, & delitiis af-
 fluentium, ficta & fucata religione, mendicitate,
 continentia, hypocrisis, superstitione, atque ty-
 rannide, & impuritate: de Pharisaismo simul, &
 Epicureismo in Cænobiis, & monasteriis, de
 Canonicorum, de antistitum religionis ferè o-
 mnium Regia dominatione, neglectione stu-
 diorum, inspectionis Ecclesiarum, & synodo-
 rum, vitæ morumque impuritate: de officiorum
 sacrorum Simoniaca venditione: De missarum
 nundinatione: De his & aliis multis, quæ vix
 percenseri omnia possunt, illi quoque ipsi, qui
 Ecclesiæ religionique Rom. planè sunt addicti,
 hodie quoque grauissimè inter se dimicant, atq;
 digladiantur. An non igitur quæso iniquum fue-
 rit & iniustum, Regem tuum hæreseos accusare
 ac condemnare velle, proptereà quòd non
 statim fidem adhibet omnibus iis opinionibus,
 atque doctrinis, de quibus adhuc sub iudice lis

est, & de quibus illorum ipsorum, qui Catholici-
cissimi, vt ita loquar, haberi volunt, tot ferè sunt
quæstiones, & opiniones, quot capita.

Habes itaque Regem, non (vt impiè nonnulli
calumniantur,) hereticum, aut relapsum, sed hæ-
reses, errores, & abusus omnes detestantem: atq;
ex Ecclesia non vi, ferro, armis, atque bellis, sed
synodis iustis, legitimis, atque liberis tollere, at-
que euellere conantem. Relapsus autem dici &
haberi debet is, qui in manifestam hæresim, cu-
ius verè, rectèque conuictus est, & quam volun-
tariè abiurauit, denuo recidit. At hic tuus Rex
nullius se hærescos vnquam conscium aut con-
uictum fuisse profitetur. Est igitur, ô Gallia,
quod tibi gratuler, & quod gaudeas, atque læte-
ris, quoniam Regem habes non atheum, epicu-
reum, & irreligiosum, sed religiosissimum, qui
nimirum Deum timet, & honorat, qui ei soli ad-
hæret, ei soli confidit, in eius solius gratia, atque
misericordia, per Iesum Christum omnem salu-
tis suæ spem collocat, & idcirco illum solum dies
noctèsque inuocat.

Venio nunc ad alias præclaras & eximias Re-
gis tui virtutes, quæ ipsæ quoque testimonio
sunt atque iudicio illum regio & titulo & hono-
re, dignitate, potestatéque dignissimum: Re-
gémque religiosissimum, Christianissimum, &
Catholicissimum meritò appellandum.

Hæ autem virtutes aliæ quidem sunt mentis,
& intellectus: aliæ verò cordis, voluntatis, & af-
fectus.

Ac prioris quidem generis virtutes Regi ad
benè

bene hoc suum munus obeundum vtilis valde,
 imò necessariae sunt. Sapientia, hoc est, multa-
 rum rerum, & diuinarum, & humanarum: & po-
 liticarum, & Ecclesiasticarum: & pacis, & belli
 scientia, atque cognitio: cuius comites, atque so-
 ciae sunt prudentia, cautio, circumspectio, soler-
 tia, sagacitas, iudicium, consilium, memoria.
 Nam vt Sol, sicut ab Ambrosio dicitur, est oculus
 mundi: ita Rex debet esse oculus regni: ac-
 curatèque prospiciendo, ac consulendo eius
 dignitati, atque saluti. In Sapientia, inquit E-
 saias, regnabit Rex. Rex sapiens, vt inquit ipsa
 Sapientia, populi est fulcrum, atque columen:
 vnde βασιλεὺς Græcè q. βάσις τοῦ λαοῦ. i. basis seu
 fundamentum populi nonnullis videtur esse di-
 ctus. His suffragatur Syracides: Natus est, inquit,
 homo princeps fratrum, firmamentum gentis,
 rector fratrum, stabilimentum populi. Si dele-
 ctamini, (inquit rursus Sapientia, eodem in lo-
 co,) sedibus, & sceptris, ò Reges populi, diligite
 Sapientiam, & in perpetuum regnabitis. Sapien-
 tia itaque, sensum, & intellectum populus Re-
 gi suo à Deo precatur, vt bene regere possit I-
 sraëlem. Et Salomon in patris sui locum suffec-
 tus non diuitias, non opes, non gloriam, non
 vindictam, non vitam diuturnam, sed sapien-
 tiam, atque scientiam, qua egredi coram popu-
 lo, & ingredi (vt habet Hebræa dicendi forma)
 hoc est, populū bene gubernare, domi, forisque
 boni Regis, atque ducis officium obire possit.
 Rex contra insipiens, vt Syracides ait, perdit po-
 pulum suum. Et vā, inquit Isaias illi terræ. i. re-

gioni atque genti, cuius Rex puer est, scil. non ætate solum, sed etiam ingenio, atque iudicio. Vox enim Hebræa Naar, (vnde Germ. narr. i. stultus videtur deriuari,) ambigua est, & cum puerum, tum stultum significat. His adde postremò Aristotelis testimonium, qui prudentiam vocat propriam & vnicam imperantis virtutem. Quoniam itaque Regem singulari sapientia, intelligentia atque consilio præditum esse decet: vnde Βασιλεὺς Græcè, vt nonnullis placet, ἀπὸ τῆς λήψης, i. vidend. seu perspiciendo: & denique vernacula nostra lingua, Kunig à Kumen, siue Kunst, Konnen. i. à scientia videtur esse appellatus.

Gaude igitur rursus & lætare, ò Gallia, quòd Dei bonitate Regem nacta es. non Chilpericum III. Merouearum familiæ vltimum cognomento Stupidum: non Carolum Ludouici Balbi filium, qui Simplex fuit cognominatus, sed Regem nacta es Solomonem, vt ita loquar, sapientia, atque prudentia, rerumque plurimarum experientia, atque scientia instructum: Regem acutissimi, acerrimique ingenij, atque iudicij: Regem prouidum & circumspectum. Regem qui consilio plurimum valet, qui cum ad capienda atque danda vel ex tempore, optima & saluberrima consilia, motus animi habet celerrimos: tum ad aliorum sanis bonisque consiliis parendum, & obtemperandum aptus valde est, & idoneus. Consiliariis enim & consultoribus (qui quidem veræ sunt Regni opes, thesauri, præsidia, & ornamenta, Regum quasi oculi, atque aures) utitur ac delectatur sapientissimis, fidelissimis,

mis, atque fortissimis, qui liberè & ingenuè non ad eius voluntatem, sed ad veritatem, publicamque salutem, loqui, atque consulere solent, ac audent: quibus etiam bene consulentibus libentissimè paret & obtemperat. Cui igitur dubium quin Sapientis cognomentum mereatur, quod Carolo v. qui floruit anno M. CCC. LXXV. tributum fuisse legimus. Cic. enim sapientissimum esse dicit eum, cui quod opus sit ipsi veniat in mentem: proximè accedere illum, qui alterius bene inuentis obtemperet.

Quid dicam de memoria eius memorabili sanè planèque diuina, quam animi dotem verissimè idem Cic. firmam rerum verborumque omnium perceptionem, nec non thesaurum, & custodem appellat: quàmque nos sapientiæ, & virtutum omnium matrem, atque nutricem, omnisque actionis orationisve moderatricem, meritò vocare possumus. Virtus hæc Reges, ac principes maximè commendat, illisque valde non utilis solùm est, sed etiam necessaria: cùm optimum sit bene & agendi & dicendi subsidium, & adiumentum. Literarum monumentis celebratur cùm Mithridatis potentissimi & clarissimi illius Regis Ponti, tum Cyri Regis, Persarum memoria, quæ tanta fuit, ut singulos quosque milites, qui prope erant innumerabiles, propriis nominibus ac cognominibus appellare potuerit. Horum Regum memoriam vel adæquare, vel proximè ad illam accedere Regis tui memoriam, testes sunt plurimi eius milites, quos singulos suis nominibus sine nomenclato-

ris ac monitoris opera compellare consuevit. Testes eiusdem sunt cum Legati, tum eius consiliarij, quorum orationes, rationes, atque argumenta licet diuersa, vno eodemque tempore, quamuis aliis quoque simul cogitationibus intentus, mente, memoriâque sua tam bene feclicitérque percipit, vt vel ex tempore ad singula, quæ ab illis dicta, & proposita fuerunt, aperte, & appositè respondere possit. In hoc verò tam excellenti eius bono, illud quoque cum admiratione, tum prædicatione & imitatione est dignissimum, quod cum tanta ferè sit vi memoriz præditus, vt nihil propè eorum, quæ semel comprehendit, ex animo eius effluere rursus posse videatur, tamen beneficiorum quidem, officiorumque ad illa referenda ac remuneranda mirum in modum memor est, atque gratus, iniuriarum autem acceptarum obliuiosissimus.

Regia præterea virtus, Rerum, atque regnorum moderatoribus conuenientissima est, & prudentiæ comes & administra Vigilantia, industria, diligentia, assiduitas, laboris vigiliarumque patientia. Agesilaum legimus dicere solitum, sic somno se vt, vt non somno, sed vt negotiis seruiret. Erat nimirum ab Iride illa HomERICA Ili. B. admonitus: quæ Agamemnonem excitans è somno, negabat principem solidam debere noctem dormire, cui commissa est cura populi. Hinc Socrates cum Aristippo differens apud Xenophontem: Illum, inquit qui gubernandi artem discit, ne res propter illius somnolentiam detrimentum patiatur, in somno capi-

piendo

piendo continentem esse oportet, vt possit & tardè dormire, & ante diluculum surgere, & vigilare, si opus sit. Sic Legum custodes Plato 12. de legib. vult noctu surgere: nocti enim Reipub. negotia commodissime tractari. Augustum non vltra vii. horas dormire solitum, Sueton. ait. Omnium enim domus, inquit Seneca, Cæsaris vigilia defendit, omnium orium illius labor, omnium delitias illius industria, omnium vacationem illius occupatio. Ex quo imperio se dedicauit, sibi eripuit: & syderum modo, quæ irrequieta semper cursum suum explicant, nunquam illi licet subfiteri, nec suum quicquam facere. Hanc ob causam Rerumpub. & ecclesiarum præfides, speculatores, vigiles, excubitores appellantur: quod Reipub. salut. semper inuigilare, proque illa excubare, omnes vigilias, curas, cogitationesque in illa desigere debent.

Gaude igitur & lætare, Gallia, quod Rex tibi contigit Dei benignitate alacer, impiger, industrius, qui salutis tuæ & incolumitati inuigilat: cui quum res postulat, duas aut tres horas sæpius dormire sat sit, aut etiam noctes insomnes ducere: qui est vigilum & excubitorum suorum ipse vigil & excubitor. Ô vtinam, Gallia, te ad laudem tandem aliquando & salutem tuam ex isto veterno tuo excitare possit.

Regia porro virtus est Iustitia, optima regnandi magistra, qua remota vt August. ait, lib. de ciuit. Dei 3. c. 4. regna nihil aliud sunt quàm magna latrocinia, qua alterum & proximum est à Religione Reip. administranda fulcimen-

tum : adeò vt huius tui Regis vere proprium sit Symbolum *Pietas & Iustitia*. Iustitia enim nihil clarius, nihil pulchrius: vnde nec Hesperū nec Luciterum illa formosiorē esse dixit Aristot. Hāc apud Persas pueros in scholā discere fuisse solitos, Xenophon Cyri Regis exēplo docet. Iustitia & bonitas duæ sunt Catenæ validę, atq; firmæ (vt Dion dixit ad Dionysiū tyrannum Syracusanū) quibus regni status in pace & fœlicitate cōseruari potest. Iustitia est, vt inquit Ambros. lib. 1. de off. quę dat cui libet quod suū est, nihil vendicans alieni: vt S. Bernardus eā definit: est reddere vnicuiq; quod suum est. Per hāc virtutem primū principes ad regiam dignitatem euectos fuisse Herodotus Deiocis exēplo probat: qui propter singularem iustitię existimationem primus Rex Persarum fuit creatus. Vnde Solōmon: Sedes, inquit, Regis, quæ verē iudicat pauperes, perpetuo fortunata erit: Idem, Iustitia thronus Regis stabilitur. Vt autem præclara, ita rara hęc est virtus in Regibus: qua de causa nullus ferē vquam Rex Iusti cognomen assumpsit. Et Antigonus Rex, Sophistæ cuidam, & assentatori librum ei de iustitia inscriptum offerenti, dixisse fertur: Nugaris cum apud me de iustitia differas, quum videas me armis alienas vrbes inuadentem. Antiquissimus tamen & celeberrimus ille Rex Salem, id est pacis (qui illustris Christi typus fuit) Melchisedech dictus est, hoc est Rex iustitię, quo ipso inter alia significatum fuit Reges oportere iustitiæ maximē esse amantes & studiosos. Iustitia Regis, inquit Augustinus, est pax populi,

popu
perie
hac v
appe
dini
Hac
omn
dom
opti
spub
nec
iust
tur.
Vno
aud
Scep
sign
om
iust
mn
lim
offi
offi
qui
ctil
né
sce
ne
de
ap
nis
ex

populi, tutamen patriæ, gaudium hominum, temperies aëris, serenitas maris, terræ fecunditas. Ex hac una virtute viri boni, ut inquit Cic. maximè appellantur, quæ mirifica quædam res multitudini videtur: in qua virtutis splendor maximus. Hæc pacis est alumna, custos & conseruatrice: hæc omnium reliquarum virtutum est Regina, atque domina rerum publicarum, atque regnorum moderatrix optima, & columna stabilissima: qua sublata respublicas atque regna conuelli, & labefactari est necesse. Omuino Regis esse facere iudicium, & iustitiam, passim Deus ipse in verbo suo testatur. Sap. 1. Diligite iustitiam qui iudicatis terram. Vnde Solium regium, symbolum est sessionis, auditionis, examinationis causarum, iudiciorum. Sceptrum similiter, siue virga, insigne est regium, significans summum, & inflexibile recti studium, omni gratia, quasi fronde spoliatum: & exactam iustitiæ normam, ac regulam, ad quam sunt omnes controuersie dirigendæ. Vnde Reges olim sceptrum gestare soliti sunt, ut ostenderent officium suum esse, neque gratiæ quicquam, neque offensioni tribuere, sed sine vlla perturbatione quicquid esset in hominum moribus, & contractibus obliquum, ad recti rationem & iuris ordinem reuocare. Inde fit, ut in sacris literis, hoc siue sceptri, siue virgæ nomen, ad regiam iurisdictionem significandam positum sæpe videatur. Vnde Iustitia vernacula nostra lingua Rectitudo appellatur: quia est regula & norma rectitudinis, qua quispiam sibi & proximo id tribuit, & exhibet, quod ei debetur.

Te igitur, ô Gallia, tērque quaterque beatam, cui Deus Regem dedit, licet imprimis virtute clarum, & illustrem (vt quotidianæ eius actiones iustitiæ æquitatisque plenissimæ testantur) qui Solomonis, Dauidis, Iosaphati, & multorum prædecessorum atque maiorum suorum exemplo insistentis vestigiis, iustitiæ, & æquitatis est amantissimus, seduloque dat operam (quæ eius fundamenta Cic. appellat) primum vt ne cui noceatur, deinde vt communi vtilitati seruiatur, tum vt ius cuique suum tribuatur, pariter æqualitērque sine vlllo vel munerum, vel personarum respectu: vt boni defendantur, honoribus & præmiis afficiantur, contra nocentes atque facinorosi debitis meritisque pœnis coercantur: denique vt aduersus vim, & iniuriam improborum, pax, trāquillitas, & disciplina honesta in regno conseruari possit. Iustitiæ partes sunt non violare homines, & dare operam, ne ab aliis violentur, ledantur, iniuriis afficiantur. Iustitiæ proprium est, vt non modò quis nemini iniuriam inferat, verum etiā omnem vim iniustam, & iniurias ab aliis illatas pro virili depellat, & propulset. Et talis hic est Rex tuus. Non modò nemini iniuriam affert, vel laceffit, sed eam ab aliis quibusuis, quibus infertur, propulsare studet, eos qui iniuste in alios impetum facere, iisque violentas manus asserre conantur, coercet, ac reprimat. Qui idcirco multò magis Iusti cognomē meretur, quàm Aristides ille prisce temporis princeps. Iustus, teste ipso Spiritu S. germipabit, sicut lilium: & florebit in æternum, sic Rex tuus iustitiæ,

iustitiæ, æquitatis & innocentie candore liliorū
 instar (quæ etiā eius sunt insignia) floret, & flore-
 bit in perpetuum. Hęc ipsa iustitia est eius quasi
 vestis regia, quavis purpurea & aurea veste lōge
 pretiosior: Ita vt Iobi illa de se vsurpare possit:
 Iustitia indutus sum, sicut vestimento. Eadem
 virtus est illi loco thoracis, & armorum, iuxta
 illud Sapiētis, Sap. 5. dictum: Induit pro thorace
 iustitiam. Rex, inquit Solomon, Pro. 20. qui sedet
 in solio iudicij sui, vultu suo omne malum dissi-
 pat. Vt igitur Sol hic clarissimus nebulas dispel-
 lit: Ita Rex tuus sedens in solio iudicij, id est e-
 xercendo & exerceri conando iudicia iuxta iu-
 stitiæ, æquitatis, & legum normam: magis, ma-
 gisque dissipabit vultu nutūque suo, omnium
 calumniarum, & mendaciorum nebulas, quas
 veritati, iustitiæ, & æquitati nebulones, hoc est,
 sycophantæ, impostores multi effundere conā-
 tur: & Iosaphati Regis Iudæorum exemplo, iu-
 dicia corrupta, adulterata, venalia corrigere, &
 emendare, ac in pristinam dignitatem vindicare
 vides, illum omni studio eniti, & elaborare: cū
 iudiciorum corruptela in tuo Regno præci-
 pua sit causa malorum, & calamitatum, quibus
 illud diuexatum adhuc & afflictum fuit. Cū
 autem iustitia comparari debeat misericordiæ
 (nam iustitia sine misericordia est crudelitas, &
 misericordia sine iustitia est fallacia) vtriūque
 studium in Rege tuo coniunctum esse satis su-
 p̄rque constat.

Ad hæc Regia virtus est fides (quam veteres
 promissorum conuentorūque fidam obser-

uantiam, & mutuam stipulationum exhibitionem appellarunt) & veritas, cuius cum omnes homines, tum Reges in primis ac principes studiosissimos esse decet. Fidem vere Cic. iustitiæ fundamentum, & dictorum, conuentorūque constantiam ac veritatem definit. quam sic vult dictam, quod fiat id, quod dictum aut promissum est. Veritatem poëta ille antiquissimus magnæ virtutis principium esse dixit. Hilarius Episcopus fidei constantiam in Germanis maxime probauit, quorum fratres & gentiles Franci & Heluetij sunt. Vt autem fide & veritate nihil præstantius, salutarius, gloriosius: ita perfidia, & mendaciis nihil impius, nihil fœdus, nihil perniciosius. Vnde bella nisi ex pactorum, conuentorum, fidei denique datæ & acceptæ violatione? Carolus dux Burgundiæ potentissimus, opulentissimus & vltimus suæ in Connestabilem Franciæ, qui & ipse ex Regis tui paternorum progenorum est numero. & in Heluetios perfidiæ (vt innumera alia exempla omittam) graues & atroces pœnas dedit. S. Bernardus Epistola 38. ad Comitem Camp. Theobaldum: (quem in maternis Regis tui auis inuenies si quæras accurate.) & quidem in aliis principibus si quando verbum lenitatis aut etiam falsitatis deprehendimus: nec nouim, nec mirum reputamus. At verò apud Comitem Theobaldum Est, & Non, nequaquam omnino patienter audimus, cui, vt dicitur, simpliciter dicere, iurare est, & leue mendacium, graue periurium imputatur. Inter plurima quippe virtutum insignia, quæ vestram pluri-

plurimum nobilitant dignitatem, & vestrum per orbem clarum reddunt & celebre nomen, præcipuè laudatur in vobis veritatis constantia. Epaminondas Rex, ne per iocum quidem mentientum esse dixit. Principem & Regem per omnem vitam in dictis atque promissis ita constantem esse oportet, ut illius vel iniurati dicto, citius, certiusque, quam aliorum iureiurando, fides habeatur: ut Nicodem docet Isocrates, Fides, inquit Dionysius Halycarnass. cuiusque iuramentum est maximum & firmissimum testimonium. Nullum contra crimen grauius perfidia haberi debet: quod semel admissum, nunquam aboleri, nulla obliuione deleri potest: quod Græcis, Pœnis, & aliis gentibus perpetuam ignominiam notam inussit.

Rursus igitur, ô Gallia, tibi gratulor, quod Regem singulari Dei clementia consecutus es, antiquæ, firmæ, constantis, & verè Francicæ fidei. Nam ut S. Bernardus ep. 219. ait, apud Francigenas olim iuramentum soluere probro ducebatur. Verè igitur Regem tuum *αὐτὸν ὁλοῦν καὶ ἁγνόν* .i. mente sana, ab omni dolo, & furo aliena, appellare possumus: qualem Regem Plato in epistola quadam Dioni propinquo suadet ut eligant. Tantò autem admirabilior, gratior, & iucundior hæc tibi singularis Regis tui fides videri debet, quò illa rarior est infido, perfido, ac per iuro isto nostro sæculo, quo contra tuta magis, ac peruiulgata est perfidia, atque periurium. Merito igitur hunc tuum Regem Vvarramundum quod nostra lingua os verax sonat, ap-

pellamus : quod nomen fuit primi Regis Francorum , Marcomiri ducis filius anno 420. & de quo per lineam continuam masculinam & directam descendit hic Rex tuus. Exulat à nostro hoc seculo & ab orbē Christiano fides, perfidia atque periuriorum plena sunt omnia: ita ut illud Solom. Pro. 20. dictum verè possit vsurpari, virum fidum seu fidelem quis inueniet? Fides enim illa quæ Deo est præstanda, quæ in Deum dirigitur, nequaquam vera & sincera in iis esse potest, qui fidem hominibus etiam improbis datam atque promissam non præstant. Quicquid igitur illi de sua fide, in Deum, in Christum verum Deum, & hominem, vnicum Dei, hominūque mediatorem, iactant, atque gloriantur: tamen si perfidi sunt atque periuri in proximum, illi omnis profectò fidei atque religionis reuerà expertes sunt censendi: non secus atque illi, qui, teste Ioanne Apostolo, vacui sunt charitate erga proximum, charitate quoque erga Deum omnino carent. Ethnici quoque maiore religione fidem etiam hostibus datam seruandam sibi, atque colendam esse duxerunt, quàm nos, qui Christiani nominis auctoritatem nobis vindicamus: id quod multis exemplis probari posset. Fidem violare hodie inter Christianos pro ioco & ludo habetur: & ludunt Reges fœderibus, ut pueri nucibus. Tàto magis igitur Regis tui fidem, quam etiam inimicissimis datam sanctè, religiosèque præstat, atque seruat, admirari, & imitari debes.

Regia præterea virtus, Regibus in pace, belloque

Idque maximè necessaria, viri propria, & maximè decora, est fortitudo, seu magnanimitas: quam eleganter verèque oratorum ille maximus, consideratam periculorum susceptionem, dolorum laborumque perpersionem, ac contemptionem definit: cuius virtutis proprium esse ait nihil extimescere, omnia humana despicere, nihil quod homini accidere possit extimescendum putare, nulli neque fortunę, neque perturbationi succumbere. Eius munera maxima esse, mortis dolorisque contemptionem. Nam fortitudo omnis aut in dolore, aut in labore, aut in periculo spectatur.

Fortitudo igitur quę est animi affectio, legi in perpetiendis rebus obtemperans, vel rerum magnarum appetitio, & rerum humilium contemptio: comites habet (iuxta Cic.) magnitudinem animi, gravitatem, patientiam, rerum humanarum despicientiam: iuxta Macrobiū, magnanimitatem, magnificentiam, constantiam, perseverantiam. Hac quoque virtute Rex tuus omnium confessione simul & admiratione excellit: quę in multis rebus arduis, difficillimis, atque periculosissimis spectata satis est, atque probata. Est igitur quod rursus gaudeas, ô Gallia, Deoque gratias immortales agas, quod eius munere, & beneficio Regem adepta es forti, strenuo, excelsō, intrepido, & inuito animo pręditum, bellicosum: qui nulla pro aequitate, & iustitia, pro patria, pro subditis pericula adire recusat: qui in rebus maximis gerendis, & sustinendis exercitatus, nunquam contrahit aut de-

mittit animum: nullorum negotiorum mole-
stiarumve mole, ac magnitudine obrui, ac debi-
litari potuit, quin contra vrget ac resistit, vltro-
que negotiis occurrit. Qui in acie præire audet,
& cui egregiè conuenit quod de Iulio Cæsare
legimus (huic enim Rex tuus multis nominibus
est comparandus) nunquam illum dixisse: Illuc
ite, sed huc venite. Idem de Rege tuo verissimè
dici potest, qui præire, vel primus in aciem pro-
dire est solitus, qui vt de Rege in sacra historia
scriptum, graditur ante suos, pugnat bella eo-
rum. Nam instar leonis fortissimi, nullius ad oc-
cursum expauescit, ita vt verè *Βασιλεὺς τὴ ἀγαθὴς,*
κρατερός τ' ἀμικτῆς. i. Rex simul atq; bellator bo-
nus dici mereatur. Nullum ferè iam per aliquot
annos prælium, nulla pugna, nulla velitatio, nul-
la oppidorum oppugnatio extitit, cui ille non
interfuerit solùm, sed etiam præfuerit, in qua
non præiuerit: ita vt hac in parte multis viris bo-
nis, & sapientibus, de salute eius valde, vt par est,
solicitis etiam hic modum excedere videretur.
Vnde meritò Audax siue Animosus videtur
posse cognominari, quod Philippi I I I. illius co-
gnomentum fuit, qui Ludouici S. Filius fuit pri-
mogenitus, & fons familiæ Valesiæ: frater Ro-
berti, à quo altera familia Borbonia promana-
uit. Quod tamen non temeritati, sed bonæ con-
scientiæ, animi magnitudini, & confidentiæ in
Deo est tribuendum. Vnde admonitus aliquan-
do à viris patriæ, & eius salutis amantibus, vt ef-
fet cautiòr, maioremque salutis suæ rationem
duceret, respondere magno & excelsò animo
fuit

fuit solitus, se vitam suam diuinæ commississe tutelæ, atque præsidio, & cum causæ suæ bonitate, & conscientię integritate fretum, tum Dei clementia, atque misericordia, quævis pericula pro patriæ pugnando salute contemnere, atque despiciere. Denique cum subditi sui non dubitent vitam suam, atque sanguinem profundere, vel in discrimen offerre pro ipso: se quoque vicissim pro illis quævis pericula subire paratū esse.

Regia quoque, & verè Christiana virtus est, Patientia, quam Cicero rerum arduarum, & difficultium voluntariam perpeffionem honestatis gratiâ, definit: quam idem fortitudinis comitem, Seneca, fortitudinis neruum, appellat. Hanc virtutem in sacris literis mirum in modum nobis commendari, atque mandari nouimus. Deus autem Regem tuum innumeris casibus aduersis, & calamitatibus adhuc exercuit: quas ille patientissimo, æquissimoque animo adhuc pertulit, atque perpeffus est. Obduru itaque iam pridem, & quasi callum obduxit hac virtute ad quasuis difficultates, labores, dolores, iniurias, molestias, patienter, placidè, atque sedatè perferendas. Mirifica est, & incredibilis eius frigoris, caloris, sitis, inediæ, vigiliarum, atque laborum militarium patientia, quibus ab ineunte ætate assueuit. Regium est (vt ait Antisthenes) malè audire, quum benefeceris. Hinc Epaminondas Thebanus, quem Cicero totius Graciæ principem appellat, æquo animo calumnias tulisse scribitur: asserens fortitudinis, ac magnanimitatis hoc esse munus: (quod tamen scitum di-

etum alij Alexandro M.tribuunt.Eadem hæc & Octauij Augusti, & Vespasiani, & Titi eius filij (quem præ mansuetudine & facilitate delitias humani generis appellabant,) & C.Iulij Cæsaris fuisse dicitur, qui conuitia, opprobria, & calumnias quasuis patienter tolerasse feruntur, nec se iis passos fuisse ad vindictam, & ultionem irritari. Huius laudis, atque virtutis strenuus est imitator Rex tuus: qui benefactis studens strenue maledicta hominum, atque conuitia contemnit, nec se facile ad iram, & crudelitatem prouocari patitur.

Regia præterea virtus, quæ Regibus ac principibus maximo est ornamento, atque decori, ad Regna, & Respub. bene gerendas maximo subsidio, quæque cum omnem hominem Christianum, tum Rectorem præcipue Reipub. & Ecclesiæ decet, est constantia, quam M. Tullius stabilem esse dicit & perpetuam in ratione bene considerata permansionem. Nihil est, quod tam deceat, inquit Cicero, quàm in omni regenda, consilioque capiendo seruare constantiam, quam animi sanitatem idem vocat. Hac virtute olim claruit Cato: qui, vt idem ait, grauitatem suam perpetua constantia roborauit, sempérque in proposito, susceptoque consilio perseuerauit. Contra verò inconstantia, mobilitate, & crebra sententiarum, tanquam tempestatum commutatione, vel in priuato homine, nedum in Rege, nihil est indignius, nihil impius. Stultus, inquit Sapiens, vt Luna mutatur. Vtenim leo collum dicitur habere inflexibile: ita

ita Re
consta
creta
mutab
dorum
gis tui
& per
consta
ris. C
patria
consta
die m
incon
impli
data fi
omni
pietat
stanti
Rom.
Re
stiano
fuit o
gnissi
tia: qu
rem,
runt.
gium
re &
quàm
rum,
beral
filius

ita Regis voluntas debet esse firma, immobilis, constans in iis, quæ bona sunt: edicta eius, & decreta æquitati, & iustitiæ consentanea, sint immutabilia: qualia olim fuerunt Persarum, & Medorum. Hic dici non potest, quàm mira sit Regis tui constantia, animique firmitas, constans & perpetua est vitæ eius ratio, animo est forti, & constanti, ita ut non perturbetur in rebus asperis. Constans & perpetua est eius voluntas in patriam. At tanto admirabilior est Regis tui constantia, quò crebrior & frequentior est hodie multorum, qui se Christianos profitentur, inconstantia: cum leuitate, tum etiam periurio implicata. Constantissimus est in promissis, & data fide seruanda, in consiliis, dictis, & factis, in omni ratione vitæ, in amore erga patriam, in pietate, & religione: ita ut Constantis, siue Constantij, & Constantini (quæ fuerunt clariss. Imp. Rom. nomina) cognomen mereatur.

Regia præterea, & cum omni homine Christiano, tum Rege imprimis (cuius symbolum fuit oleum, quo inungi olim Reges soliti) dignissima virtus est Liberalitas, seu munificentia: qua multi Reges, atque principes sibi fauorem, gratiam, atque gloriam æternam pepere-
runt. Artaxerxes dicere est solitus: magis Regium, ac Regiæ maiestati conuenientius esse dare & largiri, quàm auferre: & vestire potius, quàm denudare. In historiis, Cyri Regis Persarum, à Xenophonte præ cæteris virtutibus, liberalitas maximè celebratur: Titus Vespasiani filius teste Suetonio, dicere solitus est, illum

diem sibi periisse, quo nullum in aliquem beneficium collocasset. Ludouici x. Regis tui munificentia, in historiis valde laudatur. Sed non opus est antiqua proferre exempla. Rex tuus, huius quoque virtutis multa, iam dedit, & dat adhuc quotidie gloriosa documenta. Incredibilis enim est eius cum erga quosuis pauperes, inopes, tum erga bene de se, de patria & Republica meritos, benignitas, atque beneficentia. Itaque ut Valerius domum Agrigentini cuiusdam, & nos illius aulam, atque domum Regiam munificentiae officinam appellare possumus: quam etiam eò magis exercebit, quò Deus maiorem illi eius exponendae facultatem dederit. Eius benignitatis illud maximo est argumento, quòd populum intolerabilibus istis tributis, atque vectigalibus liberare, vel certè alleuare conatur. Cum plerique principes tributis intolerabilibus populo imponendis, acerbèque exigendis studeant.

Regia virtus (quæ superioris illius comes, vel germana quasi soror appellari potest) est humanitas & facilitas, quæ in Rege omnium gratissima ad ineundam gratiam hominum beneuolentiamque conseruandam aptissima est virtus. Nihil enim iis, qui alienæ sunt potestati subiecti, gratius & iucundius esse potest, quàm quum intelligunt aures eius, qui regnat, eis patere, nec querelis eorum clausas esse. Vnde facetus quidam inter iocandum dicere solebat: malle se cecutienti, quàm surdastro domino inseruire. Facilitas Philippi Macedonum Regis, multarum
ciuitatum

civitatum amicitiam ei conciliauit: adeò vt plures beneuolentia, quàm armis subegerit. Rex igitur promptus, & propensus esse debet ad audiendas suorum querelas: in quo si se difficilem præbet, illum necesse est in Dei hominùmque odium, ac offensionem, ac proinde maximum non Regni solum, sed etiam vitæ amittendæ periculum incurrere: vt Demetrii, Pausaniæ, & aliorum, qui ob id fuerunt interfecti, exempla docent. Regis palatium omnibus patere debet, ita vt sit miserorum & afflictorum tutissimus portus, atque perfugium. Atqui Regis tui quanta sit morum comitas, atque facilitas, quanta humanitas, satis dici non potest: ita vt qui dignitate Regibus, & principibus excellit, facilitate par infimis esse videatur: nemo eius congressum, nemo sermonis facilitatem desiderauit: facillimi sunt ad illum aditus, eius aures patent omnibus. Maxima est eius sermonis affabilitas, in fronte, vultu, sermone, mirifica apparet, & elucet iucunda eius lenitas, morum dulcedo, & suauitas: ita vt quod de P. Scipione Africano Liuius prodidit, de illo quoque verissimè affirmari possit: Tanta, inquit, inerat comitas Scipioni, atque ad omnia naturalis ingenij dexteritas, vt non Syphacem modò barbarum, insuetumque moribus Romanis, sed hostem etiam infestissimum, facundè alloquendo sibi conciliaret. Et tamen hæc eius comitas non est sine seueritate, neque grauitas sine facilitate: quo nomine Atticus à Cornelio Nepote laudatur.

Regia virtus humanitati, & facilitati affinis,

seu potius illius mater, ac planè Christiana, est humilitas, vt vulgò appellatur: quæ est voluntaria sui ipsius despicientia, animique summissio, & modestia: cui opposita est arrogantia, superbia, insolentia. Ad hanc virtutem (ταπεινοφροσύνη Græcis dictam) nos adhortatur Petrus, & ea præditos: fauore suo Deum prosequi affirmat. Humilitatem, inquit, animi vobis infixam habete: propterea quòd Deus superbis resistit, humilibus autem dat gratiam. Huc facit illud Syrachii: Quò maior es, inquit, hoc te summissius geras. Deus in lege sua Regi, disertè præcipit, & mandat, vt sit modestus & humilis: ne cor eius extollatur & efferatur super fratres per superbiam. Rectorem te posuerunt, (inquit Sapiens) noli extolli: esto in illis, sicut vnus ex illis. Abominatur contrâ, inquit Salomo in Prouerbiis, Dominus omnes superbos: Et superbia deiecit homines, at humilis potietur gloria. Denique tota Sacra scriptura, siue Spir. S. per illâ ad nullam ferè virtutem nos acrius adhortatur, quàm ad humilitatem: & à nullo vitio magis dehortatur, atque deterret quàm à superbia, tanquam radice, atque semente omnium malorum. Patriarchæ, Prophetæ, Apostoli, Christus ipse horum omnium princeps, & exemplis & præceptis hanc virtutem maximè docuerunt. Eiusdem virtutis multa signa, atque testimonia in Regis tui dictis, factis, gestibus, totius vitæ consuetudine cernere licet. Regem habes Dei gratia non elatum, superbum, arrogantem, alios præ se contemnentem, ac despicientem: sed ab ambitione, superbia,

superbia, & arrogantia planè alienum, in cuius ore, vultu, oratione, gestu, incessu, vestitu, moribus apparet, & elucet singularis humilitas, atq; modestia. Odit contra homines, vt avaros, ita ambitiosos, fastu turgidos. Itaque Deus illum secundum sua promissa ad maiorem dignitatem prouexit & prouehet, iuxta illud Iacobi: Humiles vos, inquit, reddite in conspectu Domini: & eriget vos. Et illa Christi: Quicumque se effert, humiliabitur, & quisquis de se summissè sentit, extolletur: quibus congruunt illa virginis *Deo-
us & deo apbiv* verba, quibus Deum humiles exaltare, & erigere, at potentes, nempe superbos sibi præsidentes, è foliis detrahere affirmat. Et illa Syracidis: Deus, inquit, omnibus temporibus superbos ignominia, & dedecore affecit, & tandem horribiliter euertit.

Regia, verèq; diuina, & Christiana virtus est Clementia, & mansuetudo, qua nihil laudabilius, & generoso animo dignius, nihil ad conciliandam auctoritatē, gratiam, & beneuolentiam efficacius. Hæc regum maximum decus & ornamentum est: quam Seneca Lib. 2. de clem. temperantiam animi in potestate vlciscendi, vel lenitatem superioris aduersus inferiorem in constitutendis pœnis definit: quam idem ornamentum imperiorum simul, ac salutem certissimam vocat, qua principes non honestiores solum, sed etiam tutiores reddantur. Hæc quoniā Reges, & principes maximè decet, inde Clementissimi, & Serenissimi vulgò cognominantur: qui titulus Regibus Israel antiquitus fuit tributus, vt sacræ

testatur historia. 2. Reg. 20. Nihil laudabilius, inquit Cicero, nihil magno & præclaro viro dignius placabilitate, & clementia: Clementia est moderari pœnas eorum, qui sunt sanabiles. His virtutibus excelluit C. Iulius Cæsar, cuius admirabilis fuit tum in pace, reique pub. administratione, tum in bello, in victoriis, in vlciscendis hostibus animi moderatio: qua vsque ad pœnitentiam omnes superauit. Dauid singulare clementiæ exemplum fuit, qui à vindictæ cupiditate alienus grauißimas iniurias à Saule, à Semejo, ab Absolomo, & aliis sibi illatas patienter tulit. Verumtamen in Regibus mansuetudo grauitate & iustitia condienda est.

Est igitur rursus, quòd gaudeas, ô Gallia, atq; læteris, quòd Regem tibi Deus dedit non crudelem, implacabilem, & inexorabilem: sed Regem clementissimum, mansuetissimum, ad iniurias quasuis grauißimas condonandas promptiorem, quàm alij ad inferendas. Vt Assuerus Rex ille Persarum potentissimus sceptrum aureum intendit ad Hesteram (quod erat clementiæ signum:) Ita Rex tuus clementiam suam porrigit, ac præbet omnibus suis hostibus.

Et si verò propria hæc est genti Borboniæ & ingenita, ac insita à natura virtus, ita vt non tam à dominio Borbonio, quàm à natura, morumq; singulari puritate, atque Bonitate, illa verè Regia Ludouici IX. propago, atque soboles denominanda esse videatur: tamen tuus Rex in illa familia vti primogenitura, ita etiam huius vir-

tutis

tutis nomine, palmam videtur possidere. Maxima enim eius est mansuetudo, incredibilis in summa potestate rerum omnium modus, atque moderatio, ita ut illa omnes in admirationem rapiat. A vindictæ enim & ultionis studio, cupiditæque alienissimus, graues, multas, & atroces sibi illatas iniurias, communis concordia, & salutis gratia, voluntaria obliuione libenter contriuit, multis infestissimis suis hostibus pepercit, cuius rei illos ipsos testes appello. Et certè clementia, in ipsa ira, (quæ in Regibus vehemēs esse solet,) & in victoria, (quæ insolens plerumque est, atque ferox) admirabilis meritò cenferi debet. At hic tuus Rex, & iram suam, & ipsam victoriã, cuius maxima vis, adhuc ita vicit, ut pluri, qui iustissima eius ira, atque victoriæ conditione, iure cecidissent, clemētia eius, atque lenitate incredibili fuerint conseruati: multi, qui ei inimicissimi fuerant, culpæ suæ liberationem, errati veniam impetrarint. Ita ut hac de causa inuictus meritò, seu inuictissimus dici mereatur, qui non homines tantum, sed etiam iram suam, atque victoriam vicit, victis clementissimè parcēdo, & ignoscendo. Dauidis strenuus est imitator. Nam quemadmodum ille Sauli socero suo, & aliis infensissimis, infestissimisque suis hostibus: sic hic tuus Rex multis grauissimis suis hostibus, & inimicis, qui illū capitali odio persecuti sunt, qui eius vitam crudelissimè persecuti sunt, & infestarunt, clementissimè pepercit. An non rex tuus hac sua clementia, lenitate, mansuetudine atque misericordia præcellente, viam

sibi, aditumque ad hunc dignitatis gradum patefecit, munivit: an non hæ virtutes, satellitum & custodum instar, illum adhuc custodierunt aduersus innumerabiles insidias, an non gloriam illi, maximam pepererunt? Vt igitur Rex tuus fortis est ad resistendum hostibus suis, qui eum oppugnarunt: ita iisdem victis, atque supplicibus ad ignoscendum est longè promptissimus. Ille iuxta Bruti dictum, acrius prohibenda bella ciuilia, quàm in superatos iracundiam exercendam esse existimat. Ita tamen clementiam, & mansuetudinem adhibet, iuxta M. Tullij præceptum, vt non negligat reipub. causa seueritatem salutare qua vt idem ait, vincit inanem clementiæ speciem, cum nimia lenitas peccando licentiam pariat. Et verissimè aliquis dixit, esse quandam misericordiam crudelem.

Regia præterea virtus est Charitas, cum erga omnes homines (qui proximi nomine in sacris literis sæpè designantur) tum præcipue erga subditos, quos Rex tanquam parens, atque pastor bonus, summo amore, atque fauore prosequi, & illorum saluti atque commodis, omni studio, & opera consulere debet: Omnium charitates, inquit Cicero, patria vna complexa est. Rectè dictum est à Platone, ortus nostri partem sibi patriam ipsam vèdicare. Idem: Decet, inquit, chariorem esse patriam nobis, quàm nosmetipsos: &: Nul- lum est tantum periculum, quod sapiens pro salute patriæ vitandum arbitretur. Hac de causa Reges olim, vt Ludouicus xii. & alij, patres patriæ fuerunt honoris & amoris causa à subditis appellati

appellati. Talis profectò est amor Regis tui erga te atque patriam tuam flagrantissimus, quo incensus & inflammatus ipsa naturæ bonitate, nihil prætermittit, & adhuc prætermisit operæ, studij, curæ, atque laboris, quod ad dignitatem, libertatem, & salutem tuam pertinere videtur. Non secus igitur, atque parens *φίλος πατήρ* erga vos tanquam liberos suos piè est affectus, atque animatus: quos etiam verè liberos, verèq; Francos (quæ vox liberum sonat) efficere conatur.

Regium etiam imprimis munus est ciuium concordiam (quam M. Varro à cordium congruentia vult dictam, qua, vt Crispus Sallustius ait, parvæ res crescunt, vt discordiâ maximæ dilabuntur: quam Philosophi nonnulli urbium dominam, & Reginam appellarunt: quam nos & chordam .i. vinculum validissimum, atque firmissimum: & coronam .i. ornamentum Rerum pub. non ineptè meo iudicio appellare possumus) omni studio fartam tectam tueri, & conservare, & amissam reuocare. Nam, vt verissimè Polybius dixit, omnis Respub. conservatur foris fortitudine in hostes, domi concordia. Ita Regi tuo nihil magis curæ est, atque cordi, quàm concordia vestra: nihil ille magis omni studio suo enititur, atque elaborat, quam vt vos, qui discordes estis, concordissimos, vobisq; inuicem amicissimos rursus reddat, nòsque à tristibus, & funestis istis discordiis, atque dissensionibus ad veram, iucundam, & salutarem concordiam Thra-sybuli & Aureliani Imperatoris exemplo tandem reuocet.

Regia quoque virtus est sobrietas, cibi potúsque temperatia, iuxta illa Pro. 31. Solomonis, Nolite Regibus dare vinum, scilicet immodicum: illud enim virus est ac venenum in priuatis, nedum in Regibus, ac Principibus, qui maiestate potestatéque sua freti, sibi licere putant, quod animi libido suadet: ac vitiorum est & turpitudinis omnis fomentum. At tibi Dei beneficio Rex est cibi potúsque mirum in modum temperans, imò inedia, famis atque sitis mirifice patiens.

Quum prætereà in Rege ad bene regnandum requiratur bene sapientérque vel tacendi, vel loquendi scientia, atque prudentia: Rex hic tuus vtriusque modum, optimè tenet. Deinde sermo illius planè est Regius, hoc est verax, liber, grauis, Laconicus, breuis, argutus, acutus: adhuc festiuus, in familiaribus præsertim colloquiis. Plurimum enim delectatur iocis, atque facetiis non scurrilibus, & obscænis, sed liberalibus, & honestis, ab omnibus mendaciis, calumniis, maledictis, blasphemis, deierationibus, (quibus vel Dei, vel hominum nomen, atque fama læditur, ac violatur) toto pectore abhorret, & ipse ab iis abstinet, & omnes alios cum exemplo suo, tum pœnarum grauitate deterret.

Regem prætereà ad bene & vtiliter regnandum aptum, & idoneum sapientissimi quique censent, qui prius ipse bene paruerit, & obedi-rit. Difficile enim est illum imperare, & alios regere, qui nullius vnquam imperium subiit. Nam obediendi, atq; obtemperandi studium cum regendi

gendi scientiam efficit, tum animo moderatur, quorum utrunq; ad regnum bene administrandum est pernecessarium. Hic verò tuus Rex, & parentibus, & præceptoribus à pueris bene præcipientibus libenter paruit, atque obtemperauit. Præterea hodie quoque omnibus bene morientibus, docentibus, ac consulentibus, cum politicis, tum Ecclesiasticis de rebus morem gerere est paratus. Seruiuit adhuc Deo, seruiuit Christo, seruiuit Regibus, seruiuit patriæ, seruiuit virtutibus, seruiuit legibus, quis ergo illum imperio cum dignum, tum aptum esse non censebit?

Postremo (ut huic Regiarum virtutum enumerationi finem imponam) Regum, ac Principum virtus singularis, munus, & officium præcipuum est, legum obseruantia, atque obedientia: atque ut sibi ipsi suis affectibus bene imperent. Legum diuinarum, & humanarum, quanta sit in omni regno, Repub. societate humana, ad eius conseruationem utilitas, imò necessitas, quid opus est multis verbis ostendere? Res ipsa loquitur, ipsa quotidiana testatur id satis superque experiëntia. Omnia inquit Cicero, nostra comoda, iura, libertatem, salutem deniq; à legibus obtemus: & idcirco à legibus non est recedendum. Indignum est, inquit idem, in ea ciuitate, quæ legibus teneatur: discedi à legibus. Hoc enim vinculum est huius dignitatis, qua fruimur in Repub. hoc fundamentum libertatis, hic fons æquitatis. Mens, & animus, & consilium, & sententia ciuitatis posita est in legibus. Ut corpora nostra sine mente, sic ciuitas sine lege suis partibus, ut ner-

uis, ac sanguine, & membris vti non potest. Legum ministri magistratus: legum interpretes iudices: legum denique idcirco omnes serui sumus, vt liberi esse possimus. Itaque omnia legum præscripto, & imperio fieri debent. Quid quæso his Cic. verbis pulchrius, elegantius, planius de legum vsu, & vtilitate dici posset, quibus ciuitatis, & Reipub. salutem in legum obseruatione, eiusdem exitium in earundem neglectione, ac violatione, consistere satis manifeste docet?

Quæ cum ita sint, Reges (quorum curæ, atque fidei multarum ciuitatum, atque populorum salus à Deo commissæ, atque concredita est): omni cura, & sollicitudine leges, quæ rerû pub. columna sunt, atque fulcra, sertas, tectas tueri, & conseruare, earumque violationem grauius punire debent. Ipsum Regis nomen illos huiusce sui officij admonet, quod à regendo deducitur, & inde regula atque rectum vt ante diximus. Est autem lex nihil aliud, quàm recti, & æqui regula, atque norma: siue recti, & honesti præceptio, & prauis, iniusti, & inhonesti prohibitio. Regis itaque, & Legis, siue vocum ipsarum, & soni similitudinē, siue res vocibus subiectas spectes, maxima est cognatio, & affinitas: ita vt neque Rex sine lege, nec lex sine Rege consistere possit. Et quemadmodum leges Regum, Principum, ac magistratuum, ita vicissim Reges, Principes, ac magistratus legum quasi parentes, custodes, & patroni sunt habendi. Hinc Cicero verè, scitèque magistratū quidem legem loquentem, legē verò magistratū mutum appellat: Et Xenophō magistratū legem viuentem,

viventem, atque videntem: Et Arist. principem
 νομοφύλακα .i. legum custodem vocat. Optime
 autem facillimeque leges diuinas, & humanas, ac
 patrias præsertim, saluas & incolumes tuebitur,
 si non modò ipse subditos suos ad illarum reli-
 giosam obseruationem, atque obedientiam adi-
 get, verùm etiam si earum obseruantia, & obe-
 dientia à seipso exordium duxerit, ipsemet prior
 eis sese subiecerit, iis obedientem se & obse-
 quentem præbuerit. Non sine causa igitur Deus
 in explicatione officij Regij hoc Regibus potis-
 simum præcipit, vt legem diuinam cordi, me-
 moriæque suæ quasi inscriptam semper & in-
 sculptam teneant, illam semper ante mentis o-
 culos sibi proponant, illam dies, noctesque me-
 ditentur, eius cùm intelligendæ, tum præstandæ
 facultatem à Deo petant, ad illam cœ regulam
 rectam, atque perfectam omnia consilia, & ac-
 tiones suas dirigant: id enim pertinere cùm ad
 Dei præpotētis illius Regis Regum & Domini
 Dominorum gloriam, quam omnibus mundi
 huius Regnis, atque imperiis longè antepone-
 re debēt: tum & ad ipsummet, & ad subditorum,
 totiùsque populi illorum tutelæ à Deo com-
 mendati salutem. Regnum autem Galliæ opti-
 mis, & salutaribus legibus constitutum, ac fun-
 datū est, quarum custodiæ, & obseruationi reli-
 giosæ diuturnus ac florentissimus eius status af-
 scribi, acceptusque referri debet. Reges enim tui
 legum Regiarum, & patriarum fideles fuerunt
 custodes, omnemque dederunt operam, vt illæ
 non essent tanquam gladius in vagina recondi-

tus, sed vt executioni mandarentur. Regum autem munus esse legibus parere, atque obtemperare, atque ita suo exemplo, cuius maxima est vis, atque pondus, alios quoque ad legibus obsequendum inuitare, & allicere, cum sacre scripture auctoritate (de qua paulo ante dictum est) tum sapientissimorum quorumque testimonio, & ratione ipsa facillime comprobatur. Plutarchus in magnifico, verèque philosophico Periædri principis Corinthij epulo (ad quod multi celeberrimi totius Græciæ Sapientes inuitati fuerant) cum singuli ex ordine sententias suas de optimo principis, & Reipub. statu, exposuissent, Biantē Præneum secundo loco dixisse refert, illum sibi clarum, gloriosumque principem videri, qui seipsum patriarum legum imperio subiiciat. Mandane Cyri Regis Persarum mater apud Xenophontem, Regibus, inquit, non libido, sed leges dominantur. Plinius Secundus, Traianum hoc nomine laudat, quod consule sedente, & iuramentum præbente iurauerit, se legibus pariturum, cuius verba hæc sunt: Ingens gloria tua Cæsar, inquit, ipse te legibus subiecisti, quas nemo principi scripsit, sed tu tibi nihil amplius vis licere, quam nobis: sic fit vt nos plus tibi velimus. Non est princeps supra leges, sed contra, leges supra principem. Idem Cæsari, & Consuli, quod ceteris non licet, &c. Vnde & abiturus magistratu iuratur nihil contra leges factum. Magnum quod iurando promitteres, maius postquam promissisti. Pacatius Theodosio: Tantum, inquit, tibi licet, quantum per leges licebit. Ius
sumum

sumum facultate & copia commodandi, non
 securitate peccandi experieirs. *Cæsari*, inquit *So-*
neca, cum omnia licent, propter hoc minus li-
 cet. Principis vita censura est, inquit *Plinius Se-*
cundus, eaque perpetua, ad hanc dirigimur, ad
 hanc conuertimur. Nec tam imperio, quam e-
 xemplo opus. Vnde *Claudianus*: Honorum in-
 stitutum ait: Regis ad exemplum, neq; sic com-
 ponere sensus, Humanos edicta valent, quam vi-
 ta regētis Componitur. Huc facit illa principum
Rom. sententia, quæ extat in iure civili: *L. digna*
vox. C. de Leg. Dignam maiestate Regnantis
 vocem, legibus se alligatum fateri principem.
 Hac de causa doctissimi, sapientissimique viri
 hoc inter Regem, atque tyrannum discrimen
 statuunt, quod tyranni imperium legibus sit so-
 lutum, & infinitum, Regum autem officium le-
 gibus, & æquitate sit definitum. Vnde *Theodo-*
sius Imp. hoc ipso longè se à tyranni moribus a-
 besse declarauit, quod se legibus professus est al-
 ligatum esse. *Plato* in *Epist. 8.* ad *Dionis* propin-
 quos docet illam *Rempub.* & Regnum florere,
 in quo νόμος κύριος ἐστὶ βασιλεὺς τῶν ἀνθρώπων, ἀλλ'
 ἔκ ἀνθρώπων τυράννος νόμος. i. vbi lex Regium, me-
 ritumque in hominibus imperium obtinet, non ve-
 rò homines legum tyranni extiterunt. Hoc ita-
 que dat consilium tyrannidem affectantibus, vt
 imaginariam, & e mentitæ huiusmodi potesta-
 tem fugiāt, & oderint, & in Regiam dignitatem
 commutent, vt Regiis legibus seruiant, & ob-
 temperent, maximis honores à voluntariis ho-
 minibus, & ipsis legibus haud dubiè reportant.

ri. θεός, ἡ δὲ πόλις, καὶ ὁ πόσις, νόμος: ἀφ' οὗτος δὲ, ἡ δὲ πόλις. Ibi-
 dem vult Regiam potestatem esse *ἡ δὲ πόλις*, &
 legibus subiectam, ita vt leges dominantur, non
 modo alfis, sed ipsis Regibus, si quid *παράνομος*, i.
 præter ipsas egerint. Detestanda igitur est illa
 magorum Perficorum sententia, qui Cambyfis
 Regis sui turpissimum incestum cum sorore ap-
 probandi gratia, illum à patriis quidem legibus
 alienum nō esse dixerunt, sed aliam esse Regiam
δογὴ qua Regi licet, quicquid libido suadet. Non
 hæc lex Regia, sed tyrannica, immò diabolica est
 appellanda, ac ne legis quidem nomine digna, sed
 potius omniū legum euersio dicenda est. Sic Lu-
 lia impurissima Caracalli nouerca dixisse fertur,
 principibus omnia licere, eorumq; voluntatē, &
 libidinem pro legibus esse. vt Spart. in Carac. re-
 fert. Idē sensit Thrasymachus Chalcedonius, qui
 principū utilitate, atque libidine ius omne de-
 finiebat, ac iustitiam in eositam esse dicebat, vt
 subditi principam iussis, siue iusta illa essent, si-
 ue iniusta, obtemperarent. Quando item Cæsa-
 rem Octavianum olim senatus Rom. decreuit
 legibus esse solutum: an non eo ipso demonst-
 ruit afflictam esse Rempub, oppressam esse liber-
 tatem, illum esse tyrannum? Non igitur iuriscon-
 sulti; sed iuris potius corruptores, perniciosissi-
 miq; assentatores illi existimandi sunt, qui Re-
 gibus, principibus, ac magistratibus persuadere
 conantur, id quod sibi facillimè persuaderi pa-
 triuntur, illos legibus esse solutos, ac illis nequa-
 quam teneri alligatos, & astrictos: illos esse su-
 pra leges, voluntatem illis esse pro lege, atque
 ratione,

ratione, illis licere quicquid libet, illos leges
 quasvis perrumpendi habere potestatem, legi-
 bus non parere debere, sed imperare: illos legi-
 bus longè esse superiores, legumque non seruos,
 & minitros, sed dominos esse: cum contrà Ci-
 cero idè nos legum seruos esse dicat, vt liberi
 esse possimus. Euellendæ sunt ex animis homi-
 num impia, & pestifera ista opiniones, seu po-
 tius errores exitiales. Verè filij Belial dicuntur
 illi, qui *ἀνομος* & *ἀνυπόβουλος* .i. exleges, ab omni
 obseruatione immunes esse volunt, quique le-
 gum suauissimum, saluberrimūque iugum, &
 imperium excutere conantur, qui suam libidi-
 num, atque cupiditatem, diaboli denique man-
 cipia, quam legum, iuris, æquitatis, honestatisq;
 serui esse malunt. Diaboli vinculis malunt esse
 astricti, quam legis diuino vinculo, vel, quam
 Dei, iuris, atque legum, dum sibi quiduis pro ar-
 bitrio seu libidine potius sua, & dicendi, & agen-
 di licentiam infinitam arrogant.

Non imminuitur, & obscuratur hæc legum
 obseruantia illorum maiestas, & dignitas, vt nō-
 nulli opinantur, seu potius somniant: sed auge-
 tur, & amplificatur, nec seruitus hæc est existi-
 manda, sed potius pulcherrima libertas. In hanc
 sententiam sic sapienter Claudius Sefellius, De
 repub. Gallia lib. 1. Regis Ludouici xi. quōdam
 consiliarius disserit. Legibus Regum auctori-
 tas temperatur: quod ad ipsorū laudem in pri-
 mis pertinet &c. Deinde Rex legibus parendo
 hoc suo exemplo, non secus ac magnes ferrum
 vniuersum populum ad ipsam obtemperadum,

vel ad easdem sanctè , religioſèque colendas , & obſeruandas attrahit, & impellit. Contrà, quando ipſe leges contemnit , ſimul toti populo eadèdem contemnendi maximam occaſionè præbet.

Longior aliquantò fui hac in parte, propterea quòd muli hodie in Orbe Chriſtiano nefaria hac opinione ſunt imbuti, multique aduſatores, (qui vt Q. Curtius rectè dixit, plures Regum opes euertunt, quàm aperti hoſtes) gratiè illorum aucupandæ gratia hoc principibus viris perſuadere conantur, quod eſt falſiſſimum, & cum illis ipſis, tum vniuerſis populis, quibus præſunt, pernicioſiſſimum. Qui aduſatores quia volunt omnia poſſe, idcirco hoc principibus inculant, non vt illorum ſed vt ſuam auctoritatem ſtabiliant. At Regis tui longè alia eſt mens, alia ſententià, qui quidem à primis annis legibus, æquitati, honeſtatiq; parere, & ſeruirc didicit. Idem hodie quoque legem diuinã ſemper intuetur ac contemplatur, ad illam vitam morèſque ſuos componit, omnia dicta, facta, & conſilia ſua dirigit. Leges patrias antiquorum illorum regum, Imperatorum, atque principum exemplo conſeruare ſtudet: cùmque illarum beneficio ad hanc dignitatem ſit euectus, libenter illis ſe ſubiicit, illis parer, & obtemperat. Non opibus, ſatellitio, poteſtatèque ſua fretus quiduis, quod libet, ſibi licere exiſtimat, ſed legibus ſe eſſe ſubiectum, & ex earum præſcripto regnandum eſſe exiſtimat. Diſcant ergo omnes Reges, Principes, & magiſtratus, Regis tui exemplo legibus parere, illas non contemnere, violare, ſed diligenter, fideliter

ſidelitèrque obſervare, iuri, æquitatiquè ſervire ſi dignitati, atque ſaluti ſuæ benè volunt eſſe cõſultum.

Et hæc quidem ſint dicta de Regis tui virtutibus, quæ quidem tot, ac tantæ ſunt : vt à nemine vel eloquentiſſimo de illis ſatis dici poſſe videatur. Harum autem virtutum, te te, inquam, ô Gallia, rurfus teſtè appello, iis fruëris quotidie, maiora illarum in dies & documenta cernis, & emolumenta atque comoda percipis. Videtur proſectò Deus omnes omnino maiorum & prædeceſſorum eius virtutes (vnde Sãcti, Pij, Adeodati, Patrem patriæ, Sapientes, Animofi, Pulchri, Magni, Sereniſſimi, Chriſtianiſſimi, fuerũt cognominati) in hũc tuum Regem vnicum congeſiſſe: ad miſerum, afflictumque tuum ſtatum inſtaurandum. Vnde verè, ac meritò Sapiens, Sanctus, Pius, Animofus, Pulcher, Magnus, Pater patriæ, Sereniſſimus, & Chriſtianiſſimus Rex appellari debet. Nec verò tu tantum, ſed etiam Italia, Hiſpania, Germania, Anglia, Scotia, Polonia, totus denique Orbis Chriſtianus harũ illius virtutum præſtantiſſ. teſtis eſt: teſtes earum ſunt tam hoſtes eius, quàm amici: quæ ita claræ ſunt, ac maniſeſtæ, vt nemo eas inſiciari poſſit. Quid dicam quòd illarum fama in Oriẽtem vſque penetrauit, tantus eſt illarum ſplendor, & magnitudo? Hę verò illius virtutes verè Regiæ, verèq; Chriſtiænæ (quæ ſunt Sancti Spiritus dona atque munera) illum non ſolũ Regem, ſed etiam Chriſtianiſſimũ Regem eſſe demonſtrāt.

Atque his quidem illius virtutibus planè cõ-

ueniunt, atque respondent egregia illa cum regni Nauarreni, tum Francici (cuius vtriusque nunc est dominus) insignia. Nauarreni enim insignia sunt Cathenæ, & Smaragdus: quæ à Sâctio prisco illo Rege Nauarræ 30. regum barbarorum victore, ac domitore profecta sunt. Nam cum, vt literis memoriæque proditum est, 30. olim barbari Reges, duce atque imperatore Smaragdo Castellæ regnum occupassent, & grauissimo Christianis iniecto metu, breui tota se Hispania potituros esse confiderent, Sanctius Nauarrorū Rex, collecto statim forti magis, quam numerofo exercitu, aduersus eos profectus est. Excogitauerant autē barbari cum aliâ multa ad prohibēdas Christianorū incursiones aptissima, tum cathenas quasdā ferreas, quibus ita vias quasdā occluserāt, vt equitatui, quæ valebāt plurimū, omnis adēpta spes faciendę in hostem irruptionis videretur. At Sâctius cum suis Sancti Sp. ductu, & impulsu, per medios hostes, atq; Cathenas illas ferreas, sibi, & suis ferro viâ faciens, tandem hostes vicit, atque fugauit, duce illorum Smaragdo sua manu obtruncato. Ad conseruandam ergo tam nobilis victoriæ memoriam, simulque ad inflammandos suorum successorum animos similis virtutis, ac laudis amore, & ipse postea cathenas pro insignibus gestauit, & instituit vt iisdē insignibus cæteri post se Reges vterentur. At quoniam eē in prælio barbarorum illorum imperatorē sua manu interfecerat: eiusdem nominis gemmam, medio catenarum illarū complexu contineri voluit. Hæc verò insignia huic quoque

quoque tuo Regi Nauarrę ob insignes illius virtutes atque victorias pulchrę conueniunt. Nam Cathenę illę Smaragdo distinctę & insignes, eius & laborum, dolorum, atque periculorum plurimorum, quibus quasi cathenis quibusdam terreis fuit constrictus, & eius victoriarum, quibus Dei ope illa omnia superauit, & denique eius virtutum, atque factorum, quę omnibus totius mudi smaragdis, gemmis, & cathenis aureis, longę pretiosiora sunt & splēdidiora signa, atq; symbola clarissima.

Sic Gallici quoque Regni hodierna insignia, quę sunt tria lilia aurea, non à Clodouæo sed Carolo VI. Francorum Rege profecta, vt Tillius annotauit, in suo breuiario rerum Fręc. eandem ob causam ei probę congruunt. Nam lilium, flos candidissimus, aspectuque iucundissimus, cuius est odor fragrantissimus, atq; suauissimus, cum virtutis, tum laudis, atque glorię est symbolum. Lilia ergo hæc Regis tui nobilitatem, integritatem, fœlicitatem, famam denique, & gloriam florentissimam significant. Sed verba prætereà illa S. Bernardi in illud Canticorum. 2. *sicut lilium inter spinas, sic amica mea inter filias.* à Rege tuo diligenter considerari velim: quę quidem Regi tuo, & præsentī eius totiùsque Regni statui, atque temporibus valde accommodata, animaduersione sunt dignissima. Spina, inquit, culpa est, Spina pœna est, Spina falsus frater, Spina vicinus est malus. Sicut lilium inter spinas, sic amica mea inter filias. O candens lilium, ô tener, & delicate flos, increduli, & subuersores sunt te-

cum, vide quomodo caute ambules inter spinas. Plenus est mundus spinis. In terra sunt, in aëre sunt, in carne tua sunt. Versari in his, & minimè lædi, diuinæ potentia est, non virtutis tuæ. Sed confidite, inquit, Ioan. 16. quia ego vici mundum. Etsi igitur vndique tibi intendi prospicias tribulationum, tanquam tribulorum aculeos, non turbetur cor tuum, neque formidet, sciens quia tribulatio operatur patientiam, patientia probationem, probatio autem spem, spes autem non confundit. Rom. 5. Cōsidera lilia agri, quomodo inter spinas vident. Si scænum, quod hodie est, & cras in clibanum mittitur, Deus sic vestit, custodit, quāto magis amicam, & spōsam suam charissimam? Deniq; custodit Dominus omnes diligentes se. Psal. 144. Sicut lilium inter spinas, sic amica mea inter filias. Non mediocris titulus profectò virtutis inter prauos viuere bonum, & inter malignantes innocentia retinere candorem, & morum lenitatem, magis autem si his, qui oderunt pacem, pacificum, & amicum ipsis te exhibeas inimicis. Id planè tibi similitudinem datam de lilio iure quodam proprietatis specialiter vendicabit, quod ipsas vtique pungentes se spinas candore proprio illustrare, & venustare non cessat. An non perinde lilium tibi videtur implere quodammodo Euangelij perfectionem, qua orare iubemur pro calumniantibus, & persequentibus nos, benefacere his, qui oderunt nos? Luc. 6. & Matth. 5. Ergo & tu fac similiter, & erit anima tua amica domini, & laudabit te, de te dicens: Quia sicut lilium inter spinas, sic amica mea

mea inter filias. Hæc scitè & eleganter Bernardus.

Scimus præterea Regiæ dignitatis insignia esse Coronas, diademata, sceptrâ, purpuras, gladios, thronum, quæ eadem sunt virtutis, rerumque cum virtute & laude gestarum præmia.

Verum quis nescit in externis his ornamentis, & insignibus nequaquam regiam dignitatem consistere, sed in iure, atque in virtutibus, sine quibus externa illa dedecori potius sunt Regibus, quàm decori, ac sordent omnino. Illa vimbriis, hæc corpori sunt comparanda. Regem itaque facit nō corona, aut diadema aureum, gemmis & margaritis refulgens, sed partim iusta legitimæque electio, siue successio, partim virtus. Coronæ enim vel ex herbis, graminibus, floribus, vel ex metallis, vt auro, argento, gemmis, lapidibus pretiosis, vel ex panno confectæ, antiquissima, & communi omnium gentium consuetudine virtutum, rerum præclare gestarum, præsertim pro patria, meritorum de patria, & victoriarum fuerunt insignia, atque symbola. Itaque Regi tuo, propter egregias eius virtutes, res gestas, victorias, cum, vt est in prouerbio, ad Corollas vsque denotant, merita in patriam, etiam si ille nec ex Regio esset genere, nec regni successio ad illum pertineret, non vna, sed multæ coronæ, triumphales, obsidionales, ciuicæ, murales, castrenses, ouales, nauales, optimoque iure essent imponendæ. Caput illius atque pectus multis præstantissimis virtutibus, quasi coronatum est, atque ornatum, quæ quidè, vt vera regni

benè administrandi organa, adiumenta, atque præsidia, omnibus vel pretiosissimis huius mundi coronis longè sunt anteponendæ. Lex est regia, vt qui regni hæres annum ætatis *xiv.* impleuisset, ei Corona imponeretur, obsequij, & fidelitatis & fidelitatum iuramenta præstaretur, auctore Fossardo Vol. 2. c. 60. Bucheto lib. 4. Et tamen Reges Franciæ possunt etiam ante Coronationem administrare, priuilegia & rescripta dare. Nam quoad potestatem, & auctoritatem gubernandi regnum, Timor Domini, inquit Syracides, est honor, & gloria, & gaudium, & corona pretiosa. Timor domini, inquit idem, est corona sapientiæ. Hac corona, id est timore Dei, Rex tuus excellit, & ornatus est. Coronatio nihil addit, nec sacra vnctio, vt decidit Præpositus in c. per venerabilem. quod autem. qui fil. sint legitimi.

Quæ autem Coronarum, eadem monilium, vestium, sceptri, solij, siue throni regalis, satellitij denique est ratio. Vera enim monilia, atque monumenta, vestes, sceptra, throni, satellitia regia, sunt virtutes, quæ vera sunt Regū, atque regnorum cum ornamenta, tum firmamenta, atque præsidia.

Quodd ad vnctionem denique attinet, in veteri Testamento scimus, & Sacerdotes, & Reges vnctione, & vnguentis consecrari, & inaugurari fuisse solitos, quæ vnctiones, cum Spiritus S. & eius donorū, tum officij Regij, atq; muneris, tum denique Christi summi sacerdotis, atque Regis figuræ fuerunt, atque notæ. vnde Aug. lib. quæst.

114. qui in Reges vngebatur olim Christi vocabantur, habentes imaginē Christi. Modum autē regiz vñctionis Rabbini veteres hunc fuisse tradunt, quod in fronte deliniebatur figura, specie coronæ. Et quoniam ex quibusdam sacre scripturæ locis constat, oleum super caput eius, qui inaugurabatur, effusum fuisse, vt suam traditionem tueantur, volunt primum delineatam fuisse coronam, postea oleum super caput effusum. Hæc verò Reges inungendi consuetudo, tādē cum multis aliis ceremoniis in ecclesiam noui testamenti introducta fuit, licet aliquantō serius. Vñctione enim episcopali ecclesia Græca, & orientalis, vltra annos 120. caruit, vt docent historiarum periti. Priores Reges & Imperatores Christianos nusquam legimus vñctos fuisse. Sed nolo hic de Vñctione hac multis disputare, quam nonnulli mirantur & dolent à Iudæorum ceremoniis ad Reges, & Imperatores, Christianos traductam fuisse. Nonnulli quidem rem politicā esse putant, ac idē usurpari posse: Sed quum illa fiat per Cardinales, atque episcopos, inde probatur, pro re, seu ceremonia religiosa, ab iis qui eam usurpant, haberi. Leonem primum, Martiani successorem legimus coronatum à Patriarcha Constantinopolitano, nec tamen vñctum. Quando verò primum instituta fuerit vñctio in orbe Christiano non planē constat, sed historiarum periti rem existimant esse nouam. Nolo etiam hic de oleo S. Remigij multis disputare, quod nonnullis videtur esse fabula. vt & illa quæ de cuiusdam Ampullæ mira-

culo circūferuntur. Quicquid sit, illud certè constat, plerisque principibus iisdemque verè Christianis satis esse si vngantur interna vnctione Spiritus S. & gratiæ. Quòd si illo ipso tempore, quo huiusmodi vnctioni locus fuit, Moyses, & alij etiam sine vnctione externa, iusti legumque potuerunt esse principes, inde constat exterram hanc vnctionem Regum, ex Iudaica Synagoga Vet. test. in Ecclesiam Christianam quasi postliminio introductam, ad Regiam dignitatem nō requiri, vnde multi olim Reges, & principes Christiani, etiam in tuo Regno, illa caruerunt.

Cum igitur Rex tuus, iusto, legitimoque modo ad Regni tui possessionem, & administrationem peruenit, oleo. i. spiritu pietatis, sanctitatis, fidei, atque religionis: item oleo. i. spiritu consilij, sapientiæ, atque prudentiæ: oleoque siue spiritu fortitudinis, patientiæ, atque constantiæ, & oleo humanitatis, benignitatis, ac mansuetudinis, quis quæso illum non verum Regem, non verè vnctum, sed vnctissimum (vt ita loquar). i. Christianum seu Christianissimum potius dixerit? Nam verà vnctionis olea & vnguenta, siue vt Græci loquuntur, chrismata sunt sancti Spiritus charismata, .i. dona, quæ omnibus vel fragrantissimis oleis, & vnguentis longè sunt anteponenda. Hæc autem Regi tuo inesse nemo est tam insigniter impudens, qui negare possit. Atque hæc quidem virtutes, quarum ab ineunte ætate ad hoc vsque tempus in pace, & in bello, in rebus secundis, & aduersis, multa documēta dedit,

dit, quarum fama totum orbem peruagatur, quę omnium gentium ore, sermone, linguis, atq; literis celebratur, tibi aculei debent atque stimuli esse, ad hunc tuum Regem magno amore complectendum, ei que obediendum. Quis igitur erit ex vobis tam oblitus beneficij diuini, tam immemor patrię, tam inimicus dignitati suę, quem non excitet, non inflammet tanti Regis tam pręclara, & eximia virtus? Nam si virtutis tanta est vis, vt illa etiam in alieno, in peregrino, atque adeo in hoste, & inimico nostro spectet nos summopere delectet, & ad illum amandum alliciat, quantò magis pręclara, & eximia hæ naturalis, & legitimi tui Regis, seu patris potius, atque pastoris virtutes, quę ad Regni patrięque tuę dignitatem, atque salutem spectant, te ad illum syncerè, & ardentè amandum, atque colendum incitare, & impellere debent. Hę enim virtutes à Deo illarum fonte, & auctore, & ad imitandum in Rege proponuntur, & ad illum, cui illę insunt, tot tantisque Sancti Spiritus muneribus cumulatum, & ornatum, amandum, ac reuerendum.

Magna p. streuò est ac omnino Regia Regis tui virtus, Fœlicitas, quam eleganter Cic. honestarum rerum prosperitatem, & fortunam, consiliorum bonorum adiutricem vocat. Quis igitur quęso similiter dubitet huic tuo Regi Regna, & imperia, omnesque Regni opes, & exercitus committere, cuius adhuc in re militari summa, & admirabilis extitit fœlicitas, qui in grauissimis casibus, atque periculis vincendis, &

superandis, admirabili, incredibilique usus est
 felicitàte, qua tamen ille nequaquam insolescit,
 sed soli Deo pro pietate sua acceptam refert,
 memor Græci illius prouerbij, *θεὸς δὲ δῶρον ἐστὶν
 εὐτυχίας ἁπορίας*: Felicitas est virtus à summo
 Deo. Cum igitur tanta sit Regis tui & auctori-
 tas, & felicitàte, vnde illum constat Deo esse ca-
 rissimum, tu quoque meritò illum eandem ob
 causam carissimum, magnòque in pretio, & ho-
 nore habere debes.

His porrò tam præclaris & splendidis virtu-
 tibus, rebûsque gestis maximam sibi, & cla-
 mam nominis famam, atque gloriam, existima-
 tionem, gratiam, auctoritatem denique non a-
 pud domesticos solum, atque subditos, verùm
 etiam exteros, atque peregrinos peperit. Aucto-
 ritatem Cic. senectutis apicem vocat, multò ve-
 riùs nos illam virtutis apicem appellare possu-
 mus. Illam in Imperatore requiri, & in bellis
 præsertim administrandis, & imperio militari
 plurimum valere Pompei exemplo idem au-
 ctor, & orator grauissimus probat. Vehementer
 enim inquit, pertinet ad bella administranda,
 quid hostes, quid socij de imperatore existimēt.
 Hanc quoque comparari, & augeri disciplinæ
 seueritate Vegetius rei militaris scriptor opti-
 mus docet. Maximam autem, & grauissimam
 Regis tui auctoritatem res ipsa, & experientia
 quotidiana satis supérq; testatur, quam illi cùm
 præcipuè Deus ipse, tum insignes eius virtutes,
 fortia facta, seuera disciplina conciliarunt, au-
 géntque quotidie. Itaque non tam imperio,
 quam

quàm auctoritate ipsa, nutùque regere cuncta videtur, & administrare & amicis quidem atque sociis animum addere, hostibus autè, atque inimicis adimere, & metum, atque terrorem iniicere.

Quoniam igitur, ô Gallia, & Deus, & natura, & patria tua, lex, ius diuinum, & humanum, talem tibi Regem dedit, quo (si tibi ex omnibus orbis Christiani partibus alium eligendi daretur optio, & facultas) meliorem, præstantiorem, tibi utiliore, ac salutariorem, hac denique Regia maiestate digniorem ne optare quidem posses: tuæ profectò erit pietatis, & Religionis, tuæ prudentiæ, tuæ charitatis, tui muneris, & officij, & Deo Regi Regum pro tanto hoc eius beneficio ingentes & assiduas agere & habere gratias. Et Regem hunc tuum, tanquam Dei donum, atque munus, Dei vicarium, Dei imaginem, Dei ministrum, tanquam patrem, pastoremque fidelissimum amplecti, colere, eius dictis, & edictis, & imperio, non tantum Regio, sed etiam paterno, libentissimè parère. Noli quæso, per Deum immortalem, hoc eius imperium iustum, legitimum, ac diuinum, duro ingratoque animo repudiare, & aspernari. Reputa etiam atque etiam animo tuo grauissimam illam S. Pauli admonitionem. *Omnis (inquit Apostolus Rom. 13.) anima potestatibus supereminentibus subdita esto. Non enim est potestas nisi à Deo, quæ verò sunt potestates, à Deo ordinatæ sunt. Itaque quisquis resistit potestati, Dei ordinationi resistit. Qui autem resistiterint, sibi ipsis iudicium accipient. Nam princi-*

pes non terrori sunt bene agentibus, sed malè. Vis autem non timere potestatem, quod bonum est facito, & feres laudem ab illa. Dei enim minister est tibi in bonum. Quod si feceris id quod malum est, time. Non enim frustra gladium gestat. Nam Dei minister est, ultor ad iram ei qui quod malum est fecerit. Quapropter oportet esse subditos non solum propter iram, verum etiam propter conscientiam. Propter hoc enim & vectigalia soluitis. Siquidem ministri Dei sunt, in hoc ipsum incumbentes. Reddite igitur omnibus, quod debetur: cui tributum tributum, cui vectigal vectigal, cui timorem timorem, cui honorem honorem. Petrus similiter. 1. Pet. 2. Esote subditi omni creatura seu ordinationi humana, propter Deum, siue Regi tanquam præcellenti, siue ducibus tanquam ab eo missis. Paulus, Tit. 2. Admonete illos principibus, & potestatibus subditos esse. Ergo vel sola ipsius Dei voluntas, cui refragari illo modo, ac reluctari graue est scelus, atrox facinus, summum periculum, te ad iustum hunc legitimumque tuum Regem sincere amandum, atque colendum, & ad ei parendum potius, quam resistendum incitare meritò, atque impellere debet. Cogita quàm durum sit, ac perniciosum, contra stimulum calcitrare, (vt communi fertur Prouerbio) hoc est, Deo ipsi repugnare, & aduersari velle. Atqui omnes illi, qui iustis legitimisque Regibus, principibus, ac magistratibus pertinaciter obstinateque sese opponunt, iisque resistunt, illi diuinæ reluctantur constitutioni, ac gigantum more, Deo ipsi, cuius infinita est potestas, horrenda ira, ac vindicta, bellum quasi indicunt,

dicunt, ac inferunt.

Quòd si autem iuxta Christi, Prophetarum, Apostolorum, martyrum, apostolicæ, & primitiue Ecclesiæ monita, præcepta, & exempla, dominis, Regibus, Imperatoribus, principibus, ac magistratibus, etiam Ethnicis, barbaris, à Christiana religione alienissimis, (qui virgæ sunt atq; flagella iræ diuinæ) propter Deum in omnibus iis, quæ diuinæ voluntati, nostræque conscientiæ non repugnant, obtemperare, iis omnia officia, & obsequia præstare, tributa, & vectigalia quantumuis grauiâ, pendere, pro illorum salute Deum assidue deprecari, iis bene velle, bene ominari, atque precari debemus: quantò magis te decet, ô Gallia, hunc tuum Regem tam pium, tam religiosum, tam prudentem, tam magnanimum, tam bellicosum, tam clementem, benignum, ac proinde Christianissimi titulo dignissimum, singulari amore complecti, omnem illi iustam debitamque reuerentiam, & obedientiam exhibere? Quòd si etiam externis, & peregrinis Regibus, qui iusta, legitimæque vocatione, electione, atque suffragiis regnum fuerint adepti, est parendum, vt Polonorum, & aliarum gentium exemplis comprobari posset: quantæ infamiæ, atque furoris fuerit, Regi huic tuo natiuo, genuino, ex tuis intestinis, atque visceribus procreato, parere nolle? Propone tibi ante oculos totam illam antiquissimam, amplissimam, nobilissimam, florentissimamq; familiam Borboniam, verè Regiâ, & nomine, & re ipsa, atque natura bonam, benignam, humanam, ad quam

diuino & naturali iure Regni huius hæreditas, atq; possessio pertinet, in quam grauissimè peccabis, ac proinde vindicem, & ultricem experieris acerrimam omnium iniuriarum, quibus hunc tuum Regem, illius nunc familiæ principem, atque caput, affeceris. Propone tibi omnes illius agnatos, cognatos, propinquos, consanguineos, affines, amicos probos, & fideles, maxime dignitatis, potestatisque viros, quos omnes irritabis, & ad grauissimam iustissimamq; ultionem prouocabis, ex amicissimis inimicissimos & infestissimos reddes, si hunc iustum legitimumque tuum Regem vel dictis, vel factis violare perrexeris. Quod si etiam vitiosissimis Regibus, omni ferè vitiorum genere oppletis, omni que virtute vacuis, est parendum: qua conscientia tu Regi huic tuo, vel ipso hostium consensu omni virtutum genere commendatissimo, & ornatissimo, iustam debitamque obedientiam detrectabis? Virtutis tanta vis est, ut illa non solum in peregrinis, verum etiam in inimicis nostris atque hostibus cognita, atque perspecta delectet, nosque ad illos amandos pelliciat, & inuitet: Te verò Regis tui naturalis virtutes tam præclaræ, & eximix, quæ etiam peregrinis, & externis, imò aduersariis sunt admirationi, ad illum tibi amicissimum, tui amantissimum, redamandum, eiq; obtemperandum, flectere & commouere non poterunt. Quod si Reges, Imperatores, populi externi, cuiuscumque illi sint religionis, hunc tuum Regem ob præclaras & eximias eius virtutes amant, admirantur, suspiciunt, & cum ei,
tum

tum tibi ipsi gratulantur: cōgita quāso quā ab omni non solum Christiana, sed humana quoque ratione, sensūque alienum sit futurum, si tu hoc diuinum in te beneficium non agnoscas, & aduersus hunc naturalem tuum Regem rebellis, & contumax, esse perrexeris. Ergo vel externorum Regum, principum, magistratuum, populorum (inter quos ego quoque imprimis numerari volo) erga hunc tuum Regem amor, beneuolentia, obseruantia, lætitia, gratulatio te multo magis eiusdem amore ac beneuolentia accendere, & inflammare debet.

Inter omnes virtutes, siue omnia ea, quæ Regni, ac Reipub. alicuius statum continent, atque conseruāt, nihil est firmitus, validius, & efficacius, quā eorum, qui potestati, & imperio alicuius sunt subiecti, iusta debitāque obedientia, quæ ex animo vero, fideli, & sincero proficiscatur. Theopompus Rex Lacedæmoniorū, dicenti cuidam, idcirco Spartam optimè ac diutissimè seruari, quod Reges bene imperare didicissent, scitè profectò dicitur respondisse, quin potius, quia ciues Regis edicto audientes essent. Ac omnino Regni, imperij, Reipub. familiæ, cuiusuis denique societatis, siue magnæ, siue mediæ, salus cum iusto, legitimo, ac sapiente imperio, tum iusta debitāque subditorum obedientia constat. Obedientia igitur (quam Cyprianus omnium disciplinarum matrem vocat) debetur cū Deo imprimis, tum Regibus, principibus, magistratibus, proceribus, præceptoribus, tutoribus, patronis, omnibus denique iis, qui vel per naturam,

vel per legem dominantur: Atqui hic tuus Rex est tuus imperator, tuus dominus, tuus magistratus, tuus pater, tuus tutor, tuus patronus, iustus, naturalis, atque legitimus. Quia igitur ratione iustam meritamque ei obediētiam sine multiplici culpa, atque scelere denegare posses? Persarum imperium (vt taceam de aliis) idcirco tam diu floruisse existimatur, quod Reges suos maximo in pretio, & honore habuerunt, in quo tamen modū excefferunt, cum diuinos illis honores tribuerunt. Quod si igitur Ethnici vera Religione vacui, tamen vel naturæ instinctu, & impulsu Reges suos etiam vitiosos sibi amandos, & colendos esse duxerunt, nec sine nephario scelere violari posse, atque lēdi existimarunt (vt plurimis exemplis probari posset) quantò magis hæc Christianorum debet esse mens, atque sententia, quantò magis illi omnem honorem, amorem, obseruantiam, & obediētiam Regibus suis deferre debent, quibus Deus ipse Reges, principes, ac magistratus, tanquam suos vicarios, tanquam deos quosdam, vt in sacris literis appellatur, nō natura, sed munere & officio diligentissimè verbo suo sacrosancto commendauit.

Obediendo igitur huic tuo Regi, Deo ipsi obedies, qui hunc tibi Regem non in ira & furore suo, sed pro gratia, & amore suo immenso tibi dedit. Contrā autem inobediētia tua Deum ipsum (vt nihil dicam de Rege) ad iram, & furorem grauissimum prouocabis, grauissimam eius in te iram, & offensionem concitabis, in horrendas Dei manus incurres. Obediētiam Regibus, principibus,

principibus, magistratibus legitimis debitam qui negligunt, atque violant, illi Deo ipsi sunt inobedientes, ac proinde in grauissimum, teter-
 rimum, & inexpiabile perduellionis, læsæ maie-
 statis non tantum humane, sed etiam diuinę cri-
 men incurrunt, illi ordinem à Deo constitutum
 conuellunt, labefactant, illi omnis ordinis, iuris
 diuini, & humani sunt violatores, omnis socie-
 tatis humanæ perturbatores, sunt censendi. Æ-
 gyptij sacerdotes populum Regi suo obsequen-
 tissimum significare volentes, apem formabant
 breuem, variam, in rotunditatem compactilem.
 Mira enim est apum erga Regem suum bene-
 uolentia, & obedientia, de quo sic eleganter &
 melle dulcior est Plinij oratio, lib. II. 417. Mira
 plebis circa eum obedientia: quum procedit, v-
 nà est: totum examen circa eum conglobatur,
 cingit, protegit, cerni non patitur. Reliquo tem-
 pore cum populus in labore est, ipse opera intus
 circuit similis exhortanti, solus immunis. Circa
 eum satellites quidam, lictorésque, assidua custo-
 dientes auctoritate. Procedit foras non nisi mi-
 graturo examine. Si quis alam ei detruncet, non
 fugiet examen. Cum processere, se quæque pro-
 ximam illi cupit esse, & in officio conspici gau-
 det. Fessum humeris subleuant, validius fatiga-
 tum ex toto portant. Si quâ lassatus deficit, aut
 fortè aberrauit, & ore prosequuntur vbicumq;
 ille confedit, ibi cunctarū castra sunt, &c. Quan-
 tō igitur magis decet hominem ratione prædi-
 tum suis dominis, sese obedientem & obsequen-
 tem summa cum fide, atque beneuolentia exhi-

bere, ac proinde non homines, sed brutis animalibus deteriores illi iure sunt existimandi, qui id facere recusant.

Cogitabis præterea hanc obedientissimam, præstantissimam, & Christianissimam virtutem à multis sæculis ad hunc usque diem quasi propriam fuisse Gallici generis, atque seminis. Hac inquam virtute atque laude gens Gallica multarum gentium, atque Regnorum victrix, omnibus fere reliquis gentibus, atque populis terrarum, longè antecelluit, palmamque hac in parte possedit, qua de causa non mirum est iuxta illam paulò ante commemoratam Theopompi Regis Spartani sententiam, Regnum hoc tuum tam diu durasse, & in statu felici, & florenti permanfisse. Hac ipsa virtute, hoc est, obsequium & obedientiam Regibus suis naturalibus præstando maiores tui multos potentissimos Reges, bellicosissimas gentes deuicerunt, in Regni huius ditionem subegerunt. Hanc igitur virtutis, atque gloriæ hæreditatem, ac patrimonium à maioribus tuis acceptum, tibi relictum, te retinere, & conseruare, minimæque inobedientiæ alicuius, vel minima specie polluere, ac contaminare decet.

Contumacia omnis, vt ait Arrianus Iurifconsultus aduersus ducem, vel præsidem militis, capite punienda est: quantò magis igitur contumacia aduersus Regem, Regem præsertim iustum, & legitimum? Consensus præterea virtus atque voluntas consentiens tota Christianorum Regni tui procerum atque optimatum (qui & ipse

ipse testis est diuinæ voluntatis) tibi auctor, impulsor, & suasor ad hunc iustum, legitimum tuum Regem ambabus, quod dicitur, vlnis amplectendum, atque colendum esse debet. Hæc ergo sunt grauissima, firmissima, maximique momenti, meo iudicio argumenta, ex diuino & humano iure ducta, quæ te, mea Gallia, meritò ad hunc tuum Regem amandum, colendumque incitare, atque flectere debent: Deus ipse fundator, & auctor est omnis Regiæ, & imperatoriæ dignitatis, ac potestatis, ille vult, nobis præcipit, ac mandat, vt omni iustæ, legitimæque potestati, ac imperio pareamus. Omnis igitur, qui Regiæ maiestati resistit, & repugnat, is diuinæ maiestati, auctoritati, ac voluntati reluctatur. Non igitur solum Regem, illius familiam, propinquos, amicos, consiliarios, subditos, fideles, quorum maxima est copia, incredibilis dignitas, summa potestas, sed ipsum Deum pertinaci hac tuâ rebellionem, ac contumacia ad iram, & furorem implacabilem prouocabis, qui tibi placandus potius est pœnitentia, quàm pertinacia ista, atque contumacia magis irritandus. Graue est, vt illis Ciceronis verbis vtar, habere eundem iratum simul, & armatum, quanto igitur tibi grauius, & horribilius erit habere ipsum iratum simul, & armatum immensis opibus, atque viribus.

Si times, & exhorrescis Pontif. Rom. iras, excommunicationes, proscriptiones, anathematismum fulmina, quæ sæpe antiqui tui Reges tantùm iniqua, iniusta, ac violenta contempserunt, nec illis se terreri, & ab officio suo auocari,

passi sunt, quantò maiori tibi terrori, & horro-
ris debet Dei supremi illius nostri Iudicis ira,
ultio, & maledictiones, qui omnes eos qui iustis,
legitimisque suis Regibus, & magistratibus, ius-
tam debitamque obedientiam præstare recu-
sant, non solum humanæ, sed etiam æternæ vitæ
communione priuat. Si Papæ, & Pontif. Rom.
auctoritas plurimum apud te valet, plus apud
te Dei valere debet potestas, & imperium, à
quo nulla est prouocatio, nullum patet effu-
gium. Dei igitur & voluntas, & benignitas: &
potestas, & iustitia, & ultio te ad hunc tuum Re-
gem amplectendum & omni officiorum genere
prosequendum incitare debet. Noli ergo Deo,
Religioni, conscientiæ tuæ reluctari, quæ qui-
dem lucta tibi grauissimum tandem luctum est
paritura. Noli Dei clementissimi tui patris be-
nignitatem, te ad pœnitentiam & obedientiam
iustam inuitantis contēnere, ne tandem horren-
dam eius iustitiam, ac seueritatem sentire, & ex-
periri cogaris.

Redite igitur tandem cum illo in gratiam,
qui vobiscum in gratiam redire cupit, qui non
vestrum exitium, sed salutem potius ardentissi-
mè expetit, vos non perditos, sed conseruatos
cupit. Ne igitur quæso immortale, & inextinguibile
cum illo bellum geratis, qui vobis amicis po-
tius, quàm inimicis vti magnopere cupit. Ne
pergatis bellum aduersus illum obstinatè geren-
do, in Deum, & in patriam peccare. Quousque
tandem, ò Gallia, gladios vestros mutuo sangui-
ne imbuere, in vos ipsos vestraque viscera fi-
gere,

gere, bellum ac simul pestem, perniciem, vastitatem vobis inuicem inferre perseverabitis: quis tandem erit finis istorum vestrorum bellorum, seditionum, cædium, & laniendarum, quem ad finem sese iactabit effrenata ista vestra & quasi insatiabilis audacia, atque sæuitia? Quàm est indignum, ab omni ratione Religionéque alienum, vos vim scædam, & immanem, quam communi opera atque studio à vestris ceruicibus, & capitibus, vestris visceribus vos auertere, ac depellere oportebat, nunc vobis ipsis inferre? Refugit animus, atque exhorret commemorare immanitatem, quam in vos ipsos exercuistis, quam nulla barbaria possit agnoscere. Recordamini liberorum, & coniugum vestrarum turpissimas violationes, ædium, tectorum, oppidorum destructiones, atque ruinas, agrorum vastitates, innumerabilium cuiusvis sexus, ætatis, conditionis, & ordinis hominum horrendas cedes, atque laniernas, miserabiles fugas, tristissima exilia, infamiam, egestatem, & alias calamitates, quæ bella præsertim ciuilia comitari ac consequi consueuerunt.

Redite tandem in gratiam cum Deo, cum vestro Rege, vobiscum inuicem. Et quidem si cum Deo in gratiam redire, Si Deum vobis reconciliari, atque placari, si illo posthac propitio potius, & placato, quàm irato, & aduerso vti cupitis, necesse profectò erit vos prius & cum Rege vestro, & vobiscum inuicem in gratiam redire, obliuisci iniuriarum, deponere & abiicere multorum odia, inimicitias, studere paci, & concordie.

Imitamini cum Dei immensam & infinitam, tum huius Regis vestri singularem clementiam, mansuetudinem, placabilitatem. Nolite cum sitis mortales, immortales & perpetuas inimicitias gerere. Deponite arma, seu armatos, hoc est iratos vestros animos, & inducite arma spiritualia, quæ sunt clementia, lenitas, mansuetudo, patientia, charitas. Tandem aliquando de tetro hoc tuo incendio belli intestini potius extinguendo, quam fouendo cogita, ne quæso ad illud fouendum, faces, & oleum, hoc est, arma, pecunias, opes incendiariis subministrare pergas. Noli religionis nomine, & obtentu inimicitias tam graues, & atroces amplius gerere, ne pergas religionis velo, & integumento, tetra & impia ista tua odia, inimicitias, & crudelitatem mutuam palliare. Religio enim Christiana, & Christus eius auctor, caput, doctor, & magister perfectus, nos odia, & inimicitias deponere, voluntaria perpetuamque *amorem* id est, obliuione cõterere, etiam cum inimicissimis in gratiam redire, iisque nos recõciliari iubet. Religionem contra Christianam non colimus, sed impiè, nefarièque violamus, quando in mutuis odiis, & inimicitias perseueramus, ac multam vindictam, & ultionis cupiditate immani flagramus. Nequaquam gratæ, sed potius inuisæ, & execrabiles erunt omnes vestræ preces, supplicationes, cæremoniarum, religio, quandiu diras tetræque istas inimicitias inter vos pergetis gerere. Si religionis tanto studio flagras, paci fac studeas, quæ quidem religionis est propria, eius est mater, nutrix, & conseruatrix

seruatric, vel Deum potius supremum pacis, bellique arbitrum precare, ut pro tristi, ac diuturno isto bello pacem tibi largiatur, quò ipsius Dei afflatu in vnam tandem fidem, atque religionem veram, & orthodoxam, coalescas. Pax enim vera est mater, atque nutrix fidei, & religionis: bellum contra eiusdem pestis est, atque pernicies. Ne amplius religionis, & iustitiæ obtentu, atque prætextu glaucomā oculis tuis obici, mentis tuæ oculos tibi perstringi, atque ita diutius bello isto religionem, iustitiam, iudicia, patriam, & Ecclesiam perturbari, & exterarum quoque gentium ludibrio, rapinis, direptionibus, contumeliis, iniuriisque exponi patiaris. Bello pacem: hoc est, salutem exitio, longè anteponas. Bellum indicas odio, inuidiæ, inimicitiiis, avaritiæ, ambitioni, & aliis prauis affectibus, unde tetra ista bella (quæ sunt quasi pestifera quædam multorum capitum bellua) existunt, & exoriuntur. Noli diutius bellum gerere contra patriam, contra tuam salutem, sed potius contra prauos tuos affectus, libidines, cupiditates, contra avaritiam, ambitionem, odium, spem fallacem, vanos & inanes metus. Hoc enim bellum est bellissimum, ac saluberrimum, Christianoq; homine dignissimum. Cordi tibi sit, ut etiam est Regi tuo, concordia, qua, ut verissimè ille dixit, & experientia ipsa testatur, paræ res crescunt, discordia autem maximæ dilabuntur. Auctore igitur, ac principe hoc tuo Rege, fac ad pacis, concordiæ, libertatisque spem exardescas, qui quidem data fide, & iureiurando interposito tibi a-

nimi, & conscientię libertatem est pollicitus.

Nolite vos, Ecclesiastici ordinis homines, atque clerici, in veritatis, humilitatis, & charitatis Christianę cathedra, bella, arma, sanguinem, cędes, rebelliones, Regis & principū cōtemptum, atque odium spirare, sed populum potius ad pacem, & concordiam, ad iusti legitimęque tui Regis reuerentiam, & obedientiam excitate, estote pacis, concordię, atque charitatis, non discordię, dissensionum, atque turbarum tubę, atque bucina, si patrię vobis salus curę est atque cordi, vt esse debet. ~~Nolite belli discordiarum~~, rebellionis, inobediencię, sed pacis (qua Deo nihil gratius, & acceptius, hominibus nihil iucundius, & salutaris) patientię, mansuetudinis, esse pręcones, auctores, & impulsores, & cum ipso vitę vestrę exemplo, quo nihil ad homines mouendum est efficacius, tum cōcionum vestrarum facibus, omnes virtutum illarum studio inflamate.

Dulce enim etiam nomen est pacis, res verò ipsa cum iucunda, tum salutaris. Nam nec priuatos focos, nec publicas leges, nec libertatis iura chara habere potest, quem discordia, quem cędes ciuium, quem ciuile bellum delectat, eumque ex numero hominum eiiciendum, ex finibus humanę naturę exterminandum puto: non is homo, sed monstrum, bellua fera, & immanis est. Tandem igitur aliquando depositis abiectisque armis, paci studeas, cuius vides Regem hunc tuū esse studiosissimum. Semper enim Rex tuus pacis laudator, auctor, suafor, & alumnus fuit. Quo-

so igitur tandem aliquando tot tantisque edocta malis sapere, siue resipiscere discas, & arma ista, animatosque simul istos tuos animos, atque spiritus depone, & abiice, colla verò naturali huic tuo Regi subde, nec aduersus stimulum calcitrare pergas. Moneat atque moueat te præteritorum malorum recordatio ad pœnitentiam, qua Deus placatur. Nunquam sera nimis est pœnitentia, dum modo sit seria & vera.

Quoniam autem belli istius tui ciuilis & intestini causa præcipua à nonnullis esse existimatur religionum diuersitas, omnino in tua patria: vt etiam apud nos, atque adeò in toto orbe christiano, quinq; reperio esse hominũ genera. Vnũ est eorum, quorum religio est nulla religio, ij sunt homines athei, epicurei, libertini, qui in omni scelerũ, & flagitiorum cœno volutatur, qui nullis legibus se astringi patiuntur, quæ hominũ natio vtinã hodie per totum orbẽ Christianum nõ tã diffusa esset. Horũ verò effrænata, & indomita peccandi licentia, atq; libido, legũ vinculis, & pœnarũ seueritate, cõstringi, ac reprimi debet.

Secundum genus est hypocritarum, qui Religionis, æquitatis, pacis, & charitatis erga Deũ, patriam, & Ecclesiã simulatione, non Religionem, non Dei gloriam, non Ecclesiæ, ac patriæ salutem, sed sua priuata commoda, & emolumenta, honorum, dignitatum, ac fortunarum amplificationem querunt, & idcirco bellum hoc non extinguĩ, sed foueri, ac continuari cupiunt, quo facilius communi & publico incendio ad id quo aspirant, peruenire, optatum & speratum

finem consequi possint, quum tamen illi spe sua magis magisque iusto Dei iudicio frustrentur.

Tertium genus est eorum, qui alterutri Religioni verè & ex animo addicti, vnã tamẽ, non autem duas, ac diuersas Religiones, in patria sua ferendas, ac tolerandas esse, ac proinde alteram, quam illi falsam esse arbitrantur, omni ratione, siue vi, & apertè, siue clàm, & per insidias, euellendam, excindendam, & exterminandam esse existimant: Hi magno videntur duci Zelo, sed Zelus est inconsideratus, Zelus est sine scientia, qui nisi spiritu Dei temperetur, facillè in scelus tandem desinit, ac degenerat. Dubium itaque mihi non est, quin plurimi ex tuis ciuibus, hoc impulsu Zelo, arma cœperint, & hodie quoque illa paci anteponenda esse existiment, non belli, ac dissidiorum intestinorum, sed Religionis suæ, quam colunt, ac profitentur, quàmque veram esse sibi persuadent, tuendæ, ac propugnandæ, & contrariæ excindendæ penitus, & exterminandæ studio ducti.

Quartum genus est eorum, qui ex duabus religionibus vnã tertiam quandam posse conflari libenter velint: perinde ac si de rebus terrenis ciuilibus & politicis ageretur, in quibus sæpe multa componuntur eiusmodi ratione, & vt Iurisconsulti loquuntur, Rusticorum iudicio. Atque isti Moderatores dum vtrisque volunt gratificari, vtrosque offendunt. Nec enim res diuinæ possunt mutari hominum iudicio & institutis.

Quintum his addere possumus genus eorum, qui dolent quidem nō vnã tantum, & quidem
veram

veram, puram, & orthodoxam Religionem in patria sua vigere, id quod summopere expetunt, & à Deo assidue, & ardentè votis contendunt, dolentque summopere contrariam ibi locum habere: sed qua sunt prudentia, atque modestia, vident id fieri non posse, ac proinde vtramque religionem patienter ferendam, nec alterutrius Religionis vel tuendæ, vel tollendæ, & excindendæ causa bellum suscipiendum, sed alia iusta, atque legitima media, atque remedia adhibenda esse existimant, quæ pietati, Religioni, charitati Christianæ, veteris & primitivæ Ecclesiæ mori, ac consuetudini, magis sunt accommodata. Et in hac quidem sententia est tuus Rex, sunt innumerabiles alij sapientes, & cordati viri.

Duæ igitur sunt meo iudicio opinioniones, quæ Regnum tuum iam diu valde perturbant, & adhuc vehementer perturbant, quæ tamen ferè sunt coniunctæ, ita ut vna ex altera dependeat. Altera est quod nonnulli opinantur, sibi que penitus persuadent, nullum Regnum, nullam rempub. nullam ciuitatem, nullam familiam, nullam denique siue parvam siue magnam hominum societatem, stare, saluam incolumemque permanere posse, vbi duæ, & quidem diuersæ, ac contrariæ Religiones locum habent, ac proinde duas diuersas Religiones in vna Repub. nūquam vllò pacto ferèdas, ac tolerandas, sed alterutram quouis modo tollendam, & exterminandam esse. Nam vbi sit Religionis diuersitas, ibi necessariò consequi animorum distractiones, discor-

dias, bella, & hinc exitium, atq; interitum. Hinc semper illud in ore habent, decantant, & crebris vsurpant sermonibus: Vnus Rex, vna lex, vna religio. Altera est quòd Religionis veræ quidem tuendæ, conseruandæ, ac amplificandæ, falsæ autem extirpandæ rationem in armis, in bello, in tormentorum, suppliciorumque acerbitate, & immanitate positam esse existimant. Atque hæc quidem sunt, si verum vis fateri, duæ præcipuæ causæ, propter quas plurimi ex tuis ciuibus, zelo quodam præcipiti, & inconsiderato, quibusuis fetis immanissimis ferociùs in se ipsos sæuiunt, atque omnia crudelitatis, & immanitatis genera depromunt. Quantum igitur ad priorem opinionem attinet, fateor equidem optandum esse, & id quidem omnibus Regibus, Principibus, magistratibus, cuiusvis societatis rectoribus enitendum omni studio, atque elaborandum, vt vna tantum, & ea quidem vera, pura, & orthodoxa Religio, in suo Regno, iurisdictione, & ciuitate colatur, & exerceatur, si quidem id sine manifesto maximorum incommodorum, siue ruinæ, & exitij fieri poterit. Nunc verò, vt verissimè, sapientissimèque poëta ille cecinit, *Curando fieri quædam maiora videmus, Vulnera, quæ melius non tetigisse fuit.* Quando igitur Regnum vel Respub. quæuis in eum locum est adducta, vt licet diuersæ, & contrariæ in illa Religiones vigeant, & ita inualuerint, tamque altas radices egerint, vt sine horrenda vastitate, exitio, atque ruina alterutra euelli non possit, tunc Christiana modestia, atque patientia, vtrique Religio tolerari

rari debet, ac potest: nec idcirco metuenda est illius Regni, Imperij, & Reipub. ruina & exitium. Sciendum itaque est, quemadmodum vnius & eiusdem Religionis, siue veræ, siue falsæ exercitium, in vno Regno, Repub. & ciuitate non prohibet, quò minus in illa societate, contentiones, ruinæ, tumultus, & bella cruenta, exoriantur: ita contrà in vno aliquo Regno, siue Repub. & ciuitate, pax, & concordia, coli potest, etiamsi in illa Religionis exerceantur. Itaque quemadmodum vnius Religionis exercitium per se non est concordie causa: ita Religionis diuersitas, siue diuersarum Religionum exercitium, non discordiarum, bellorum, & exitij causa existimandam videtur, vt vel ipsa quotidiana, vel omnium ætatum, atque temporum experientia testatur. Exempli gratia, in antiquissimis illis totius mundi imperiis, ac monarchiis, Assyriaca, Persica, Macedonica, Romana, nonne constat vnâ quidem Religionem, idololatricam, & Ethnicam, vt vulgò appellamus, cultam fuisse, & tamen in illis nihilominus eidem idolol. addictis, dissidia, atque bella intestina exorta sunt, quibus tandem potentissima, ac florentissima imperia funditus cõuulsa, ac labefactata sunt. Sed vt omittam prisca illa sæcula, An non constat aliquot sæculis in orbe populòque Christianò, licet vna Religio dominata sit, tamen multos atroces, horribiles, cruentos motus, tumultus, bella semper exarsisse, quibus multa hominum millia immanissimis cædibus absorpta, multæ vrbes, atque Regiones horrendum in modum deuastatæ, & euerstæ

fuerunt. Repete animo, atque reuolue vestras historias, & annales, & in iis reperies inter Christianos in Christiana Repub. vnus licet Religionis cultrice, tamen horrenda bella atque etiam intestina extitisse. Hæc diligenter velim expendi ab iis, qui bellorum istorum ciuiliū in orbe Christiano culpam omnem nouæ, vt vocant, Religioni ascribūt, cū certo certius constet, etiam ante hæc nostra tempora, quādo Romana Religio vulgò & passim obtinere videbatur, tamen semper Christianum orbem mutuo Christianorum sanguine atque cædibus maduisse. An non in ipsa Gallia, vt ab illa vniuersitate totius orbis Christiani discedam, in ipsa Regione tua, multa ciuilia & quidē horrenda, & cruenta bella excitata sunt, quando vni tantum Religioni Rom. in illa locus fuit? Id historiæ tuæ, & annales clarissimè testantur, plurima inde luculenta exempla depromi possent. Quid? hoc ipso tempore an non vides ciues tuos, qui Romanam Religionem profitentur, tamen grauissimis à se inuicem odiis, & inimicitiiis dissidere, sibi que inuicem pestem, & exitium machinari? Nonne Guyssius Relig. Rom. additissimus: in Héricum 111. Galliæ Regem Rom. rel. additissimum conitruuit? Ex his igitur liquido constat, vnus & eiusdem Religionis exercitium, in vna aliqua Repub. vel ciuitate, non prohibere, quò minus in illa dissensiones, motus, & bella existant, & inde cædes funestæ consequantur: ac proinde, id quod est consequens, vnus & eiusdem Religionis exercitium, non esse per se, præcisè & absolute causam

tè causam pacis, atque cōcordiæ. Et vt religionis vnus exercitiū non semper causa est pacis, atq; cōcordiæ, nec semper prohibet discordiam, atq; bella: sic contrā, religionis diuersitas, & diuersarum religionum exercitium, (nam contrariorum contraria sunt consequentia) non per se, & absolute discordiarum, atque bellorum, causa iudicari debet. Nam vt omissis antiquis exemplis, ad noua, & recentia veniam, an nō luce meridiana clarius est, multa in orbe Christiano regna, imperia, ciuitates, populos, pace, concordia, opibus florere, licet diuersę in illis Religiones tollerentur, & exerceantur?

Quòd si nonnunquam motus, seditiones, bella intestina, in illis exarserint, id factum nō tam propter religionum diuersitatem, quàm propter hominum auaritiam, ambitionem, inuidiam, æmulationes, & alios prauos affectus, quos religionis velo inuoluere, & integumento palliare fuerunt conati. Vt vnum ex innumeris exemplum proferam, Ephesinę illius seditionis, atque tumultus, de quo in actis Apostol. legimus, quānam quāso alia causa fuit, quàm aurificum illorum & artificum, & fabrorum auaritia, qui cū religionis Christianę incremēto animaduertent plurimum de lucro, & quāstu suo detrahi, idcirco tumultum illum, religionis obtentu, atque prætextu excitarunt. Et hæc quoque hodie est præcipua causa bellorum ciuiliū, atque tumultuū, in orbe Christiano, nempe inexplibilis cū diuitiarum, opum, tum honorum, dignitatis, & imperiorum cupiditas, quæ nimirum

religionis velo obtegitur, & oc cultatur. Polonici illius tumultus, atque belli causa, non est religionis diuersitas, sed ambitio, qua fit, vt illi ipsi, qui vnam & eandem religionem profitentur, de regno illo acerrimè, ad magnam vsq; sanguinis effusionem, adhuc inter sese dimicarint. Quod igitur regnum illud iam aliquādiu perturbatum fuit, non religionis, sed sententiarum, ac suffragiorum de Rege, atque regno, diuersitati esse ascribendum, & acceptum referendum omnes intelligunt. Non dissensiones de religione, sed de regno, istos motus pepererūt, quibus respub. illa aliquandiu concussa, & conuassata fuit.

Testis eiusdem rei est tota Germania, in qua iam per multos annos pax fuit, & tranquillitas, inter multas de religione dissensiones: in qua similiter multis in locis vtriusque religionis cultores non desinunt mutuam inter se agitare pacem, atque concordiam, nec illam propter hanc religionum diuersitatem abrumpunt.

Rhætia, socia, & fœderata nostra, licet ipsa quoque in diuersas duas religiones sit distracta, & licet vtraque religio ibi locū habeat, & exerceatur, & quidem Romanæ religionis cultores reliquis numero, longè sint inferiores, tamē tota illa gens licet bellicosissima pacata est, & tranquilla, tamque alta pace, & tranquillitate fruitur, vt neutra pars alteri quicquam, vel minimum faciscat negotij, atque molestiæ, quin mutuam inter se pacem, & concordiam constantissimè colunt, licet quidam illam turbare fuerint conati, illam ad nouum fœdus sollicitando, à quo pro
con-

constanti sua erga te fide tota abhorret.

Ego denique, ego, inquam, ipsa cuius tibi sum testis, quæ licet vtriusque religionis exercitium apud me vigeat, & illi qui Reformatæ religioni sunt addicti, Romanæ religionis cultores, numero, opibus, agris, & possessionibus longè vincant, & superent, tamen iam per 60. ferè annos & amplius, pacem, & tranquillitatem colo, eaq; fruor, cum tamen, si annales nostræ evolvantur, numquam legamus, patriam nostram diutius viginti annos antea vel externo vel intestino bello caruisse, etsi tum vna tantum religio Rom. coleretur.

Quid dicam de te, de tua patria, an non aliquot in illa sunt vrbes, quæ licet vtramque religionem profiteantur, atque colât, tamen nihilominus mutua pace, atque concordia sunt coniunctæ?

Ex his igitur patet, illos non esse audiendos qui existimant Rom. religionem cum Reformatâ stare non posse in aliquo regno vel Repub, quin ipsius Regni vel Reipublicæ subversio & exitium consequatur.

Quod si Papa ipse, diuersissimas in sua ditione religiones tolerat, & illas impunè, liberèque exerceri patitur: si in tota Italia diuersissimæ religiones, sine pacis perturbatione coluntur, ut est Catholica Romana, atq; Iudaica, inter quas tantum est discrimen, quantum inter cælum & terram: cur tu non feres duas religiones Christianas, inter quas non tanta est, quanta inter illas, discrepantia? Quod iis imprimis propositum

velim qui apud te Rom. Pontificem sequuntur. Non igitur, vt ex his patet, ipsa per se religionis diuersitas, turbarum, seditionum, tumultuum, & bellorum causa est, sed turbulentorum, ac violentorum quorundam hominum audacia, & improbitas, qui alios vi & armis à religionis suæ confessione, atque cultu arcere, atque depellere, & ad suam religionem traducere conantur. Hinc istæ lachrymæ, istæ turbæ, seditiones, tumultus, atque bella, quæ à turbulentis hominibus, religionis specie, atque nomine, excitantur.

Cogitabis igitur, eum in locum regni tui res, statumque tuum esse adductum, ita patriæ tuæ rationes ferre vt siquis velit alterâ ex duabus religionibus vi & armis tollere: ille quoque velit præsens tui Regni exitium.

Nolim tamen tuum Regnum esse cloacam omnium errorum, ita vt impunè liceat phanaticis omnibus hæreticis blasphemis commorari, quin potius te hortor, soror charissima, vt eiusmodi monstros Regni tui fores occlusæ sint. Et si qui fortè inueniantur Athei, Epicurei, Anabaptistæ, Antitrinitarij, Arriani, Libertini, & eiusmodi homines, in eos grauissimè animaduertat tuus Rex Christianissimus: neque tetrum illud virus serpere vllò modo patiatur.

Hæc præterea religionum diuersitas non obstat, quò minùs Regibus, & principibus iusta debitaque obedientia præstetur, vt multorum non solum Christianorum, sed etiam barbarorum populorum exemplis confirmari posset.

Venio ad illos qui vi, armis & tormentis alterutram

terutram religionem, è Regno tuo tollendam, & homines ad hanc vel illam religionem, quam veram esse arbitrantur, profitendam, eodẽ modo cogendos esse existimant. Hanc verò opinionem cum ipsa ratio, tum experientia (quam recte stultorum magistram appellant) refellit, atq; refutat.

Et quia neminem adhuc audiui qui diceret in tua Gallia, eos qui profitentur rel. Romanam esse vi & tormentis cogendos ad relig. Reformatam profitendam, quum potius dicant ex verbo Dei docendos esse: eos hic tantum compellabo qui rel. Romanam profitentes existimant relig. Reformatam vi & armis exscindendam.

Cogita igitur postquam ante ducentos fere annos in concilio Constantiensi Ioannes Hufs, atque Hieronymus Pragensis, contra fidem publicam, fuerunt immanissimè combusti, quam horrendum inde & cruentum fuerit bellum inter Christianos per Bohemiam cõsecutum, quo multa quidem hominum millia vtrinq; fuerunt extincta, sed Religio, quam martyres illi docuerunt, tolli idcirco non potuit, & nunc quoque viget.

Deinde postquam Reformatæ hæc, quæ plebisque inuisa est, quod eam existiment nouam & hereticam his postremis temporibus ante annos fere 60. aut 70. in Germania primùm, mox etiam in Heluetia, & in reliquis totius orbis Christiani partibus, paulatim longè latèque doceri cœpit, & idcirco in tua quoq; patria pedem posuit, sedem ac domicilium fixit, quanto per Deum

immortalem, labore, studio, opera, ardore illius initiis potentissimi Christiani orbis Reges, Imperatores, atque Principes, Pontif. Roman. auctoritate, atque hortatu assiduo obstiterunt? quos non conatus, vires, supplicia, tormēta, atq; cruciatus ad illam excindendam adhibuerunt? **Ac** primū quidem, vt inde exordiar, fortissimus, potentissimus, vt norunt omnes, rerūque gestarum gloria florentissimus Imperator Carolus v. cum in Germania primū, & in illius imperio Reformatæ huius Religionis semina spargi cœpissent, incredibile dictū est quanta ille contentione, quantis opibus (quibus valuit plurimum) ei sese ab initio opposuerit, ei repugnarit, illam statim in ipsa herba, vt ita loquar, crescentem, ac pullulantem excindere penitus, atque delere conatus fuerit, Germanorum, Hispanorum, Italarum, & aliarum gentium, atque principum potentissima, fortissimāque vsus opera, copiis, atque machinis. Et quidem Imperator ille bellum istud aduersus ciuitates, atque principes illos, qui reformatam religionem amplexi fuerant, ac profitebantur (qui vulgo Protestantes appellantur) non modō fortiter, strenuē, sed etiam fœliciter gessit, prœliis multis vsus est secundis, multis potitus est victoriis, ciuitates (excepta vnica Magdeburgensi) ac principes illos omnes vicit, ac in suam manū, potestatemq; redegit. Sed quid? victor licet, domitor, ac triumphator illarum ciuitatum, atque principum fuerit, tamen religionem ipsam expugnare, atque opprimere non potuit, sed potius tandem, pace constituta,

constituta, vtriusque religionis tam Reformatæ, quàm Romanæ, liberè, & impunè colendæ, potestatem omnibus imperio subiectis facere est coactus. Imò palmæ instar, quò magis pressa fuit, tantò magis victrix exultauit.

Post pacem verò illam factam, & pacis edicta, & constitutiones, quas inuiolatas conseruari curauit (cuius non minima causa Rex tuus Henricus I. fuisse creditur) Germania ad hunc vsque diem in illa religionum diuersitate, pace & tranquillitate vtitur, & secura vicinorum suorum calamitates, atque ruinam spectat. Ipsa ergo Germania, vicina nostra satis superque te docere potest, religionem hanc reformatam vi, ferroq; excindi non posse, deinde etiam in duarum istarum Religionum diuersitate tamen pacem & tranquillitatem posse consistere.

Atque, vt alio exemplo vtar, Philippus Hispaniarum Rex potentissimus, filius Caroli v. iam per multos annos, partim diris suppliciis, atque tormentis, partim militaribus copiis, atque bello, eandem Religionem ex Belgio, seu inferiore Germania excindere, atque exterminare sedulò studuit, regioni pulcherrimæ, & amœnissimæ, ciuitatib. atque populis illis olim florentissimis, horrendam vastitatem intulit, maximam hominum multitudinem è medio sustulit. Sed hunc quoque illius conatum, vanum, irritum, & inane esse res ipsa, & experientia quotidiana loquitur. Nam plurimis licet hominum millibus ex vtraque parte sublati, & extincti, regione tota deuastata, ipsa tamen religio adhuc in illa

permanet, & maiora in dies incrementa, virésq; sumit. Cogitatu, nedum dictu est horrendum, quantæ cædes, atque strages in regione illa editæ fuerint. Nihil dicam de ipsa Hispania, in qua licet tanta adhibeatur sæuitia aduersus illos (de quibus vel minima, ac tenuissima est religionis istius suspicio) quanta maior ne excogitari quidem potest, tamen illa opprimi omninò non potest, imò augetur magis, & amplificatur, & multi constàtia, ac fortitudine singulari eorum, qui diris & exquisitis tormentis, atque suppliciis è medio tolluntur, & illam ad extremum vsque spiritum confitentur, victi, eandem religionem amplectuntur.

Quid dicam de Maria Regina Angliæ, quam Rex Philippus in matrimonio habuit, an non illa quoque omnes regni, opúmque suarum neruos intendit, ad eandem hanc religionem ex regni sui finibus exterminandam, an non innumerablem hominum multitudinem, qui huic religioni dediti, & addicti fuerant, ferro, atque flamma è medio sustulit? Sed quid effecit? Nisi quòd illa defuncta, & extincta, & quæ ei successit, sorore eius Elisibetha Sereniss. foeliciter. regnante iam per 30. & amplius annos, illa ipsa religio, in regione regnòque illo, regnat adhuc, atque dominatur? Quàm multæ ipsi huic Regine. structæ sint insidiæ quis ignorat, ex quibus tamen omnibus Deus illam mirificè eripuit.

Idem de regno Scotiæ, & eius Regina Maria, quæ Francisco 1. Regi tuo matrimonio priori iuncta fuit: affirmari potest. Illa enim omnem
adhibuit

adhibuit vim & diligētiam, ad eandem religionem ferro, flammâque expugnandam: & tamen ipsa primum quidem annos decem & nouem, in carcere, & captiuitate detēta, deinde anno 1587. capitis supplicio affecta est. Illa autem ipsa religio in regno illo adhuc viget: quam etiam filius eius Iacobus v. i. Serenissimus qui nunc regno illi imperat constanter colit, tuetur, atque defendit.

Possē multa tibi aliorum quoque Principū, Regum. Magistratū, ciuitatum exempla in hac eandem sententiam proferre, quorum omnium vi, ferro, atque flamma hanc religionem extirpandi conatus ad nihilum reciderūt: sed eorum potissimum tibi exempla proponere volui, quorum maxima fuit in orbe Christiano potentia, quique in religione hac exterminanda præcipuē desudarunt, & omnes facultates, virēque ad religionis istius euersionem contulerunt.

Sed quid opus est, ô Francia, externis exemplis, tu tu, inquam, ipsa testimonium huic rei perhibere in primis potes, quæ maximo tuo damno, ac detrimento experta es, religionem hanc Reformatam nulla vi externa, quantumuis grauiissima, & acerbissima, deleri posse. Nam præ cæteris orbis Christiani Regibus, atque populis, continuum, acre, ac vehemens tuum in religione ista opprimenda studium extitit. Quanto Zelo, quāto animorum studio, & ardore eius principis obstitisti, & quascunque potuisti tormentorū suppliciorūque moles ad eius cursum remorandum obiecisti, quantas ad illam statim

ab initio labefactandam machinas admouisti? Recordare hic quæso Francisci I. Regis, & animi & corporis robore præstantissimi, quo imperate religio hæc Reformata in regno tuo primum emerlit, edicta feuerissima, & quæ illa statim cōsecuta fuerunt, supplicia sæuissima, & exquisitissima, quibus omnes religionis huius cultores, sine vllō vel ætatis, vel sexus, vel ordinis delectu, promiscuè suppliciis affici curauit, ita vt nemini parceretur. Itaque plurimi, qui hanc religionem profitebantur, viui, præfecta nonnunquam lingua, subiectis ignibus cremabantur. Extant inter regias constitutiones Gallicas, edicta illius Regis anno 34. Itémque anno 40. & rursus anno 46. quorum auctoritate Senatores Parlamentorum maximam vim Christiani sanguinis profuderunt, qui quidem mira & incredibili constantia in illius confessione mortem optetierunt. Quid autem istis suppliciis, atque tormentis profectum fuerit, testis est experientia, testis eius filius, hæres, atque successor Rex Henricus II. Hic enim Rex domi, forisque clarissimus, patrem hac in re imitatus, nō minus quàm ille omni edictorum, suppliciorumque acerbitate eandem religionem extirpare tentauit, ipsemet duobus edictis, quorum vnum anno 51. alterum anno 57. edidit, apertè cōfessus est, hos suos & patris conatus fuisse irritos. Et tamen hoc regnante incredibilis hominum multitudo, omni suppliciorum acerbissimorum genere, fuit sublata. Sed quid? Quō magis ille, & eius consiliarij, officarij, procures, in eandem sæuierunt, tantō magis

gis illa creuit, atque inualuit. Ac illo quidem ipso tempore, quo plurimi passim in carcerem coniecti fuerant, qui ei religioni nomen dederant maximè in illos sèuire Regij officarij stauerant ipse subitò in ludicro quodam certamine, seu hastiludio, accepto iuxta oculum vulnere admirabili, subitò fuit extinctus. Duo itaque hi Reges (quorum maximæ erant opes, ac quibus imperantibus regnum tuum fuit opulentissimum, ac florētissimum) omnibus viribus, adhibitis vel acerbissimis & exquisitissimis quibusq; cruciamentis, atque suppliciis, religionem istam exscindere sunt conati, & quidem sub illis plurimi passim in toto regno, qui constanter illi adhærebant, neci fuerunt traditi, vel viui fuerunt combusti, vel strangulati, vel aquis suffocati, vel alio supplicij genere mactati. Sed quò plures fuerunt trucidati, tantò plures extiterunt, tantò magis numerus illorum auctus, & amplificatus fuit. Plurimi enim cùm spectassent eorum qui ob hanc religionem crudelissimè exquisitis suppliciis enecati fuerant admirādam constantiam, patientiam, sermones, cantus pietatis plenissimos, eiusdem religionis cognoscendæ studio fuerunt accensi, ac inflammati, tandèmq; in eius cognitionem peruenerunt. Ita vt non explebat tantum atque vulgo, sed plurimi summæ dignitatis, nobilitatisque homines, vtriusque sexus, Duces, Principes, Reges, eādē religionem sint amplexi, tantòque studio coluerint, vt nullis vel minis, vel promissis, vel suppliciis, vel beneficiis, ab illa sese dimoueri passi fuerint, atque

adeò vitam, & sanguinem pro illa profundere nequaquam dubitarint. Si ergo duo illi Reges, potentia, & auctoritate præstantissimi, omni animorum, consiliorum, virium, & opum suarum neruis, religionem hanc nascentem primum in regno suo opprimere non potuerunt, quin illa magis magisque contra quotidie inualuerit, quid facient alij? Et hinc cõstat illam vi tormentorum, & suppliciorum opprimi non posse, sed illam vel tolerandam, vel aliam eius tollendæ rationem esse ineundam.

Præterea non es nescia, tres Henrici filios qui illi in regni istius administratione ex ordine successerunt, qui fuerunt Franciscus I I. Carolus IX. & Henricus I I I. vltimus ex Valesia stirpe: nulli pepercisse labori, & sumptibus, vt religionem istam ex suo regno euellerent, matre imprimis instigante. Extant Regis Francisci I I. edicta, & diplomata, aduersus illam religionem anno 59. edita, quæ fuerunt tanquam gladius districtus. Nam post illa publicata, plurimi passim per totum regnum vel quinque mensium spatio, Parisiensis præsertim, ac Tholosani senatus decreto, horrendum in modum excruciat, vstulatiq; fuerunt. Et tamen hi ipsi tres Reges in omnibus edictis suis, aduersus religionem reformatam editis, liberè & ingenuè confessi sunt, se quidem omnes suos conatus ad religionem istam extinguendam adhibuisse, sed illos recidisse ad nihilum.

Habes igitur vel horum ipsorum quinq; Regum tuorum potentissimorum experientiam,
atque

atque confessionem, quæ meritò omnes ab eodem conatu religionis huius vi tollendæ deterere, & auocare debet.

Quid dicam de Reginz matris, & de reliquorum procerum Regni, cum Ecclesiasticorum, tum politicorum acerrimis conatibus, atque studiis, in eadem religione vi opprimenda, & delenda frustrà consumptis? Quæ omnia protestò tibi documêto esse debent, religionem hanc vi, arinis, atque suppliciis opprimi non posse. Nam illis omnibus mortuis & extinctis, viuit adhuc, vigetque in hoc tuo regno hæc religio.

Vt autè sub tribus prioribus Regibus, Francisco I. Henrico II. & Francisco II. eius filio, suppliciis potissimum, atque tormentis, ita sub duobus postremis Carolo IX. & Henrico III. Marte, atque bello eadem grauissimè fuit oppugnata. Bellum autem istud non internis tantum, ac domesticis, sed etiam externis, & aduentitiis copiis, aduersus reformatæ religionis studiosos, susceptum, & per 30. iam ferè annos, varia, & incipiti fortuna gestum, quàm varium, quàm anceps, & dubium, quàm graue, quàm acerbum, quàm sæuum, quàm cruetum, fuerit, prohi dolor, quid opus est multis verbis? res ipsa loquitur, idque tu cum maximo tuo damno es experta: adeò vt meritò vsurpare possis vetus illud dictum: *Flere victos, ac victores perdi ab ipsa victoria.*

Considera & animo tuo perpende bellum hoc ipsum postremum, quod anno 85. cœptum: & his 4. aut. 5. annis gestum est. An non 10. ferè exercitus, cum ex domestico, tum peregrino mi-

lite conflati, atque comparati, ad religionem istam excindendam, omnes tamen breui tempore peste, fame, inopia, cædibus dissipati fuerunt, & interierunt, simulq; numerosissimus ille Germanorum, Heluetiorumque exercitus, qui Regi tuo, & reformatæ religionis cultoribus auxilio venerat, subito fuit dissipatus. Confer quæso, atque compara Regis huius tui noui, eorum qui illi adhæserunt, & eius partes sectati sunt, copias cum aduersariorum copiis, atque exercitu, & considera vtriusque partis, atque copiarum exitum, fieri profecto non poterit, quin in admirationem summam iudiciorum diuinorum, rapiaris, quæ hac in parte apparuerunt.

Ergo quum in amplissimo hoc tuo Regno 60. ferè annorum spatio religio reformatà nulla vel suppliciorum, & tormentorum immanitate, vel belli sæuitia, (quæ incredibilis hominum multitudo interiit) extingui, atque deleri potuerit, quin contra creuerit, & magis magisque amplificata fuerit, (quod inficiari minimè potes) facile, credo, vel tuo ipso edocta exemplo, atq; damno vides, religionem hanc nulla vi, nullis armis, nullis tormentis, atque suppliciis tolli posse.

Ne te igitur monachorum quorundam tribunitiis concionibus, atque vocibus, ceu facibus, ad arma, ad vim, ad seditiones, tumultus, bella inflammari rursus patiaris, memor dicti illius S. Bernardi, Serm. 64. Scimus Monachi officium esse, non docere: sed lugere. Publicè prædicare nec monacho conuenit, nec nouitio expedit, nec non misso licet. Idem in Epistola 324. ad Henricum

ricum Maguntinum archiepiscopum, de Rodulpho, qui ludæorum neci delatus fuerat consensisse: Homo ille, inquit, de quo agitur in literis vestris, neque ab homine, neque per hominem, sed neque à Deo missus venit. Quia si se monachum, aut eremitam iactat, & ex eo sibi assumit libertatem, vel officium prædicationis, potest scire, & debet, quòd monachus non habet docentis, sed plangentis officium, quippe cui oppidum carcer esse debet, & solitudo paradiso. Hic verò à contrariis & solitudinem pro carcere, & oppidum habet pro paradiso. O hominem sine pectore, ô hominem sine fronte: cuius stultitia eleuata est super candelabrum, vt appareat omnibus, qui sunt in domo. Tria sunt in eo reprehensione dignissima, usurpatio prædicationis, contemptus Episcoporum, homicidij approbati libertas. Hæc velim expendant animis suis monachi nostri temporis, qui passim per oppida, per pagos, per agros discursantes, publicis concionibus populum non tam docent, quàm ad seditiones, atque tumultus commouent, imò Regibus ac Principibus violētas manus afferunt. Idem Bern. epist. 221. ad Ludouicum Regem. Profectò stabimus, & pugnabimus vsque ad mortem, si ita oportuerit, pro matre nostra armis, quibus licet, non scutis, & gladiis, sed precibus, fletibusque ad Deum. Non igitur castris, congressibus, & conflictibus bellicis, sed amicis, humanis, piis religiosisque cœtibus, synodis, atque colloquiis, non vociferationibus, sed precibus mutuis, ac disputationibus, modestiæ, chari-

tatisque Christianæ plenis, & hæreses tolluntur, & vera religio defenditur. Non inquam turbarum, & buccinarum bellicarum, sed turbæ, & buccinæ illius veræ argenteæ .i. verbi diuini sono, ac prædicatione, vera religio confirmatur, ac stabilitur, superstitiones, & errores tolluntur. Silēt, vt vulgò dicitur, leges inter arma. Sic silent inter eadem Martis horrentia arma iudicia, filet religio, quæ armis istis non accendi, sed extinguī potius in animis hominum solet. Quis enim ibi religioni locus esse potest, vbi cædes, rapinæ, stupra, adulteria, vis violenta, quæuis tetra & immania scelera, atq; flagitia designantur? Vnde igitur cū pietatis atque charitatis Christianæ, tum prudentiæ, atque sapientiæ erit, vt non aqua, & igni, non ferro & flamma, non armis, relictisque vos inuicem destruere, sed potius vt mutua pœnitentia, exemplo, mutuis precibus, colloquiis, cohortationibus, admonitionibus amicis, & beneuolis, cū publicis, tum priuatis, vos inuicem instruatis. Quòd si ciuiles & politicæ controuersię non vi & ferro, sed iure, iustis, atq; legitimis iudiciis & arbitriis decidendæ sunt, ac componendæ, quantò magis religionis controuersię non ferro corporeo, sed gladio illo spiritali hoc est verbo Dei, tolli, & decidi debent.

Nolite igitur quæso per Deum immortalem diutius sequi consilium imperitorum medicorum, qui vulgò empirici vocantur, qui medicamenti sæpe vtuntur violentis, quæ ad corpora potius corrumpenda, atque perdenda, quàm sananda valent. Eiusmodi medicamentum est bellum,

lum, quo omnia complentur sanguine, cædibus, funcribus, sceleribus: mala autem, vt sunt superstitiones, errores, opinioniones falsæ, dissidia, hic non tolluntur, sed corroborantur, donec tandem totum quasi Reipub. corpus corrumpatur, atq; intereat.

Scio tamen quædam bella esse iusta & necessaria: sed quod ad te attinet, charissima soror, non dubito quin bella ciuilia quibus tandiu & tantopere conflictata es, tibi fuerint exitiosa, & siquidem continuerint, futura sint exitiosissima.

Dissensiones de religione olim in primitiua Ecclesia, grauissimè exarserunt, plurimæ hæreses, in orbe Christiano volitarunt, quibus etiam Imperatorum quidam fuerunt infecti. Quid tunc egerit Ecclesia, historia plena est exemplorum. Animaduertebant viri illi sapientes hæresim esse opinionem quandam, quæ sedem, & domicilium suum haberet in mente, & esse rationis quædam falsam, fallacem, & fucatam imaginem, quæ non nisi vera ratione deleri possit. Indicta igitur, & coacta fuerunt concilia, accersiti, & cōuocati fuerunt ex omnibus orbis Christiani partibus viri, theologiæ, & literarum sacrarum periti, cū doctrina & eruditione, tū vitæ, morumq; sanctitate clari, & illustres, qui ex verbo Dei cōtrouersias illas deciderunt. Hoc pacto cessit tandem opinio scientiæ, vmbra luci, falsitas veritati, sophistica veræ rationi. Idem hodie quoque fieri potuit. Non est igitur, quod existimemus, religionem christianam adeo esse obscuram, implicatam, dubiam, & inuolutam, vt in concilio

aliquo, siue generali, siue nationali, verbi lumine, atque canone non illustrari, explicari, & euolui possit. Habet illa certa, & indubitata sua principia, axiomata, conclusiones. Eadem ratio, quæ expedit nodos & difficultates in iuris prudentia, idem in theologia præstare poterit. Itaque tantò melius, facilius, atque commodius, quod lex diuina ab ipso Deo omnis fallaciæ, & falsitatis experte profecta, ac proinde ei simillima nullam in se antinomiam, discrepationem, & contradictionem contineat, cum leges humanæ contrà ab hominibus profectæ propter ipsorum legumlatorum, aut etiam vnus à se ipso dissidentis inconstantiam, ac leuitatem, varias in se contradictiones cõtineant. Iniuria fit maxima Legi diuinæ, quæ se ipsam lucem appellat, si quis credat illa homines non posse illuminari.

At negant nonnulli opus esse Concilio, sectandam esse Ecclesiam, illam errare nō posse. Contrà constat ante & post Christi aduentum, eum populum qui vocatus est Ecclesia Dei, grauissimis erroribus laborasse. Maiores nostri cum politici, tum Ecclesiastici, multos ante annos, atque secula de orbis Christiani superstitionibus, erroribus, abusibus, opinionibus peruersis, vita, atque moribus impuris grauissimè conquesti sunt: & idcirco illos corrigendi, emendandi, tollendi gratia concilium aliquod liberum, & legitimum indici vehementer & ardentè exoptarunt. Vt omittam plura, & antiquiora exempla Ludouicus 12. (qui Henrici 111. vltimi tui ex gēte Valesia Regis proauus, maternus, & pater patris

trix ob paternam & incredibilem erga illam charitatem cognominatus fuit) in corrupto, deprauato, exulceratōque rerum politicarum, & ecclesiasticarum statu, hoc saluberrimo remedio vti voluit, quæ etiam Maximiliani I. Imper. erat voluntas, atque sententia. Ac consilium quidem Turonibus primum, mox Pisis, deinde Lugduni coactum est, vbi & multa in Pontificem statuta sunt: cum ille interea impios prophanosque omnes pronuntiaret, qui huic concilio intererant. Interim hic Pontifex pacem cum Ludouico simulans, omnia illius opprimendi consilia captabat, qui edicto publico, se decreta cœtus Basiliensis & Constantiensis in Gallia tueri profitebatur. Et pōtifex vt Pifarum cœtum dissolueret, alium ad Lateranum indixit, consilio Ludouicum opprimendi. Primo patrum cœtu, qui fuit quinto Nonas Maias, anno 1520. Egidius Viterbiensis Augustiniani ordinis præfectus, vir cum morum sanctimonia, tum eruditione, & eloquentia clarissimus, luculentam, & prolixam orationem statim ab initio habuit, in qua pro sua pietate, & singulari dicendi facultate de Ecclesiæ, de religionis, de vitæ, morumque extrema, perditâ, profligatâq; improbitate grauissimè conquestus est. tum de synodorum utilitate, fructu, ac necessitate, pie sapienterque multa disseruit.

Hunc itaque Regem laude dignissimum, cum in aliis plarisque rebus, tum in hoc quoque Rex hic tuus imitatur: ita vt nō minus quam ille meritō pater patriæ appellari debeat. Nec verò il-

lum tamen, sed alios quoque prædeceffores, omnésque Chriftianiffimos Reges, & Imperatores, qui vnquam extiterunt, hac in parte egregiè, maximæque cum laude imitatur, quod Synodum expetit, tanquam optimum pacis, tranquillitatisque perfugium, (fi quidem ritè celebretur) exacerbatos hominum animos fanandi, & mitigandi, à bello ad pacis, tranquillitatis. & charitatis ftudium reuocandi, quafuis de religione cōtrouerfias, quofuis errores, hærefes, fuperftitiones, & abufus ex ecclefiæ tollēdi, & mores corrigendi, & emendandi remedium, & instrumentū. Idem ergo omnes qui vel minimum cūm publicæ, tum priuatæ falutis cura tanguntur, exoptare & à Deo affiduis precibus & votis ardentiffimis debent contendere: non autem præfractè cum fuo Rege Synodum legitimam procurante bellum gerere.

Omnes etenim illi, quemadmodum omnium ætatum atque fæculorum exempla, hiftoriæ, & annales teftantur, qui Regiæ, & Imperatoriæ dignitati, potestatique refiftunt, grauiffimas tandem & atrociffimas pœnas luunt. Nam (vt ex innumerabilibus exemplis, quæ paffim in antiquis literarum monumentis occurrunt, vnicum tantum proferam) cui, qui vel primoribus labris antiquas hiftorias deguftauit, non eft notum, omnes ad vnum illos, qui Iulium Cæfarem vel fua manu, vel fuo confilio, atque confenfu interfici curarunt, miferriimè intra trienniū interiiffe, & vel fibi ipsis mortem confciuiſſe, & eadem, qua illi mortem attulerant, manu vitam fibi exhaufiffe

hausisse, vt Brutum, Cassium, vel ab aliis occisos fuisse, ita vt nullus eorum vltrices Dei manus euaserit: quum tamen conspirationis illius, atque cædis, multæ, & graues viderentur fuisse iustæque causæ? Ac de Bruto quidem, qui præcipuus eius cædis auctor fuit, sic scribit Valerius Maximus: M.Brutus, inquit, suarum prius virtutum, quàm patriæ parentis parricida fuit. Vno enim factò & alias in profundum præcipitauit, & omnem nominis sui memoriã inexprabili detestatione perfudit. Quòd si igitur Iulij illius Cæsaris cædem, qui tyrannus, qui libertatis Rõ. oppressor habitus fuerat, qui vi, & iniusta ratione, regnum illud inuaserat, qui veræ religionis expers fuerat, Deus tam grauitè, atrocitèrque est ultus, quantò grauius, & atrocius Deus vlciscetur omnes eos, qui vim bellumque inferunt iis Regibus, atque magistratibus, qui sunt Christiani, quique iusta, legitimæque ratione, honorem illum suum, atque munus fuerunt consecuti? Hoc autem libentius C.Iulij Cæsaris exemplo præ innumeris aliis vsus sum, quòd hic tuus Rex clementia, lenitate, & mansuetudine, rei militaris peritia atque gloria, & aliis virtutibus, quibus imperator ille olim floruit, illi est simillimus. Quem vt Deus saluũ & incolumẽ quàm diutissimè conseruet, & ab omnibus insidiis liberet, pij omnes & tui amantes, assiduè precantur.

Sed quid opus est vel exterorum, vel antiquorum exemplorum longa commemoratione? An non experientia quotidiana in hoc ipso tuo Rege atque regno plurima tibi horrenda iræ, &

vindictæ diuinæ exempla suppeditat, quæ Deus tibi proponit, ad te ab isto nefario tuo conatu deterrendum. Omnes fere illius hostes, qui non tam illi, quàm ipsi patriæ bellum indixerant, plus profectò, quàm ipse optarat, pœnarum dederunt, miserrimèque interierunt. Vos igitur, qui illorum facta, contumaciam, perduellionemque imitamini, an non quæso exitus istorum exitiales perhorrescitis? Ergo vel hæc ipsa grauissima seuerissimæque iustitiæ diuinæ exempla breui tempore in pertinaces, obstinatósque illius, seu patriæ potius, hostes edita, te meritò ad hunc tuum Regem, tibi diuinitus, lege patriæ, lege ipsius naturæ datum, recipiendum, & omni amore, beneuolentiæque amplectendum extimulare debent.

Cogita quæso, ô Gallia ex quot, & quantis illum Deus ante, & post dignitatis huius Regiæ adeptionem insidiis, atque periculis admirabili ratione extraxerit, quàm graues & atroces pœnas dederint omnes illi, qui huiusmodi illius dignitati, atque saluti insidias struxerunt, quique illi exitium interitumque moliti fuerunt. An non vel hoc ipsum satis magno grauique est argumento, Deum illum diutius regnare, & ad plura adhuc, & maiora operi reservare velle, quum illum ex tot, tantisque periculis eripuerit, & conseruarit.

Ne igitur, vos obtector, ô Galli, per Deum immortalem, si vel minima vestræ, patriæque salutis cura, & amore tangimini, illum furore quodam effrenato, & indomito quem Deus facillimè tandem, horrendumque in modum domabit
dictis

dictis, factisque lædere, ac persequi, illique resistere pergatis, ne in diuinam, grauissimam & ineluctabilem iram incidatis. Illum igitur tua potius obedientia, & obsequio placare, quàm contumacia, & rebellione tua, non illius tantum, sed Dei, totius familiæ Borboniæ, tot Principum, Ducum, nobilium, procerum Regni, qui illi fauent irritare, & ad maiorem furorem prouocare debes. Patiens is quidem, immò patientissimus adhuc fuit, sed læsa patientia sæpe fit furor, & quidem furor iustissimus. Solomon Rex sapientissimus in prouerbiis suis docet, quàm graues sint Regum manus. Nec verò in Regum tantum, sed Dei ipsius iram, & furorem funestissimum incurrunt omnes ij, qui Regibus etiam duris, & acerbis, nedum qui clementibus & benignis obedire recusant: quid dicam qui necem etiam illis adferunt? Itaque miserrima adhuc & tristissima fuit, & in posterum quoque erit illorum fors atque conditio, qui Regis tui vitæ insidias struunt. Ille inimicissimis, ac infestissimis quibusque suis hostibus parcit, & ignoscit, imò benigne facit: & tu, ô scelus immane, illum tui amantissimum odio prosequeris, illi repugnabis, armis, belloque illum appetes, & infestabis? omnes tuos conatus ad illius perniciem comparabis? Quòd si igitur hic tuus Rex te non modò nullo affecisset beneficio, nihil in te boni contulisset, sed etiam plurimis & grauissimis te laesisset iniuriis, tamen iniurias has illi meritò (sicut illum vides facere) remittere, & condonare, ac cum illo in gratiam redire deberes. At cùm præ-

tereà Rex hic tuus sit tibi patris loco, sine detestando certi parricidij scelere illi resistere non poteris. Quòd si is qui impius est in patrē priuatum, ceu parricida, Deo hominibúque inuisus, omnique suppliciorum genere dignissimus censetur, quantò magis is qui in patrem patriæ, ac proinde in ipsam patriam, veluti monstrum quoddam, atque portentum, ad inferos vsque relegandum, existimari debet? Ipsa natura nos docet, vt nobilitati, hoc est, iis qui ex antiqua nobilique familia sunt procreati, faueamus. Ergo tu quoque hunc tuum Regem, ex Regio genere tam materno quàm paterno, ex Regibus illis tuis antiquis, & priscis procreatum, non potes non sine magno impietatis crimine aspernari. Non solum enim in Ludouicum illum Sanctum, sed in omnes Reges illos antiquos, & priscos, Merouingos, Carolouingos, & Capetiingos, seu Capetios, in omnes Reges Francicos, & Nauarrenos, graui se ingratitude scelere obstringunt, illorum quasi manibus insultant, qui hunc Regem ab illis oriundum, hanc illorum propaginem, virtutis maiorum illorum strenuum imitatore, non debita obseruantia, atq; obedientia prosequuntur, quique illum vel minima aliqua iniuria lædunt, vel lædere cogitant.

Iam verò illi, qui Ecclesiæ, religionisque Romanæ nomine, atque prætextu, ne licam furo, atque simulatione, nouo huic tuo Regi, & ipsius, regni que totius officariis, proceribus, optimatibus, atque principibus (qui Regis huius partes fidelissimè, constantissimè que sectantur, quorum etiam

etiam plerique Ecclesiæ, religionique Romanæ sunt addictissimi) tanto studio, tantoque conatu, atque contentione resistunt, & id optimo iure sese facere existimant, animis suis (quos Deus illuminet) etiam atque etiam diligenter velim reputent, quàm pertinax, & obstinatum hoc illorum cum iusto legitimoque suo Rege, cum iustis legitimisque Regni, patriæque suæ principibus belligerandi studium (cui morigerari potius, & obsequi debuerant) ei ipsi, quam profitentur, quam iactitant, de qua gloriantur, cuius acerrimi tutores, & propugnatores haberi volunt, Ecclesiæ, religionique Catholicæ Apostolicæ, Romanæ planè, & ex diametro repugnet, ac aduersetur, id quod vel luce ipsa meridiana luculètius est, atque manifestius. Quòd si Ecclesia illa ipsa Romana ad quam Paulus Apostolus scripsit reuiuisceret, non modo non tuum hunc Regem reiiceret: sed toto animo amplecteretur, qui doctrinam in illa epistola & in omnibus sacris libris contentam reuerenter colat.

Nam quæcunque Paulus Apostolus in sua Epistola Rom. Ecclesiæ credenda proposuit, de Deo vno essentia, trino personis, de Dei natura inuisibili, eius potentia, iustitia, misericordia, prouidentia immensa, cuius speculum, atque theatrum est mundus, ea Rex tuus credit, & amplectitur.

Quæcunque Paulus in illa Epistola ecclesiæ Romanæ tradidit de Christo Dei Filio vnico, vero Deo, & vero homine, de duabus eius naturis, de eius officio regali, sacerdotali, & prophetico,

de eius Incarnatione, natiuitate, passione, morte, sepultura, resurrectione, ascensione in Cœlos, sessione ad dexteram Patris, intercessione, & deprecatione, de toto redemptionis humanæ negotio, eius effectū, atque fructū salutifero, ea Rex tuus credit ex animo, & amplectitur.

Quæcunque S. Paulus in Epistola illa Ecclesiam Rom. docuit, de Spiritu Sancto, de eius diuinitate, energia, virtute, efficacia, donis, atque muneribus, iis Rex tuus fidē ex animo adhibet.

Quæcunque S. Paulus in hac Epistola Romanæ Ecclesiæ necessario credēda ad salutem proposuit de hominis seu humani generis extrema, propter apostasiam primorum nostrorum parentum, miseria, corruptione, ac deprauatione, de peccato (cui totum genus humanum est obnoxium) originali, & actuali, de peccati stipendio, hoc est, morte prima, & secunda, cui similiter vniuersum genus humanum addictum est, & mancipatum, ea quoque Rex tuus verē credit,

Quæcunque Paulus de Lege diuina, vitæ morūque moderatrice optima, peccati teste, & accusatrice grauissima, iræ, & mortis operatrice docuit, iis Rex quoque tuus fidem adiungit, cui lege Dei nihil est prius, & antiquius.

Quæcunque Paulus Apostolus, in illa ipsa Epistola, S. Spiritus instinctu, & afflatu, Ecclesiam Romanam docuit, de hominum æterna electione, prædestinatione, vocatione, iustificatione, regeneratione, sanctificatione, glorificatione, in, per, & propter Christum, reparatione denique, & instauratione, ea quoque Rex tuus ex animo credit

credit & amplectitur.

Quæcunque Paulus Apostolus, Romanæ Ecclesiæ tradidit, de Euangelio Dei, siue Christi, quod est potentia ad salutem omni credenti, iis quoque cum animi gaudio Rex tuus assentitur.

Quæcunque Paulus Apostolus Ecclesiam Rodocuit, de ministerio, seu munere, & officio Ecclesiastico, de verbi diuini .i. legis, & Euangelij prædicatione, de Sacramentis, iis quoque Rex tuus ex animo astipulatur.

Quæcunque S. Paulus Apostolus præcepit de Dei voluntate, de Fide, spe, charitate, de pœnitentia, de omni virtutum genere, de vniuerso Dei cultu externo, & interno, ea Rex tuus sibi quoque dicta putat.

Quæcunque Paulus Apostolus, in hac sua Epistola docuit, de Ecclesiæ constitutione, atque collectione ex Iudæis, & gentilibus, de Gentium vocatione misericordissima, maximæ partis Iudæorum reiectione iustissima, iis quoque Rex tuus fidem adiungit.

Quæcunque Paulus Apostolus, in hac sua Epistola Ecclesiam Romanam docuit, de statu politico, de magistratus, & subditorum mutuis officiis, iis quoque Rex tuus assensum præbet.

Quæcunque postremò Paulus Apostolus, in hac Epistola, vt etiam in reliquis suis Epistolis, S. Spiritus reuelatione Ecclesiæ Romanæ tradidit, de secundo Christi aduentu, de extremo illo die, atque iudicio, de mortuorum resurrectione, de vita æterna, ea quoque credit, atque sperat, atque adeò ad illa aspirat Rex tuus toto pe-

ctore.

Quoniam ergo Rex tuus hos à me commemoratos præcipuos, maximèque ad salutem necessarios articulos, à S. Paulo Ecclesiæ doctore cum in reliquis, tum in illa præcipuè præstantissima ad Romanam Ecclesiam scripta, & data Epistola, explicatos amplectitur, approbat, confitetur, quis quæso erit tam impudens, tam audax, imò tam impius, qui illum verè Religionis & verè Catholicæ, & Apostolicæ cultorem, ciuem, atque membrum esse neget? Et quoniam ore Ecclesia Romana, quæ nunc est, hunc tuum Regem hæreseos nomine infimulabit, qui illam ipsam doctrinam tenet, quam vetus illa Ecclesia Romana à Paulo Apostolo edocta olim tenuit & professæ est? Nam si hæc ab illa vetere desciiuit, non est quod conqueratur. Si Rex tuus veterem illam Romanam sequi malit. Si neget se desciiuisse quid habet quod cum tuo hoc Rege expostulet?

Inficiari prætereà nemo potest, non paucos hodie ritus, cæremonias, opiniones, atque dogmata in Ecclesia Romana, vt nunc est, locum habere, & vigere, quorum in prisca, & veteri illa Ecclesia orthodoxa, Apostolica, Romana, vsus non fuit, quorum Paulus Ecclesiæ, illius veteris Romanæ doctor, non modo in hac sua ad Ecclesiam Romanam Epistola, sed in omnibus reliquis suis Epistolis ἐδὲ γὰρ, nullam, ne minimam quidem mentionem fecit, quæ silentio minimè profecto prætermisisset, si illa quoque ad salutem necessaria iudicasset, in quibus tamen hodie plu-
rimi

rimi proram, & puppim, vt ita loquar, pietatis, religionis, atque salutis collocant. Hęc, quę paulatim post Constantini præsertim tempora in Ecclesiam irrepsērunt, si Rex tuus tanquam primitiuz, & antiquę illi Ecclesię Religionique orthodoxę, Apostolicę, Romanę non omninò consentanea, non statim approbat, & amplectitur, nisi prius edoctus fuerit veris solidisque rationibus, illa antiqua illi Ecclesię, religionique congruere, & conuenire, id profectò ei nō vitio, sed laudi potius est vertendum.

Moribus antiquis, inquit ille, stat res Romana, virisque sic multò verius, iustiorique de causa veram Ecclesiam Romanam dicere possumus cęsendam esse potius stare antiqua religione, & vita, & antiquis viris, Apostolicis, & martyribus Romanis. Confer quęso illā, quę hodie est, Ecclesiam, religionemque Romanam, cum antiqua, veterique illa Ecclesia, & religione, quę Apostolorum temporibus extitit, tantum, velis nolis, cogeris fateri, inter vtrāmque esse discrimen & interuallum, quantum inter lucem, & tenebras, adeo vt hic locū habeat ille versiculus de eo qui Romā in media Roma quærebat: Et Roma in Roma nil reperit media.

Dies aliquem citius, quàm oratio deficeret, si singulos antiquę illius Ecclesię, religionisq; Romanę ritus, mores, & dogmata, cum eius quę hodie est ritibus, moribus, & dogmatibus cōferre vellet. Itaq; aliquot antè sæculis viri doctrina, pietatēque præstantissimi, de Ecclesię religio-

nisque Romanę corruptelis, erroribus, moribus ambitione & luxu grauiſſimè cōqueſti ſunt. Legas quæſo S. Bernardi Episto-
las, ad Innocentiũ, ad Eugenium, ad Clerum, ad Curiam Romanã, & multos alios, ſcriptas: ex quibus facilè intelli-
ges, quantopere iam illo tempore Eccleſia Ro-
mana à religione, vita, ac moribus antiquæ, pri-
ſcæ, & primitiuæ illius Eccleſiæ Romanæ deſe-
xerit. Episto-
la. 230. ad 3. Curia Romanæ episco-
pos inter alia ſic ſcribit: Hinc quidem eratis cō-
tra Apoſtolum Petrum, 1. Pet. 5. dominantes in
Clerum, imò & contra coapoſtolum eius Pau-
lum, 2. Cor. 1. dominabamini fidei totius orbis:
at nunc nouum aliquid addidiſtis, uſurpâtes am-
plius, & in ipſa Religionem. Quid reſtat niſi vt
adiiciatis & ipſis angelis ſanctis dominari? Paſ-
ſim idem Pontifices Romanæ Eccleſiæ, non Pe-
tri, ſed Conſtantini ſucceſſores, & ſucceſſores
quidem plurimos, imitatores autem paucos eſſe
ait. Quod ſi S. Bernardus reuiuiſceret, quanto iu-
ſtiores ille, & ampliores haberet de Eccleſia
Romana conquerendi cauſam, quæ ex illo tem-
pore (vt omnia humana ſemper in deterius ver-
gunt, quo mundus hic propius ad occaſum ſuum
accedit) longè corruptior, & deterior euasit.

Duplex igitur omnino, vt ex præcedentibus
conſtat, Eccleſia ſimul, atque religio Romana
ſtatui debet. Vna vetus, quæ priſcis Apoſtolorũ
tēporibus floruit: altera noua, qualis fuit poſt il-
la priſca tēpora, & nunc eſt etiam multis cum er-
roribus, & ſuperſtitionibus, tum vitæ, morũq;
vitiis

vitiis contaminata, vt illius ipsius sectatores plurimi, iam aliquot annis, imo sæculis, & hodie quoque confiteri coguntur.

Rex itaque tuus pro pietate sua, atque prudentia, nouam hanc, & hodiernam religionem, ecclesiãque Romanam, ad antiquã illius Romanæ, & simul ad præstantissimarum aliarum quæ iisdem temporibus extiterunt: (cuiusmodi fuerunt Hyerosolymitana, Antiochena, Ephesina, &c.) nitorem, puritatem, & integritatem, nõ vi, atque ferro, sed verbo Dei, & legitimo liberõque aliquo cõcilio reuocari, ac reformari vehementer cupit, vt deinceps non Romana vel Religio vel Ecclesia, sed Christiana & Religio & Ecclesia meritò dicatur: & ipse tuus Rex se libenter subiiciat non Romanæ sed Christi Ecclesiæ. Ecquīs enim dubitat quin distinguenda sit Ecclesia particularis (cuiusmodi esset Ecclesiã Romana etiam Reformatissima) ab vniuersali & Catholica illa Ecclesia quæ est corpus Christi mysticum?

Hac in parte antiquissimi, & piissimi martyris S. Cypriani vult sequi cõsiliũ, quod his verbis exprimitur. Epist. 74. ad Pompeium. In compendio est autem apud religiosas & simplices mentes, & errorem deponere, & inuenire, atque eruere veritatem. Nam si ad diuinę traditionis caput, & originem reuertamur, cessat error humanus, & sacramentorum cœlestium ratione perspecta, quicquid sub caligine, ac nube tenebrarum obscurum latebat, in lucem veritatis a-

peritur. Si canalıs aquam ducens, qui copiosè prius, & largiter profluebat, subito deficiat, nonne ad fontem pergitur, vt illic defectiõis ratio noscatur? vtrumne arefcentibus venis, in capite vnde siccauerit, an verò integra inde & plena procurrens in medio itinere destiterit? vt si vitio interrupti aut bibuli canalıs effectum est, quò minus aqua continua perseveranter ac iugiter flueret, refeito & confirmato canali, ad vsum, atque potum ciuitatis, aqua collecta eadem vberitate, atque integritate representetur, qua de fonte proficiscitur. Quod & nunc facere oportet Dei sacerdotes, præcepta diuina seruantes, vt si in aliquo mutauerit, & vacillauerit veritas, ad originem dominicam, & Euangelicam, atque Apostolicam traditionem reuertamur, & inde surgat actus nostri ratio, vnde & ordo, & origo surrexit, &c.

Quum igitur Rex hic tuus, iuxta consilium & sententiam Cypriani, vehementer expetat recurrere ad ipsum fontem doctrinæ Apostolicæ, & ad ipsam Ecclesiæ Christianæ originem, vt verè & sanctè Ecclesia reformatur: proculdubio iniquissimè à suis subditis Ecclesiæ Catholicæ prætextu oppugnatur, contra ipsius veræ Ecclesiæ Catholicæ rationem, à qua illi, suo hoc facto, probant se esse alienissimos. Quinetiam incurunt in omnia illa vitia quæ Paulus Apostolus in Epistola ad Romanos grauissimè & sanctissimè reprehendit: quæ nolo sigillatim commemorare, ne hæc mea Oratio ad inuehendum potius quàm
ad

ad congratulandum comparata esse videatur.

Paulus Ecclesię Romanę ciues hortatur, vt quoad fieri potest, in pace viuant, vel pacem colant cum omnibus hominibus. Egregia ergo scilicet hæc eorum est fides, & religio Catholica, Apostolica, Romana, qui cum Rege tuo pacis amantissimo, cū reliquis regni proceribus, & ciuibus bellū semper gerere, quā pacem colere malūt. Paulus Ecclesię Romanę ciues omnes ad potestatibus, & magistratibus etiam Ethnicis, & barbaris (qualis tunc temporis fuit Nero monstrosus, ac portentosus crudelitatis tyrannus) tanquam ordinationi diuinę obediendum, & obtemperandum, ad timorem, honorem, tributa, atque vectigalia illis reddenda, grauissimē adhortatur. Idem ad Titū: Admoneto illos, inquit, vt Principibus, & potestatibus subiecti sint, vt magistratibus pareant, vt ad omne opus bonum sint parati, ne de quoquam maledicant, ne sint pugnaces, sed humani, omnem exhibentes mansuetudinem erga omnes homines. Idem 1. Epistola ad Timoth. c. 2. quam Romę scripsit. Adhortor, inquit, ante omnia, vt fiant deprecationes, preces, postulationes, gratiarum actiones, pro quibusuis hominibus. Pro Regibus, & quibusuis in eminentia constitutis, vt tranquillam, & beatam vitam degamus, cum omni pietate, & honestate. Quod si igitur Apostoli, Regibus, Principibus, ac magistratibus etiam Ethnicis, & crudelibus, à religione Christiana, & orthodoxa alienissimus, amorem, & obseruantiam, tributa, quan-

tumuis grauia præstari, & exhiberi volunt, præcésque pro illorum salute ad Deum fundi, cogita, ac reputa animo tuo, quàm procul absint à religione Catholica, & Apostolica, illi qui iusto legitimoque tuo Regi, omni virtutum Christianarum genere ornatissimo, Regni proceribus, Principibus, ac magistratibus Christianissimis, non solum non iustum, debitumque amorem & honorem deferant, sed illis etiam vim, bellum, iniurias, perniciemque conantur inferre. Paulus Ecclesiam Romanam monet, vt sibi caueat ab iis, qui dissidia, discordias, atque scandala in Ecclesiam inuehere conantur: quique non Christo Iesu, sed ventri potius suo seruientes, blanditiis, & assentionibus suis malitiosis simplicium mentes perstringere, atque seducere conantur. O vtinam vos omnes, qui de Ecclesia, & religione Cath. Apost. Rom. tantopere gloriamini, sapientissimo huic S. Pauli consilio obtemperantes, non ita furiosorum, & turbulentorum quorundam hominum, suum potius lucrum, atque commoda, quàm Dei gloriam, patriæque salutem quærentium, verborum illecebris, atque lenociniis vos seduci, decipi, falli, & in impia, & sacrilega hac vestra aduersus iustum, legitimumque vestrum Regem rebellionem, & contumacia confirmari, atque corroborari patere mini.

Qua de causa illi sunt laude dignissimi Regni tui Principes, Proceres, Magnates, & Nobiles, qui licet eam profiteantur doctrinam & religionem

nem Ecclesię Romanę, quę nunc est: tamen Regem hunc tuum constantissimę fidelissimęque aduersus omnem vim & iniuriam defendere: atque adeo sanguinem suum pro illius salute profundere non dubitant.

Nonne vides quoque populum Rom. & Italię principes, ac ciuitates quasdam florentissimas, de nouo hoc tuo Rege honorificentissimę sentire, & loqui, ei bene velle, & bene precari, valdeque de noua hac dignitate gratulari, qua illum dignissimum arbitrantur?

Quoniam igitur à Regis tui partibus stant leges patrię, stant consuetudines, & instituta maiorum, stat æquitas, & iustitia, stat ratio, stant præcipui Regni ordines, atque procures, stant etiam externi orbis Christiani Principes, & ciuitates multę, stat Deus ipse, de statu illius conuellendo ne cogitare quidem sine maximo scelere potes. Deum rogo vt eorum qui adhuc ei aduersati sunt & mentes illuminare, & corda emollire, atque flectere velit ad hunc suum Regem agnoscendum, & iusta debitęque beneuolentia, obseruantia & obedientia colendum.

Aperite igitur, quæso, nec diutiùs occludite, & ciuitates Francicę, huic vestro Regi portas vestras, qui ingressu suo, atque introitu vobis pacem, tranquillitatem, concordiam, omniumque bonorum copiam afferet, & grauissimas molestias, atque calamitates, quibus adhuc perfuncti estis, maximis bonis, atque commodis compensabit, proculdubio, atque refarciet. Nolite per

Deum immortalem, diutiùs introitu illum atq; aditu prohibere, ne in grauiorem Dei, Regisq; vestri offensionem incurratis, & exitium vobis accersatis, interitumque extremum. Regem & quidem Regem vestrum naturalem, & legitimum, immò patrem patriæ optimum, & clementissimum excepturæ, & reipsa experturæ estis, qui nō vestra bona, vestras fortunas, vestram seruitutem, vestrum sanguinem, sed vestram utilitatem, vestramque salutem exoptat.

Gaudete & lætamini vos Iudices, magistratus, vos Rerumpub. ciuitatum, atque prouinciarum præsides, quoniam Regem estis habituri omnis recti, iusti, & æqui, & peritum, & amantem, cuius opera, & consiliis fidelissimis, & sapientissimis, vobis in muneris, officiique vestri iusta, legitimæque administratione vti licebit, illique munerum, officiorumque vestrorum laboriosissimorum, vestrarum virtutum, atque laudum non testem solùm, & spectatorem oculatissimum, & acerrimum, sed etiam quasi collegam, socium, & adiutorem, denique remuneratorem fidelissimum, ac munificentissimum estis habituri.

Exultate gaudio, atque lætitia vos Mineræ, atque Musarū cultores, vos Scholarum, & Academicarum (quæ quidem Ecclesiæ, atque Reipub. sunt seminaria) Rectores, atque Moderatores, vos Doctores, atque magistri, vos tyrones studiosi, atque candidati linguarum, artium, atque disciplinarum liberalium, quòd quasi alterum
Franciscum

Franciscum, alterum Ludouicum S. hoc est Regem literarum, & studiorum amantissimum, scholarum patrem, atq; patronum fidelissimum adepti estis: & quòd hoc Rege literarum, ac literatorum amantissimo imperante, vobis ad intermissa, seu interrupta potius vestra studia, re-colenda patet reditus: &, post diuturnas istas turbas, atque molestias, otij, atque pacis fructus vobis datur, ad artes vestras celebrandas.

Gaudete & letamini vos mercatores, & negociatores, quibus hoc Rege regnante, & nihil nisi pacem, & otium spectante, liberrimè rursus mercaturas, & negotiationes vestras (quæ silent inter arma) sine fraudibus tamen, vsuris, scœnoribus, & illicitis artibus, licebit exercere.

O fortunatos vos vinitores, & agricolas, qui sub hoc Rege pacis, otij, agriculturæ studiosissimo, arma, hastas, tela, in rastra, ligones, vomeres, aratra cōvertere, & agros, vineasque vestras, horrendis istis bellis miserum in modum deuastatas, & quarum horrendas, miserandasque depopulationes, antea luxistis, re-colere, illarum fructibus pacatè, quietè, & tranquillè rursus frui poteritis.

Incredibili gaudio, atque lætitia affici conuenit vos milites, duces, & capitaneos, quòd Regem vobis Deus dedit rei militaris peritissimum, qui forti, ac strenua vestra opera non aduersus vestram patriam, non ad ciuilia, & interna, sed externa potius bella, eaque iusta, legitima, ac necessaria gerenda, ad patriæ vestræ fines partim

aduersus vim externam tutandos; partim propagandos, & amplificandos, uti est paratus, & a quo maxima vestrae fortitudinis, vestrorum laborum, atque periculorum, certissimaque vobis expectanda erunt praemia.

Gaudete vos Nobiles, Equites, Comites, Barones, quibus sub hoc Rege ac Principe nobilissimo, generosissimo, potentissimo, vobis antiquis vestris honorum, dignitatum, atque fortunarum privilegiis, atque prerogatiuis rursus frui licebit, quique debitis meritisque vestrarum virtutum, atque rerum fortiter gestarum afficiemini praemiis.

Gaude, & exulta vulgus, plebs, multitudo infima, quia Regem habes benignum & mansuetum, ad quem facillimi sunt vel vilissimis & abiectissimis quibusque aditus, quo quidem aduersus omnem vim iniustam potentiorum, & opulentiorum tutissimo perfugio, & asylo uti poteris.

Gaudete & exultate omnes peregrini, inopes, viduae, pupilli, miseri, afflicti, ærumnosi, & oppressi, quibus hoc vestro Rege tanquam patre, pastore, patrono, tutore, ac defensore optimo, ac fidelissimo uti, & sub eius tutela, patrocinio, & quasi umbra pacatam, & tutam ab omni vi, iniuriaue vitam degere licebit.

Gaudete denique omnes pii, & boni, qui pietatis, honestatis, religionis & innocentiae vestrae non solum defensorem, sed etiam remuneratorem habebitis.

Sed

Sed vt huic meæ Gratulationi, & admonitioni fidelissimæ modum, seu finem potius (cùm modum iam dudum excessisse videar) imponam, te, ô Gallia, socia fidelissima, rursus mirum in modum rogo, atque obtestor: vt hoc meum officium ex animo tuæ dignitatis, & amplitudinis studiosissimo profectum, sereno vultu, atque animo accipias, meque in te amanda, colenda, & propugnanda constantissimam, antiquo tuo amore, fauore, beneuolentiæque prosequi pergas, tibi que planè persuadeas, me ad antiquam hanc nostram coniunctionem, quæ vtrique nostrum maximo adhuc cùm honori, gloriæ, laudi, & decori, tum præsidio aduersus omnem communium hostium vim fuit, tuendam & conseruandam, animo ac voluntate esse admodum procliuui, constanti omnino, atque propensa. Idem de te habebo persuasissimum.

Te deinde, ô Rex serenissime, & Christianissime, oro, obsecro, & obtestor, vt maiorum, & prædecessorum tuorum exemplo, ac imitatione humanissima, me & patriam meam semper amori, curæ, atque fidei tuæ commendatam habeas: tibi que persuadeas, nos vicissim maiorum nostrorum exemplo & imitatione tuæ totiusque regni maiestatis, dignitatis, atque salutis similiter fore semper amantissimos, & ad illius defensionem, vel cum sanguinis nostri profusione præparatissimos.

Tibi denique supplex etiam atque etiam, ô Rex Regum cælestis, & immortalis, cuius regnū

immensum est, & infinitum, nullis vel locorum, vel temporum terminis circumscriptum, ac definitum, gratias ago, & habeo ingentes, quòd pro singulari tua misericordia Regem Gallis sociis & foederatis meis fidelissimis, & amicissimis dedisti, Francica, seu antiqua fide, & integritate præditum. Rogo te supplex, ut illos respicias oculo tuæ misericordiæ, & animos illorū mutuis odiis exulceratos, & exacerbatos lenire, mitigare, atque placare, & mutuæ pacis, atque concordiæ studio, & amore inflammare velis, ut posthac in pace, otio, & tranquillitate, mutua pace te colant atque venerentur, ut vitam posthac pacatam, tranquillam, piam & honestam sub tua tutela, ac clientela agant. Fac quæso sancti tui spiritus donis, atque muneribus Regem magis magisque instituas, & augeas, quòd hanc regni Francisci nauem turbulentissimis istis tempestatibus sapienter gubernare, & in quietis, pacis, atque salutis portu collocare possit. Fac quæso, subditorum eius animos ad iustam debitamque benevolentiam, obseruantiam, & obedientiam ei præstandam flectas. Te precor, ut Regem hunc sancto tuo spiritu regere pergas, & Regem, regnūque turbulentis, atque pestiferis istis bellis, atque turbis liberes, & tu, qui verus es flexanimus, Regis & subditorum animos vero & sincero amore coniungere, ac deuincire, & omnes similitates, inimicitias, odia mutua tollere, & extinguere velis, ut tandem Dei misericordia æternam, immortalem, & immarcescibilem

lem gloriæ, & beatitudinis coronam consequatur. Fac, ô Deus, Rex gloriæ, fortis & potens, potēs in prælio: Fac, inquam, vt Rex tuus, quem tu constituisti super populum populosissimum, letetur semper in tua fortitudine, & in salute tua exultet vehementer, instrue, & arma illum tua virtute, vt hostes suos superare, vincere, & victor euadere possit. Des ei desiderium cordis, & locutionem labiorum eius, non prohibeas, id est fac eum voti sui compotem. Des ei protractionem dierum, diuturnam vitæ v-
suram, quò diutiùs patriæ
vsui esse possit.
Amen.

LAUS DEO.

